

Wedau Mark



The Gospel of Mark in the Wedau Language of Papua New Guinea

Wedau Mark
The Gospel of Mark in the Wedau Language of Papua
New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 11 Nov 2022 from source files dated 9 Oct 2020

aa19f3e3-98fb-51fa-9c53-3906edc75f11

Contents

Mark	1
Apasol	44

Mark

Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana ega ita riweta. Wate tauviararamana e ririwa da Mark i girumi. Mark, lamna ega Apasol, wate tauviararamana magamaagai i notai da tauna, Peter maiteni au Rome i mae. Ma Peter, Iesu ana kua ma ana viararamana magamaagai Mark i riwei. Anina ma Mark wei riwana i girumi da tauvitumagana au Rome ita aramanei, Iesu aiwai i kauai.

Riwa karena i girugirumia e viviegeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kua magamaagai ita kauai. Wei kauai tana inainai maranai: e viviararamana; ma arua-apoapoe e viviaagagana-opunei; ma rava doridoriai e vivilawani; ma go'apoapoe e notanota tawanei. Mark, Iesu ana nola ma ana kua i girumi ma ega ana viararamana ita giruma-guratei. Mark i viegeta menanare Iesu au korosi i rage da rava anapui ita vilawanai ma God menanare, Iesu iragalei i vovaimairini.

*John Taubabaito, Iesu ana aninae i vovokaukai
(Matthew 3:1-12; Luke 3:1-18; John 1:19-28)*

¹ Wei lamna Iesu Keriso Messiah God natuna Riwana Aiaina karena.

² Wariaga peroveta Isaiah i girugirumia nanare:

*“Ona rautanihana! Au peroveta au naom ana paritawanei
da am aninae ina vovokaukai.” (Malakai 3:1)*

³ ✧ *“Peroveta au mutulua e vivioreore:*

*‘Taumi BADA ana aninae ona vovokaukai,
ana eta ona vovai-jijimani!’ (Isaiah 40:3)*

⁴ Ma taupariverena John i nei au mutulua da rava i bababaitoi ma God riwana i jimejime i pa, “Ami go'apoapoe ona voterei, ma ona mae-taviremi God awarina ma ami go'apoapoe ina nota-tawanei ma ana babaitoimi.” ⁵ Ma rava anapui Judea au paratana ma au Jerusalem i nae da John ita rautanihanei. Maranai ai go'apoapoe i rupeni, John, tau i babaitoi au waira Jordan.

⁶ Ma John, kamel aparana metametana i oteoteni ma ana tairoro gamogamo opina. Ana lam kapau ma manigewa. ⁷ Ma tauna, rava i ririwei i pa, “Rava au muriu e nenei i getelara, ega

✧ 1:3: Isa 40:3

me tau. Eḡa tagotagogiu da ana ae uma ḡuravana ana rupeni. ⁸ Tau wairei a babataitoimi, wate tauna, Arua Vivivireinei ina babataitoimi.”

John, Iesu i babataitoi

(Matthew 3:13-17; Luke 3:21-22)

⁹ Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitoi. ¹⁰ Ma maranai Iesu wairei i ḡeḡetai, i 'nana da mara i wanatawanei ma Arua Vivivireina me gabubu i ḡairai. ¹¹ *Ma God ponana marei i opu ma i riwa i pa, “Tam, tau natu au nuavaina ma u vinuaiainiu.”

Satan, Iesu i raelari

(Matthew 4:1-11; Luke 4:1-13)

¹² Ma lamna au murina God Aruana Vivivireina Iesu i paritawanana-opunei au mutulua. ¹³ Ma au pom 40 au mutulua i mae. Ma Satan, tauna i raelari. Ḡamoḡamo ḡaiḡaiawai nai au dobuna i mamae ma God ana anela marei tauna i paini.

Iesu, lebalebaḡai ruaḡa ma ruaḡa i raukwatuei

(Matthew 4:12-22)

¹⁴ Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jimei. ¹⁵ Ma Iesu i ririwa i pa, “God ana mara vinevinena i ḡetai. God ana vibadana vouna rava aubai, lamna i turiai. Ami ḡo'apoapoena ona rupeni ma ona mae-tavirem ma Riwana Aiaina ona vitumaḡanei!”

¹⁶ Mara tagogi Iesu Galili topana au gerana i bababara nae. Ma lebalebaḡai ruaḡa i 'nanai, Simon* ma ana tevera Andrew au topa i rarauagida. ¹⁷ Iesu i riwei i pa, “Ona nei ma ona votaḡotaḡoiu. Ma me marina iana o tutuarui; nanare, ana viararamaniami da rava ona tuarui da ina vitumaḡaneu!”

¹⁸ Ma maratogogi ai agida i voterei ma Iesu i votaḡotaḡoi. ¹⁹ Ma tau i gera i verau-nae. Iesu, Zebedi natunatuna i 'nanai, James ma John ai au waga ai agida wanawanarorona i vokaukauei. ²⁰ Ma maratogogi tau i ḡorei, “Taumi ona nei ma ona votaḡotaḡoiu!” Ma tau amai Zebedi† ana taunola maiteni i voterei ma Iesu i votaḡotaḡoi.

Iesu, arua-apoapoena rava awarina i viaḡaḡana-opunei

(Luke 4:31-37)

²¹ Iesu ana Tauvotaḡotaḡo maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei. ²² Tauna ana rewapanana

* **1:11:** Gen 22:2; Isa 42:1; Mrk 9:7 * **1:16:** Wavana ḡelauna Peter † **1:20:**

Eng. Zebedi. ‡ **1:21:** Eng. Capernaum.

i viararamana eġa me mai Jew ai tarawatu babadai § nanare. Ma taurautaniġana ana viararamana i baiei.

²³ Maranai Iesu pari au numana i viviararamana ma oroto arua-apoapoena orana i rui ruinia i garara ²⁴ i pa, “Iesu Nasaretei, aiwai e ġoeġoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!”

²⁵ Ma Iesu riwa bagibaginei i riwei i pa, “Ma genuana! Nai orotona ma opu-tawaneii!”

²⁶ Ma arua-apoapoena orotona i viaikwajiei ma ponana i rata, i garara ma i opu-tawanei. ²⁷ Ma rava anatapui i bana-kauei ma tau i ava i vitarapiri, “Wei aiwai? Wei viararamana vouna ma ana rewapana maiteni! Wei ravana awarina rewapana e mamae da arua-apoapoena i riwei ma tauna i vovoteletelei!”

²⁸ Iesu nolana, maratagogi i tua Galili au anatapuna.

*Iesu, rava maġamaġai i vilawani
(Matthew 8:14-17; Luke 4:38-41)*

²⁹ Nai marana pari numana i opu-tawanei ma ana tau-votaġotaġo maiteni i nae Simon ma Andrew ai au numa. James ma John maiteni i nae. ³⁰ Simon poiana wavinena ini ġuġurana ana au animatave i matamatave ma maranai Iesu i ġeta ma numa ravai, tauna i parivere. ³¹ Tauna i nae wavine awarina, nimana i vojijini ma i voagui da i vomairi. Lamna maranaina, ini ġuġurana i voterei ma wavinena, tau i paini.

³² Ma au bigai madeġa i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.* ³³ Ma rava anatapui nai au melagaina i vitagogiei numa au metaetana. ³⁴ Ma Iesu, maġamaġai ai doria nununai i vilawani ma arua-apoapoe maġamaġai rava awari i viaġaġana-opunei. Ma arua-apoapoena i aramanei da tauna anina God natuna ma lamna aubaina tau i viġaei da i genuana.†

*Iesu au Galili i raugugula nae
(Luke 4:42-44)*

³⁵ Ubaubanai boiboġi, Iesu i vomairi ma numa i opu-tawanei ma i nae gabu au genugenuanana. Ma kampa, God awarina i raupari. ³⁶ Muriai, Simon ana rava maiteni i nae da i baiei.

§ 1:22: Wariaġa BADA, ana Tarawatu Moses i verei mai Israel aubai. * 1:32: Madeġa ina neulai au murina anona lauvitau ana mara damona. Mai Jew ai lauvitau ana mara au Friday madeġa e neneulai au murina e vivikarei da Saturday madeġa e neneulai au murina e vorovorovei. † 1:34: Iesu i aramanei, mepa da ita kauei da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viġavia, me tau i e vivinua-notenotei nanare. Jhn 6:15 ma inanai.

37 Ma maranai Iesu i nelaḡai, ma i riwei i pa, “Rava anapui e baibaiem.”

38 Iesu i paribelei i pa, “Tana nae taon ḡelau i au ḡereḡere, ma kampa maiteni God Riwana Aiaina ana raugugulei. Tau wei lamna aubaina a nei.” 39 Ma Galili au anapuna i naeni ma pari au numai i raraugugula ma arua-apoapoei i viopuni.

Iesu, oroto opi dorianana i vilawani
(Matthew 8:1-4; Luke 5:12-16)

40 Anina ma rava awarina opi dorianana, i nei Iesu awarina ma au naona i peu ma i raudune ma agu i vibaḡei i pa, “Mepa da ma ḡoei, anina da ma viaiainiu.†”

41 Ma Iesu nuabola orana i oai ma urana i viloloi da i vodadani ma i riwa i pa, “Anina a ḡoeḡoei, ma aii!” 42 Ma maratogogi opi-dorianana, oroto i voterei ma tauna i aii me. 43 Anina ma Iesu i riwana-guratei i pa, 44 “Tam ma nae! Aiwai i tuputupua awarim, eḡa rava ma vieḡei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kauai da ina vimataira tauai awari! Pirisi pulo tauapuina ana vianina ina verei da tam u lawana.”

45 Wate orotona i nae ma aiwai awarina i tuputupua lamna melagai au anapuna i babaniana-naiei. Ma lamna aubaina Iesu melagai anapui i vorei ma mepa eḡa rava ita mamaelana kampa i nae. Wate rava mepa maemaiei i nei Iesu awarina.

2

Iesu, oroto gwaḡagwaḡana i vilawani
(Matthew 9:1-8; Luke 5:17-26)

1 Iesu ana tauvotaḡotaḡo maiteni i wanavira-melei au Capeniam. Ma au pom ruaḡa au murina, rava nolana i nonori da tauna i nememei au melagai. 2 Ma rava maḡamaḡau i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei. 3 Nelara ruaḡa ma ruaḡa, oroto gwaḡagwaḡana rasirasiei i avarai da i nei Iesu awarina. 4 Rava i maḡa guratana ma eḡa tagotagogina da ita nei Iesu awarina, lamna aubaina da tetelei i amḡaena da au poewa ma gavogavo i bauni ma kampa gwaḡagwaḡana ana rasirasina i tere-ḡairei Iesu au naona. 5 Ma Iesu, nai ravai i 'nanai da ai vitumaḡana i rata, lamna aubaina gwaḡagwaḡana i riwei i pa, “Natu, am ḡo'apoapoei, a nota-tawanei.”

† 1:40: Mai Jew ai Tarawatu e ririwa da rava lepeleperai, tauai miramirai me dobu ḡela ravai - Jentail. Mai Jew amapo nai ravai eḡa ina vodadani. Rava miramirai eḡa maiteni ina vitaparoro bo au melagai ina mae. Lamna aubaina mepa da rava miramirana i lawana, tauna ina ai-me, God tauna ina vaimelai ma rava maiteni ina mae ma ina taparoro.

⁶ Anina mai Jew ai tarawatu babadai ġelau kampa i kiakiala, au orai i vinua-notanota i pa, ⁷ “God ainelana ġo’apoapoei e notanota tawanei. Aiwai aubaina wei ravana nanare e bababani? Tauna, God e vivijibogi ma e ririwa da tauna, God nanare.”

⁸ Maratagogi, Iesu Aruanei ai nota i vaia ma i riwei i pa, “Aiwai aubaina wei kauai o vivinua-notenotei? ⁹ Metauna i telatela: ġwaġagwaġana ata riwei, ‘Am ġo’apoapoe a nota-tawanei.’ Bo ata riwei, ‘Ma vomairi, am animatave ma vaia ma ma babara?’ ¹⁰ A ġoei da taumi ona aramanei da Rava Natuna au dobu ana rewapana e mamae da rava ai ġo’apoapoe ina nota-tawanei ma ina vilawani.” Ma gwaġagwaġana i riwei i pa ¹¹ “A riwem, ma vomairi, am animatave ma vaia ma ma nae au numa!”

¹² Orotona i vomairi ma maratagogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, “Tauai eġa melanai kaua wenanare ata inanai!”

Iesu, Levi i kwatuei

(Matthew 9:9-13; Luke 5:27-32)

¹³ Iesu, Capeniam i voterei ma Galili topana au gerana i bababara ana tauvotaġotaġo maiteni. Ma patara i nei awarina ma tauna God riwana viararamanana i vikarei. ¹⁴ Ma i verau-nae aburuna ma Apius* natuna Levi i ’nanai, ana bagibagi au gabuna i kiakiala ma tax i tamitami Rome gabemanina aubaina. Iesu i riwei i pa, “Ma votaġotaġoiu!” Levi i vomairi ma i votaġotaġoi.

¹⁵ Tax tautami ma ġo’apoapoei ravai maġamaġgai, Iesu ma ana tauvotaġotaġo i votaġotaġoi. Ma anatapui, Levi ana au numa i kiala gogona ma i amam.† ¹⁶ Tarawatu Babadai ġelau lamna Pharisi, ma tau i ’nanai da Iesu tax tautami ma ġo’apoapoe ravai maiteni i amam. Anina ma Iesu ana tauvotaġotaġo i riwei i pa, “Aiwai aubaina Iesu tax tautami ma ġo’apoapoei ravai maiteni e amam?”

¹⁷ Ma maranai Iesu wei riwana i nononori ma tau i riwei i pa, “Rava lawalawai, doketa eġa ita ġoeġoei ma rava doridoriai, doketa e ġoeġoei. Tau a nei ġo’apoapoei ravai aubai ma eġa rava jijimani aubai.”

Uji vitaraviravirana

(Matthew 9:14-17; Luke 5:33-39)

* **2:14:** Eng. Alphaeus. † **2:15:** Moses, BADA ana Tarawatu i girumi ma mai Pharisi wei Tarawatuna i votaġotaġo-kauei. Ma tau kaua waduboi amamai ġariei maiteni i vovoteletei ma i riwa da aiavoi Tarawatu eġa ita vovoteletei lamna tau rava apoapoei, ġo’apoapoe tau kauei.

18 Mara tagogi, John Taubabataito ma Pharisi ai tauvotaḡotaḡo i ujiuji. Ma rava ḡelau i nei Iesu awarina ma i vitara- virevirei, “Aiwai aubaina John Taubabataito ma Pharisi ai tauvotaḡotaḡo e ujiuji, wate tam am tauvotaḡotaḡo eḡa ita ujiuji?”

19 Iesu i paribelei i pa, “Taumi o notanotai da tau aiavo i raukwatuei tavine ana au torela, ina mae lota bo? Eḡateni kau! Maranai tavitavine vou orotona, tau maiteni e mamae, tau eḡa ina uji. 20 Wate mara ina ḡeta maranai tavitavine vou orotona ina vaitawanei ma lamna maranaina ana rava ina uji.”

21 Ma riwa e mamae, “*Tau kaua vouna a neiai eḡa me taumi ami kaua wadubona nanare.* Eḡa aiai ravana, gara vounei gara au wadubona ina popo-ratui da gavogavo ina vopotai. Mepa da nanare lamna, gara vouna gara wadubona ina roroi ma gavogavo ina rata. 22 Ma nanare, eḡa aiai *wine* vouna ina vaini da *wine* aniterenana wadubona ḡamoḡamo opinei au orana ina iwaḡi. Mepa da ina kauēi, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni†. Wate *wine* vouna, anina da *wine* aniterenana vouna au orana ina iwaḡi.”

Iesu ana riwa Sabat aubaina
(*Matthew 12:1-8; Luke 6:1-5*)

23 Mara tagogi au Sabat, Iesu ana tauvotaḡotaḡo maiteni, *witi* wapuna au orana i nenaē. Ma ana tauvotaḡotaḡo *witi rovei* i vaini ma i amam. 24 Pharisi ḡelau i 'nanai wei kauana i kaukauei ma tau Iesu i riwei, “Ma inana, ata Tarawatu e mamae da Sabat, lamna lauvitau ana mara. Aiwai aubaina tau e vovobagibagi?”

25 Iesu i paribelei i pa, “Me peroveta i girugirimia nanare. David ana tauvotaḡotaḡo maiteni am-iraḡe ma aiwai i kauēi? Taumi o iavi ma aiwai aubaina anona, eḡa ota vinua-notenotei? 26 *Pirisi Ḡeḡetelarana Abiathar ana au mara, David, God ana au numa i rui ma palawa vovivirana i vaia ma ḡelau ana tauvotaḡotaḡo maiteni i verei da i ani. Moses ana Tarawatu e mamae da pirisi ava palawana e aniani.”

27 Ma Iesu ana riwa au damona i riwa i pa, “God, Sabat i kauēi da rava voaguna aubaina ma eḡa rava ita kauēi Sabat voaguna aubaina. 28 Ona vinuanotenotei, tau Rava Natuna, lamna aubaina tau anina Sabat badana.”

3

Iesu, Orotu urana irairaḡena i vilawani
(*Matthew 12:9-14; Luke 6:6-11*)

† 2:22: Wine e tuputupua ma puropurona wine ana aniterenana ina viaisikasikai

* 2:26: 1Sa 21:1-6

¹ Mara ḡelauna au Sabat, Iesu i naeme au pari numana ma oroto urana irairāḡena i 'nanai kampa i kiakiala. ² Ma Pharisi ḡelau i ḡoei da aiwaiei Iesu ita viwavui. Lamna aubaina i 'nana-taḡotaḡoi da oroto ita vilawani bo eḡa au Sabat. ³ Ma Iesu, orotona i riwei, "Ma nei, au naoi ma mairi!" ⁴ Ma Iesu, ravai i vitara-virevirei i pa, "Sabat au marana, metauna i aii: Aiaina tana kauei bo apoapoena? Tana vilawana bo tana virāḡena? Tarawatu aiwai i riwei?" Ma anapui i genuana. ⁵ Iesu ana amloḡaiḡaina i 'nana viravira ma i 'nanai da tau i orai i bado ma nuanuana i bola-kauei. Ma orotona i riwei i pa, "Uram ma viloloi!" Ma i viloloi ma i lawana. ⁶ Ma Pharisi maratagogi i opu ma i nae Herod ana rava awarii* ma ai oga i tarai da Iesu mena ita virāḡenanei.

Iesu, Patara awari i babani

⁷⁻⁸ Iesu ana tauvotaḡotaḡo maiteni, tau i netawanei ma i nae au gera da ita vilauvitau; ma mai Galili patara ḡaeḡaena i votaḡotaḡo. Rava maḡamaḡai, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ḡelau waira Jordan taon au babagelauna, Taia taon ma Sidon taon,† tau anapui i nei Iesu awarina. ⁹⁻¹⁰ ✧ Iesu, rava maḡamaḡai i vilawani. Ma lamna aubaina doridoriai maḡamaḡai i viviamdudu ma i ḡoei da tauna ita vodadani. Lamna aubaina ana tauvotaḡotaḡo i riwei da waga i vokaukauei. ¹¹ Maranai, arua-apoapoei rava au orai maemaei, Iesu i 'nanai ma au naona i peu ma i garara, "Tam God Natuna!" ¹² Ma Iesu tau i viḡaei da avena ita vieḡa da tauna aiai.

Iesu ana Apasol 12 i vinei

(Matthew 10:1-4; Luke 6:12-16)

¹³ Anina ma Iesu i ḡae au ola ma ana ḡoanei nanare, rava i kwatuei da awarina i ḡei. ¹⁴ Tauna, nelara 12 i vinei da maiteni ita mae ma muriai ita paritawanei da ita raugugula. Ma i ḡorei Apasol. ¹⁵ Ma i vovai-virewapani da arua-apoapoei rava au orai ina viopuni.

¹⁶ Tau i vinevinei 12 ai wava wenanare,

Simon i ḡoreḡoreia Peter‡

¹⁷ ma Zebedi§ natuna James ma ana tevera John i ḡorei Boaneges, anona waiparara natunatuna,

¹⁸ Andrew,

* **3:6:** Herod ana rava anona lamna mai Jew ai boru, tau aiavoi Rome gabe-manina i vovoagui. Tau ai bada wavalatona Herod Antipas. Mai Jew maḡamaḡai ma mai Pharisi maiteni, i notai da Herod ana rava tau i tauvibenabenam ai rava au oiena awarii. † **3:7-8:** Eng. Tyre & Sidon. Wei ravana eḡa mai Jew. ✧ **3:9-10:** Mrk 4:1 ‡ **3:16:** Anona Gaima. § **3:17:** Eng. Zebedi.

Philip,

Batolomeo,*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

¹⁹ ma Judas Iskariotei; * tauna, Iesu tauvibenabenameina.

Rava i riwa da arua-apoapoei Iesu e vivibadei.

(Matthew 12:22-32; Luke 11:14-23; 12:10)

²⁰ Ma Iesu ana tauvotaḡotaḡo maiteni i rui au numa. Ma patara i rieiai da tau i eḡa tagotagogina da ita am. ²¹ Ma Iesu ana numa ravai nolana i nonori ma i riwa i pa, “Tauna i bua.” Lamna aubaina i nei da ina taravaini.

²² Tarawatu babadai ḡelau Jerusalemei i nei ma i riwa i pa, “Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni.”

²³ Lamna aubaina Iesu, wei Babadai i ḡorei ma awanaini i pa, “Satan amapo Satan eḡa ina viopuni. ²⁴ Mepa da dobu ravai ina viḡavia vivira, lamna dobuna ita mae ava. ²⁵ Ma nanare dam ina viḡavia vivira, nai damna ita mae ava. ²⁶ Ma Satan ita vomairi ma ita viḡaviana-melei, amapo ita mae ava. ²⁷ Taudanene amapo eḡa rava virewapanana ana au numa ina danene, eḡa da au naona ravana ḡuravei ina raḡini ma muriai ina danene. ²⁸ Riwa kaua a ririwemi da God ami ḡo’apoapoei ma ami vijiboḡa anatapui ina nota-tawanei. ²⁹ Wate aiai da Arua Vivivireina e vivijiboḡi, God, nai ravana ana ḡo’apoapoei eḡa melanai ina nota-tawanei ma ana ḡo’apoapoei ina mae-nonoa.” ³⁰ Iesu wenanare i babani, aubaina rava ḡelau e ririwa, “Iesu au orana arua-apoapoei e mamae.”‡

Iesu ana dam oina

(Matthew 12:46-50; Luke 8:19-21)

³¹ Iesu alona ma varevareina i nei ma au doa i maimairi ma riwa i paritawanei Iesu awarina da ita nei. ³² Ma patara Iesu i kiala kwaviviroi, ma taupariverena i riwei i pa, “Alom ma novunovum ma varevareim au doa ma e ḡoḡoem.”

* **3:18:** Eng. Batolomeo. † **3:18:** Eng. Alphaeus. ‡ **3:18:** Wavana ḡelauna Judas - Luk 6:16 § **3:18:** Anona lamna tau mai Jew ma tau Rome e viviḡaviei.

* **3:19:** Iskariot, lamna Judas ana melagai wavana da auna lamna Iskariotei.

† **3:22:** Eng. Beelzebub. Anona lamna, nabugara ai bada. ‡ **3:30:** Tarawatu tau girumi i parivaijijigei aubaina tau i ririwa da Arua Vivivireina ana nola lamna baravu da parauma. BADA eḡa melanai ai ḡo’apoapoei ina nota-tawanei.

³³ Iesu i paribelei i pa, “Aiai alou ma aiavo i varevareiu?”
³⁴ Anina ma tau i kiakiala i ’nanai ma i riwa i pa, “Ona inana! Wei tau alou ma varevareiu. ³⁵ Aiai God ana ġoana e kaukauei, tauna alou ma novu ma vareiu.”

4

Doa tapuna ma tapuna ai awanaina *(Matthew 13:1-9; Luke 8:4-8)*

¹ Iesu, ġiu i raukarena-melei Galili topana au adana. Ma patara i riei da ita rautaniġane. Ma patara i rata, da tauna au waga i geru ma i kiala ma waga i dudui da i virauopu au topei ma patara au gera i mae.

² Ma kaua maġamaġaui awanainei i ġiu ma i viararamana i pa,
³ “Ona rautaniġana! Taupaewa, ana wapu i vokaukauei ma pei i ravi awawari. ⁴ Pei ġelau i au eta i pe. Ma kiu i ġeta ma i ani.
⁵ Ma pei ġelau i doa au ġaiġaimana i pe, doa au avavana. Ma lamna aubaina maratagogi i gogo. ⁶ Wate maranai madeġa i rarani, maratagogi i poi, anona warami eġa ita ġaira guratana doa au orana. ⁷ Pei ġelau, modu donadonai au pou i pe. Ma modu donadonai i gogo ma pei i gogogo i lavani, ma eġa ita ua.
⁸ Ma pei ġelau i doa au aiaina i pe ma i gogo kaua ma i ua, ġelau i 30, ġelau i 60 ma ġelau i 100.”

⁹ Ma Iesu i riwa i pa, “Mepa da taniġami e mamae, riwa ona nonori!”

Aiwai aubaina Iesu awanainei i babani *(Matthew 13:10-17; Luke 8:9-10)*

¹⁰ Maranai Iesu ainelana i mamae ma ana tauvotaġotaġo 12 ma taurautaniġana ġelau i ġeta ma Iesu i vibaġai da awanaina anona ita riwei.

¹¹ Ma Iesu i paribelei i pa, “God ana vigulau ana kaua mamae govaġana; taumi i vieġemi ma rava au tano maema, tau i aiwai anapui awanainei e paripari-verei. ¹² Lamna ana kauei da wariġa peroveta aiwai i girigirumia ina tupua:

“Tau i ina inana ma eġa ita inainanai.

Tau i e rarautaniġana ma eġa ita araramanei;

ma lamna aubaina tau i eġa ita nenei God awarina

da ai ġo’apoapoe ita notatawanei.” *(Isaiah 6:9-10)*

Doa tapuna ma tapuna anoi.

(Matthew 13:18-23; Luke 8:11-15)

¹³ Anina ma Iesu i riwei i pa, “Wei awanainei a babani ma anona eġa ota aramanei bo? Ma awanaina ġelau menanare ona aramanei? ¹⁴ Taupaewa, God riwana, rava anapui e paripari-verei. ¹⁵ Rava ġelau orai i bagibagi me etanai. Riwa au tepana e raurauei, wate maratagogi Satan e nenei da riwa rava au orai e vaivai-tawanei. ¹⁶ Ma rava ġelau orai me doa

viġaiġaimana. Tauī, riwa i nonori ma maratagogi ana nuaiāi riwa e vaivaia. ¹⁷ Wate warami eġa da eġa ita mamae gurātana. Ma maranai nuabola bo rau-iviapoapoe e nenei tauī awari, aubaina tauī ai tumaġana God awarina e tereterei. Tauī maratagogi e peupeu. ¹⁸ Rava ġelauī orai me pei, modu donadonai au orai e gogogolana. Tauī anina riwa e nononori. ¹⁹ Wate lawana ai nuabola ma mane ai nuavainana ma kaua ġelauī ai au nuaiāi e ruirui ma God riwana e lavalavani da eġa ita uaua. ²⁰ Ma ġelauī, tauī me pei doa au aiaina i peu. Tauī, lamna anina riwa e nononori ma e vaivai-kauei ma e uaua: ġelauī 30 ma ġelauī 60 ma ġelauī 100.”

²¹ Iesu i riwei i pa, “Rava, eġa rampa ita neineiāi da iriga au gabaurina ita tereterei bo vatara au gabaurina ta pa? Rampa ana au anikiala e tereterei ta pa? ²² Kaua mamae govaġai, anat-apatapui a vieġai ma kaua govagovaġai nanarena ana vieġai. ²³ Mepa da taniġami e mamae, riwa ona nonori!”

²⁴ Iesu i riwa i pa, “Aiwai o nononorāi ona rautaniġanana-kauei, ruva o ruveruveia, God nanare awarimi ina ruvai ma ġelauna ina tavipotoi. ²⁵ Lamna aubaina, mepa da riwau ona aramanei, tau ġelauna ma ġelauna ana veremi. Ma tauī eġa ita aramanei, lamna aiwai aburuna i nononorāi, ina vine-boai.”

Pei gogogona ana awanaina.

²⁶ Iesu e ririwa i pa, “God ana vigulau me rava, witi peina au doa ita ravi-awawari. ²⁷ Ma waguvara e matamatave ma maratom e vovomairi ma pei e gogogo ma e rarata. Wate aiwaiei e gogogo, tauna e vivinuanainei. ²⁸ Doa ana nuaina, pei me witi e vivigogoi ma e uaua. Au naona e raraupairei ma muriai e roverove ma muriai anona e magumagura au tapina. ²⁹ Maranai i magura, rava petona e raraukarei. Tuaruta marana i ġetai.”

Pei aburuoina ana awanaina

(Matthew 13:31-32, 34; Luke 13:18-19)

³⁰ Iesu i riwa i pa, “God ana vigulau aiwaiei ana parivai-patepatei bo aiwai awanainei ana pariveremi? ³¹ Wenanare, wei aina peina, lamna me gaga peina, pei aburuoina au dobu ma au doa i paewi. ³² Ma peina i gogo ma i rata da ai muomuoi i ġetawanei ma raġaraġai ġaeġae i terei ma au ġoui, kiu ai noġi ita voai.”

³³ Ma Iesu, awanaina maġamaġai, rava au matai i raugugulei da tauī ai rau-taniġana ana au ruva nanare. ³⁴ Awanainei, rava awari i ġiugiu, wate ana tauvotaġotaġo ava awari kaua anatapui i vivieġai.

Iesu, kojikojira i ravi-daumorai

(Matthew 8:23-27; Luke 8:22-25)

35 Nai aubigaina Iesu, ana tauvotaḡotaḡo i riwei i pa, “Tana damana topa au baba ḡelauna.” 36 Anina ma tau i patara i voterei. Ma anatapui Iesu, maiteni au waga i geru ma i damana, waga ḡelai maiteni. 37-38 Iesu, waga au murina unutana i terei ma i raunuavuru. Ma kojikojira ḡaeḡaena i tupua ma rabama, waga au tepana i rauraei ma waira, waga i oaoi. Ma ana tauvotaḡotaḡo, tauna i ravi-dagudagui ma i riwei i pa, “Taugiu, nuanuam e bolabolai bo eḡa da tana iraḡe?”

39 Ma tauna i vomairi ma ive i viḡaei ma i riwei i pa, “Ma genuana!” Ma rabama i riwei i pa, “Ma mae-genuataul!” Ma ive i wanatuini ma daumora ḡaeḡaena i matave. 40 Iesu ana tauvotaḡotaḡo i riwei i pa, “Aiwai aubaina o rovorovo? Taumi amapo da eḡa ota vitumaḡana!”

41 Ma tau i rovo kauga ma i riwa vivira i pa, “Wei aiai ravana da ive ma rabama tauna e vovoteletelei?”

5

*Iesu, arua-apoapoena oroto awarina i viaḡaḡana-opunei.
(Matthew 8:28-34; Luke 8:26-39)*

1 Iesu ana tauvotaḡotaḡo maiteni Galili topana au baba ḡelauna i ḡeta, mai Gerasa ai au dobu. 2 Wei au dobuna, arua-apoapoena oroto au orana maemaena. 3-5 Eḡa aiai tagotagogina da ita vovaiubai. Mara maḡamaḡauna, aena ma urana seinei i pani. Wate wei i vaiuituini, ma eḡa tagotagogina da seinei ita pani. Marai ma waguvarai i nene-labalababa ma i garagarara ma ḡaimei tupuana i boribori-melei ma au kokoaga ma au ola i raunuma. 6 Maranai Iesu wagei i opuopu, arua-apoapoei orotona i rui ruinia, aueia Iesu i 'nanai ma kokoagei i ruba ma Iesu au naona i mae-peu ma i raudune. 7-8 Iesu, ravana i riwei i pa, “Arua-apoapoena, wei orotona ma opu-tawaneii!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awariu e ḡoeḡoei? God wavanei a vivibaḡaim da eḡa ma kovogiu!” 9 Iesu, orotona i vitara-virevirei i pa, “Tam wavam aiai?”

I paribelei i pa, “Tauai a maḡa, aubaina tau wavau lamna Ḡavia Patarana.”

10 Ma arua-apoapoei, Iesu i vibaḡa-guratei da avena nai dobunei ita viopuna-tawanei.

11 Ma poro boruna ḡaeḡaena au ḡereḡere ola au adana i labalaba. 12 Ma arua-apoapoei, Iesu i vibaḡai, “Ma paritawanelai poro au orai ana rui.” 13 Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba ḡaira da au topa i monu.

14 Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inanai aiwai i tupua.

15 Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma tau i rovo kaua. 16 Ma aiwai i tupua orotona ma poro awari, tau i 'nainanaia, rava i riwananaiei.

17 Ma dobuna ravai, Iesu i vibaḡai da dobuna ita oputawaneii.

18 Iesu au waga i gerugeru ma orotona, Iesu i vibaḡai i pa, "Tau maiteni tana nae."

19 Iesu i viḡaei ma i riwei i pa, "Ma naeme am au dam. Ma BADA kaua aiwai ḡaeḡaena i kaukaueia ma ana iviaiai tam awarim, tau ma parivereii."

20 Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwananaiei. Ma tau anatapui i nononoria i baiei.

Iesu, Jairus natuna wavinena ma wavine doridorianana i vilawani.

(*Matthew 9:18-26; Luke 8:40-56*)

21 Iesu wagei i damana me topa au baba ḡelauna. Maranai kampa i ḡeta ma topa au adana, ma patara i rieiai. 22 Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu 23 ma i vibaḡa-guratei i pa, "Natu guguinina e irairaḡe. Ma nei ma uram au inina ma terei ma ina lawana."

24 Anina ma Jairus, Iesu maiteni i nae ma patarana i mae gariḡuruvi ma i votaḡotaḡoi.

25 Wavine tagogi kampa patarana au orana awarina tara-doriana i mae da madeḡa 12 i kwa. 26 Ana mane anata-putapuna, dokedoketa maḡamaḡaui awarii i tawanei ma eḡa tagotagogina ita vilawani ma amapo da ana doria i rarata. 27-28 Tauna, Iesu nolana ma ana babani i nonori ma au orana i vinua-notanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani. 29 Maratagogi, tara-doriana i wanatuini ma malana i vaia da i lawana. 30 Nai maranaina, Iesu malana i vaia da ana rewapana i opu-tawanei ma i mae-tavirei patara au poui ma i riwa i pa, "Aiai au gara i vodadani?"

31 Ana tauvotaḡotaḡo, tauna i riwei, "Ma inanai, patara i mae gariḡuruvim! Ma menanare da u riwa 'Aiai i vodadaniu?"

32 Wate Iesu i 'nana viravira da ita inanai aiai i vodadani. 33 Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i vieḡei. 34 Anina ma Iesu, wavine i riwei i pa, "Natu, am tumaḡana i vilawanim. Am doria i kwa, ana nuaubam ma nae!"

35 Maranai i bababani ma rava ḡelai Jairus ana numei i nei ma i riwei i pa, "Natum ana mara i kwa. Eḡa Taugiu ma visina-viravirai."

³⁶ Iesu ai babani i nonora-tawanei ma Jairus i riwei i pa, “Eġa ma rovo, ma vitumaġana!” ³⁷ Iesu, rava ġelau i viġaei ma Peter ma James ma ana tevera John maiteni i nae. ³⁸ Ma Jairus ana au numa i ġeta ma Iesu, patara i ’nanai; i toutou ma i taratarakwatu ³⁹ ma i rui ma tau i riwei i pa, “Aiwai aubaina o taratara-kwatu ma o toutou? Tevera eġa ita iraqe, tauna e matamatave ota.”

⁴⁰ Ma tau i, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaġotaġo tonuġa maiteni i rui mepa tevera i matamatave lana. ⁴¹ Iesu, tevera nimana i vaia ma i riwei i pa, “*Talitha koum!*” wei anona, “Kukuma, ma vomairi!”

⁴² Maratagogi i vomairi ma babara i vikarei (Tauna ana madeġa 12). Ma tau i ba kaua. ⁴³ Iesu, tau i riwana-guratei da eġa aiai ita vieġei ma i riwa da ita viambagibagi.

6

Mai Nasaret, Iesu i parivirevirei

¹ Iesu ana tauvotaġotaġo maiteni nai dobuna i netawanei ma i naeme ana au melagai. ² Ma Sabat marana i ġeta ma tauna giu i vikarei au pari numana. Ma rava maġamaġau i riei da i rautaniġanei. Tau i anatapui i baiei ma i vitara-viravira vivira i pa, “Wei tauna nuaulaula ma aramanana mepa i vaia?” Ma, “Kaua aiwaiei e kaukauei?” ³ Anina ma tau i ava i babani vivira i pa, “Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?” Ma lamna aubaina mai Nasaret, Iesu i parivirevirei.

⁴ Iesu, tau i riwei i pa, “*Peroveta* dobu au ġelau i vivivirei, wate ana au melagai, ana rava ma ana dam oina, eġa ita vivivirei.”

⁵⁻⁶ Tauna i baiei da rava eġa tauna ita vitumaġanei. Ma eġa tagotagogina da kaua vivirewapanai kampa ita kau i. Tauna urana, rava ruaġa ota doridoriai au tepai i terei ma i vilawani. Ma muriai, melagai nununai au ġereġerei i viararamana nae.

Iesu ana Apasol i paritawanei da ita viararamana

⁷ Ma Iesu, tau i 12 i ġoreiai ma ruaruqei ava i paritawanana-opunei ma rewapana i verei da arua-apoapoei ina viaġaġana-opunei. ⁸ Ma riwa bagibaginei i riwei i pa, “Ami au vaġai, eġa aiwai ona vaia anina jiġona ava; eġa lam, eġa autu bo mane au urami. ⁹ Ae uma ona oteni ma eġa kwama ġelauna ona vaia.” ¹⁰ Ma i riwei i pa, “Metauna melagaina o rui ruiana ma i vianinemi. Numa tagoginina au orana ona mae da melagaina ona oputawanei. ¹¹ ☆Mepa da au melagai o ġeta ma

rava eġa ita vianinemi bo eġa ita rautaniġanemi. Nai melagaina ona oputawanei ma aemi pokauna ona rauabuabui da ina aramanei da tau i ai wavu!”*

¹² Ma tau i opu ma rava awari i raugugula ma i riwei i pa, “Taumi ami ġo’apoapoei ona voterei ma ona mae-taviremi God awarina!” ¹³ Tau i, arua-apoapoei i viaġaġana-opunei. Ma rava doridoriai maġamaġau i, olive oirana au kolai i buloi ma i vilawani.

John Taubabataito ana iraqe

¹⁴⁻¹⁶ ✠ Iesu nolana i nae da rava anatapui i aramanei ma tauna i babaniei. Ma rava ġelau i ririwa i pa, “Tauna, kua vivirewapanai e kaukauei, aubaina tauna John Taubabataito iraqelei i vomairi me.” Ġelau i ririwa i pa, “Tauna Elijah i nememei.” Ma ġelau i ririwa i pa, “Tauna peroveta wariġai nanare.” Ma gulau Herod, † nolana i nonori ma i riwa i pa, “Tau, John Taubabataito uana a borituini; marina i vomairi me.” ¹⁷⁻²⁰ John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaġi. Wavinena wavana Herodias. Au murina John, Herod i riwana ġiriġiriei i pa, “Tarawatu e mamae da eġa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniġanei. Wate nuanuana i raġaraġa.

Ma Herodias, John awarina amlona i ġaiġai ma viraġenana i ġoei. Herod i aramanei da John, lamna rava jijimanina ma vivireina ma i gagaloei. Herod, John i rovoei ma lamna aubaina wavinena eġa tagotagogina da aiwai ita kau i.

²¹ Ma wavine, gavogavo i ’nanai, maranai Herod ana tupua marana i ġeta ma torela i vokaukauei. Ma gabemani babadai ġaeġaei ma sorodia ai babada ġaeġaei ma Galili babadai i raukwatuei. ²² Ma Herodias natuna wavinena i nei ma i ara. Herod ma tau i maiteni i amam i vinuaiaini. Ma gulau, guguini i riwei i pa, “Aiwai u ġoeġoeia ma vibaġaiu ma ana verem!” ²³ Ma i parivainuaġani i pa, “God au matana a ririwem da aiwai u vivibaġeiu ana verem da au vigulau nanavana au paratana.”

²⁴ Ma tevera wavinena i opu ma alona i paridadanei i pa, “Aiwai ana vibaġei?”

* **6:11:** Wariġa mai Jew, tauvaġai e nenememei au Israel. Tau i au aei pokau e rarauabuabui maranai Israel ana au parata e ġeġeta, lamna tau i orai e viaiaini. Ma Iesu ana tauvotaġotaġo wei i kau i da melagai ravai ina notai, “Taufotaġotaġo e ririwa da tauta orata apoapoena me tauta eġa mai Jew.” ✠ **6:14-16:** Mrk 8:28

† **6:14-16:** Herod Antipas, Galili ana Wavalatona.

Ma i paribelei i pa, “John Taubabataito kolana.”

²⁵ Ma maratagogi i vipaparana ma gulau awarina i rui ma i vibaḡai i pa, “A ḡoeḡoei da marina John Taubabataito kolana ma vereu au aboma!” ²⁶ Ma gulau nuanuana i bola-kauei. Wate parivainuaḡana boiboḡi i kauei tau i amam au matai. Ma lamna aubaina guguini, aiwai i vivibaḡei anina i vianinei. ²⁷ Ma tauviraḡena i paritawanei ma i riwei da John kolana ita neiai. Ma i nae panipani au numana ma John uana i borituini. ²⁸ Ma kolana au aboma i terei ma guguini i verei ma guguini, alona i verei. ²⁹ Ma John ana tauvotaḡotaḡo, nolana i nonori ma i nei ma taubeuna i vaia ma au kokoaga i vimataveni.

Iesu, nelara 5,000 i viambagibagi

(Matthew 14:13-21; Luke 9:10-17; John 6:1-14)

³⁰ *Apasol* i ḡeta memei ma aiwai anataputapuna i kaukauei ma i raraugugulei, Iesu i vieḡei. ³¹ Lamna maranai, rava maḡamaḡai i nenei ma i nenaē da Iesu ana tauvotaḡotaḡo maiteni eḡa gavogavo ita maemaē da ita am. Lamna aubaina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.” ³² Ma anatapui wagei i nae au mutulua.

³³ Wate rava maḡamaḡai i ’nanai i nenaē ma i aramanei tau i aiavoi. Ma melagai nununai anatapui geraei i ruba gogona da au dobuna i aiḡeta. ³⁴ Maranai Iesu wagei i tuopu au gera ma patara ḡaeḡaena i ’nanai ma nuanuana i bola-kauei. Tau i me sipu ma eḡa ai tauvipaipai. Ma Riwana Aiaina viararamanai i raukarei. ³⁵ Ma au biga e tuturiai ma ana tauvotaḡotaḡo i nei awarina ma i riwei i pa, “Wei mutulua ma madeḡa e arearere. ³⁶ Rava ma paritawanei da ina nae au melagai ma au wapu au ḡereḡere da ai lam ina gimarai.”

³⁷ Wate Iesu i paribelei i pa, “Taumi ona viambagibagi!” Ma tau i paribelei i pa, “Mepa 200 *denarii*† tana vaia da wei patarana tana viambagibagi?” ³⁸ Ma Iesu i paridadanei i pa, “Palawa biḡa awarimi? Ona nae ma ona baiei!”

Maranai i nelaḡai ma i riwa i pa, “Awariai, palawa five ma iana ruaḡa.”

³⁹ Anina ma Iesu, patara i riwei i pa, “Boru nununai, gidagida au majimajiḡai ona kiala nae.” ⁴⁰ Ma tau i ai au boru 50 da 100 nanare i kiala nae. ⁴¹ Ma Iesu, palawa five ma iana ruaḡa i vaia ma i ḡoutata au mara ma God i viegualauei. Ma palawa i vogimagimai ma iana i ḡutai da ana tauvotaḡotaḡo i verei ma tau i, rava i verei. ⁴² Ma patara i am ma i am-iaua.

† 6:37: 200 denarii. Denarius tagogi lamna taubagibagi ai maia au pom tagogo nolana aubaina.

⁴³ Ma ana tauvotaḡotaḡo, lam am tereterenai i tuarui da poa muomuoi 12 i vioai. ⁴⁴ Nelara 5,000 i viambagibagi.

*Iesu, waira au tepana i babara
(Matthew 14:22-33; John 6:15-21)*

⁴⁵ Anina ma Iesu, ana tauvotaḡotaḡo i egari da ita aidamana au Bethsaida.[§] Tau i waga i geru da i nena ma tauna, patara i paritawanei. ⁴⁶ Patara i paritawanei ma tauna ava i ḡae au ola da ita raupari. ⁴⁷ Ma waguvara ana tauvotaḡotaḡo au waga au topa ma Iesu au alala. ⁴⁸ Ma ana tauvotaḡotaḡo, lare i vovoguratei da ita ḡota wate ive i viraumatamatani. Ma maratomtomo nanare, Iesu i nae awari. Tauna waira au tepana i bababara ma i ḡoei da tau i ita tutelarei. ⁴⁹⁻⁵⁰ Ma maranai tau, Iesu i 'nanai topa au tepana i bababara ma i notai da tauna konaḡa ma i rovo kaukua ma i vigaragararei. Ma maratagogi Iesu i riwa i pa, "Tepami ina tora! Tau, eḡa ona rovo!"

⁵¹ Ma au waga i geru ma ive i wanatuini ma tau i bana-kauei. ⁵² Avena da kua palawa awarina i kauei i 'nanai, wate ana rewapana eḡa ita aramana-kauei. Tau i orai i bado ma i vinuanaina.

*Iesu, rava doridoriai maḡamaḡai au Genesaret i vilawani
(Matthew 14:34-36)*

⁵³ Tau, topa i damani ma au Genesaret i ḡota ma ai waga i raḡini. ⁵⁴ Tau, waga i oputawanei ma rava, Iesu i 'nanai ma maratagogi i aramanei da tauna. ⁵⁵ Iesu nolana, Galili provins anatapu i naeni ma i nonori da tauna mepa i mamae. Ma kampa, doridoriai rasirasiei i vivaneiai. ⁵⁶ Iesu mepa i nenelana, melagai ḡaeḡae ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibaḡa, da doridoriai, Iesu ana gara adana ava ita vodadani. Ma aiavo i Iesu ana gara i vodadani i lawana.

7

*Amamami ai giu
(Matthew 15:1-9)*

¹⁻⁴ Pharisi ma Jew anatapu, magumagura ai giu maḡamaḡai e notanota-jijini. Tau, ai aniuma ma ai aniam anatapu e oḡaoḡai lamnei tau e viaiaina-melei God au matana. Ma maranai au maket da e nenei, urai ina oḡai ma ina am. Tau eḡa ina am da au naona urai ina oḡa kauei me ai magumagura ai giu nanare.

Maratagogi Pharisi ḡelau ma Tarawatu Babadai, Jerusalem ei i nei Iesu awarina da ita rautaniḡanei. Ma tau i 'nanai da Iesu ana tauvotaḡotaḡo ḡelau, urai eḡa ita oḡai ma i amam.

[§] 6:45: Eng. Bethsaida.

⁵ Ma tauī, Iesu i vitara-virevirei i pa, “Aiwai aubaina am Tau-votaḡotaḡo magumagura ai giu, eḡa ita votaḡotaḡoi ma ana ura miramirai e amam?”

⁶ Ma Iesu i paribelei i pa, “Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

‘Wei ravai ipiriei e vovoepaepaiu,
wate nuanuai aueia.

⁷ Tauī rava ai giu e viviararamani.

Lamna aubaina ai voepaepa anona eḡa.’ (*Isaiah 29:13*)

⁸ Taumi, God ana Tarawatu o teretere-tawanei ma ami giu o votaḡotaḡoi.”

⁹ Ma i riwana-melei i pa, “Taumi o aramana kaua da God ana Tarawatu o gedugeduaiei ma amamami ai giu o vovotaḡotaḡoi.

¹⁰ *God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona viragēni.* ¹¹ Wate taumi o viararamana da aiai awarina mane bo purapura, amana bo alona ita voagui ma ita riwei, ‘Awaru e mamae da ata voaguim; wate lamna *Corban* - a tereriei pulo, God aubaina.’ ¹² Wei viararamanana, tauī e vivigāei da amana ma alona ina voagui. ¹³ Ma wei taunei viararamana, rava awari o vividamani; ma God riwana o vivikwakwavi. Ma kaua maḡamaḡai ḡelau maiteni o kaukauei.”

Metauna kauai, rava orai e vivimirai.
(*Matthew 15:10-20*)

¹⁴ Iesu, patara i kwatuana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei. ¹⁵⁻¹⁶ Aiwai au tanoēi au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”*

¹⁷ Anina Iesu, patara i voterei ma i rui au numa. Ma ana tau-votaḡotaḡo, i vitara-virevirei da wei awanainana anona aiwai. ¹⁸⁻¹⁹ Iesu i paribelei i pa, “Taumi maiteni eḡa ota aramanei bo? Kaua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au nuapouna, wate au manawana da e opuopu.” (Wei riwanei Iesu, lam anatapui i viaiaini).

²⁰ Anina ma i riwa i pa, “Aiwai, rava oranei e opuopu; lamna, rava e vivimirai God au matana. ²¹ Anina rava nu-anuaneī vinuanotanota apoapoei e opuopu me: viawawana labalababa, danene, viragēna, awadanene, ²² ambo, rau-iviapoapoe, moru, erawa, unura, terevaideḡa, mae-ḡaeḡae ma opa. ²³ Wei kauai apoapoei anatapui oranei e opuopu ma rava e vimiramirai.”

* **7:10:** Exo 20:12; Exo 21:17

* **7:15-16:** Giruma ḡelau Mark uranei i girugirumia wei riwai wenanare e mamae, “Mepa da taniḡami e mamae, ona rautaniḡana.”

Jentail wavine, † Iesu i vitumaḡaneī
(*Matthew 15:21-28*)

²⁴ Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa. ²⁵⁻²⁶ Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoena ita viopuni. ²⁷ Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.” †

²⁸ Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoḡina, kepakepa au gabaurina e rauraua e aniani.”

²⁹ Ma Iesu wei i riwei i pa, “U paribelana kaua, aubaina ma nae au numa. Arua-apoapoena natum i opu-tawanei.”

³⁰ Ma wavine i naeme au numa. Natuna wavinena i 'nanai i matamatave, arua-apoapoena boiboḡi tevera i opu-tawanei.

Iesu, oroto taniḡa-potapotana ma mena birebirena i vilawani

³¹ Iesu Taia ma Sidon ana parata i netawanei ma au babaḡela Dekapolis i verautuini ma i nae au Galili topana. ³² Orototaniḡana potapotana ma menana birebirena i neiai Iesu awarina ma i vibaḡai da urana au inina ita terei da ita vilawani. ³³ Iesu, oroto i taravaina-opunei da tau i ava ma ura-gigina, oroto au taniḡana i terei ma ura-gigina ḡelauna i ovai ma menana i vodadani. ³⁴ Nuanuana i bolai ma i ḡoutata au mara; i lavutu tawanana ma oroto i riwei i pa, “*Ephatha!*” Wei anona, “Ma wanatawanei!” ³⁵ Maratagogi taniḡana i wanatawanei ma menana i vidagudagu ma i babani kaua. ³⁶ Ma Iesu, tau i viḡaei da aiwai i tuputupua, avena rava ita vieḡei. Iesu, rava i viḡaei; wate tau i eḡa ita rautaniḡana ma riwa i vituai. ³⁷ Ma maranai ravai wei i nonori, tau i bana-kauei ma i riwa i pa, “Aiwai anata-pui i kauana-kauei. Tauna, rava taniḡa potapotai e vivilawani da e rarautaniḡana ma menabirebirei e bababani.”

8

Iesu, rava 4,000 i viambagibagi
(*Matthew 15:32-39*)

¹ Nai maranai, patara ḡaeḡaena i riana-melei. Patara eḡa ai lam. Ma Iesu, ana tauvotaḡotaḡo i kwatuei da i nei ma

† 7:23: Rava eḡa mai Jew. † 7:27: Riwa roaroa wei au awanaina lamna mai Jew. Tau i e notanotai da tau i ai guratana eḡa me rava ḡelau. Lamna aubaina tau i dobu ḡelau ravai e ḡoreḡorei auou.

i riwei i pa, ² “Au pom tonuḡa patara maiteni a mae ma ai lam eḡa ma a rau-nuapoapoelei. ³ Tauī ḡelauī, uamei i nei. Mepa da ana am-iraḡe ana paritawanei ai au numa, ma au etanai ina raumolaḡau.”

⁴ Ma ana tauvotaḡotaḡo i paribelei i pa, “Wei mutulua ma mepa lam tana vaia da wei patarana tana viambagibagi?”

⁵ Ma Iesu, tauī i paridadanei i pa, “Awarimi palawa biaḡa?”
Tauī i riwa i pa, “seven.”

⁶ Ma Iesu, patara i riwei da au doa i kiala. Ma palawa seven i vaia ma God i viegualaei ma i vogimagimai ma ana tauvotaḡotaḡo i verei da patara i verei. ⁷ Ma tauī awari, iana muomuoi ruāḡa ota. Iesu i vaia; God i viegualaei ma ana tauvotaḡotaḡo i verei da patara i verei. ⁸ Tauī anatapui i am da i am-iaua. Ma lam am tereterenai i tuarui da poa ḡaeḡaei seven i vioai. ⁹ Rava 4,000 i viambagibagi. Ma muriai i paritawanei ai au numa.

Pharisi, God ana mataira i vibaḡei
(*Matthew 15:39–16:4*)

¹⁰ Maratagōgi, Iesu ana tauvotaḡotaḡo maiteni au waga i geru ma i nae Damanuta ana au parata. ¹¹ Pharisi ḡelauī i nei ma viparipariḡai i vikarei Iesu maiteni. Tauī i ḡoei da Iesu ita raudadani da mataira Godei ita viatataiei. ¹² Iesu, Aru-anei i lavutu tawanana ma i riwa i pa, “Wei kimta voui, aiwai aubaina mataira e ḡoeḡoei? A ririwana-kauemi, amapo mataira eḡa ona inanai.”

Iesu, ana tauvotaḡotaḡo I parivainotai

¹³ Anina ma Iesu, patara i netawanei ma ana tauvotaḡotaḡo maiteni au waga i geru me ma i damana Topa Galili au baba ḡelauna. ¹⁴ Ma ana tauvotaḡotaḡo, nuanuai i vuru da ai palawa ita vaia ma palawa tagōgi ava au waga i mamae. ¹⁵ Iesu, tauī I parivainotai i pa, “Pharisi ma Herod ai giu ma ai viararamana morumoruna ona inana-kauē! Lamna me yist.*”

¹⁶ Ma tauī i babani vivira i pa, “Tauta eḡa ata palawa aubaina da e ririweta.”

¹⁷ Ma Iesu i aramanei ma tauī i riwei, “Aiwai aubaina o bababani da taumi awarimi eḡa palawa? Taumi amapo da eḡa ota aramana ma o vivinuanaina? Orami i bado bo? ¹⁸ ☆Matami e mamae ma eḡa ota inainana. Ma taniḡami e mamae ma eḡa ota nonora. Ma o vinuanotanota bo eḡa? ¹⁹ Maranai palawa five a vogimagimai rava 5,000 aubaii, lam am tereterenai o tami da poa biaḡa o vioai?”

Tauī i paribelei, “Twelve.”

* **8:15:** Yist mai Jew awarii awanainēi lamna aiwai da apoapoe, mira bova e vivitua bo e vivimaḡai. Weka Iesu mai Pharisee ma mai Herod ai lawana ma ai giu morumorui e babanēi, da eḡa ina tua. ☆ **8:18:** Mrk 4:12

20 “Ma maranai palawa seven a vogimagimai rava 4,000 aubaii, lam am tereterenai o tami da poa g̃aeḡaei biāḡa o vioai?”
 Tau i paribelei, “Seven.” 21 Ma tau i riwei i pa, “Ma amapo da o vivinuanaina!”

Iesu, oroto mata apoapoena i vilawani au Bethsaida

22 Tau i nei au Bethsaida ma rava ḡelau i, oroto matana apoapoena i nei i Iesu awarina ma i vibaḡa-guratei da ita vodadani. 23 Ma Iesu, oroto matana apoapoena i raunimavoai ma melagaie i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eḡa?”

24 Ma i taepai ma i riwa, “Rava a inainanai ma tau i me ai ita bababara.”

25 Iesu, urana i tere-melei oroto au matana. Ma matana i wanatawanei da aiwai anapuna i 'nana-kauei. 26 Iesu, tauna i paritawanei ana au numa ma i riwei, “Eḡa ma nae au melagai! Wate jijimanina ma nae au numa.”

*Peter i riwa da Iesu, tauna Keriso
 (Matthew 16:13-16; Luke 9:18-20)*

27 Iesu, ana tauvotaḡotaḡo maiteni i nae melagaii Caesarea Philipai au ḡereḡerei. Maranai i nena e ma Iesu, tau i paridadanei, “Rava e ririwa; tau ai ai?”

28 ✨ Ma tau i paribelei, “Ḡelau e ririwa da tam, John Taubabataito. Ma ḡelau i Elijah. Ma ḡelau e ririwa da peroveta wariāḡana tagogi.”

29 Ma Iesu, tau i paridadanei, “Wate taumi, mena o notanota-nei? O ririwa da tau ai ai?”

Peter i paribelei, “Tam God ana *Messiah* - anona Keriso.”

30 Iesu, tau i viḡaei da eḡa ai ai ina riwei da tauna ai ai.

*Iesu ana iraḡe ma ana vomairi me i babaniei
 (Matthew 16:21-23; Luke 9:21)*

31 Ma Iesu i raukarei da ana tauvotaḡotaḡo i giuni i pa, “Rava Natuna ina vinuapoapoe kaua. Ma dogadogara, piri si babadai ma tarawatu babadai, tauna ina pari-geduaie i ma ina viraḡeni. Ma au pom tonuḡa au murina ina vomairi me.” 32 Iesu jijimaninei wei kauai i babaniei ma lamna aubaina Peter, tauna i taravaini au ririva ma enana i vikarei. 33 Wate Iesu i mae-tavirei ma ana tauvotaḡotaḡo i 'nanai. Ma Peter i eni, i pa, “Satan ma nae au muriu! Tam am nota eḡa Godei ita nenei, eḡa da ravei.”

*Iesu votaḡotaḡona anona
 (Matthew 16:24-28; Luke 9:23-27)*

³⁴ Ma Iesu, patara ma ana tauvotaḡotaḡo i raukwatuei ma i riwei, “Mepa da aiai ita votaḡotaḡoiu. Tauna ina bovia-na-melei ma ana korosi ina avarai ma ina votaḡotaḡoiu.† ³⁵ Aiai ana lawana e tatajjini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelai. ³⁶ Ana aii bo anona aiwai, mepa da wei dobuna lawanana ma vigulauna ma vaipai ma am lawana maema-nonoana ma vine-boai. ³⁷ Wate aiwaiei am lawana ma gimara-melei. ³⁸ Mepa da aiai: tau ma au viararamana ina vinimalei; ma i mae-puputeu; ma ana ḡoanei kaua apoapoe ina kaukauei. Rava Natuna, tauna ina vinimalei maranaina ina nememei; Amana ana au boruma anela vivivirei maiteni.”

9

¹ Ma Iesu, wenanare i riwei, “Taumi a ririwana-kauemi; rava ḡelaumi weka o maimairi amapo eḡa ona iraḡe da God ana vigulau ona inana ana rewapanana ina nei.”

Iesu inanana i virai
(*Matthew 17:1-13; Luke 9:28-36*)

² Au pom six muriai, Iesu, Peter, James ma John i taravaini. Ma tau i ava i ḡae ola ḡaeḡaena au tepana. Ma kampa tau i matai, Iesu inanana i virai. ³ Ana gara i arapora ma gamrina i vimata-kamokamota; eḡa me aiwai ḡelauna au dobu nanare. ⁴ Ma kampa au matai, Elijah ma Moses i eḡa. Ma Iesu maiteni i bababani. ⁵ Ma Peter Iesu i riwei, “Tauviararamana, i aii da tauta weka. Ma vianinelai da numakweta tonuḡa ana voai: tagogi tam aubaim, ḡelauna Moses ma ḡelauna Elijah aubaina!” ⁶ Ma tau i rovo kaua ma Peter eḡa ita aramanei da aiwai i latolatonu.

⁷ ☆Anina ma apau i eḡa ma tau i purui. Ma pona apauei i opu ma i riwa i pa, “Wei Tau Natu au nuavainana, ona rautaniḡane!” ⁸ Maratagogi tau i 'nana viravira ma eḡa aiai ḡelauna ita inana ma Iesu, tauna ava.

⁹ Ma maranai olei i ḡaiḡairai ma Iesu, tau i viḡaei da aiwai i 'nananaia eḡa ina vieḡai da au naona Rava Natuna iraḡelei ina vomairi me.

¹⁰ Ma tau i, wei riwana i voteletelei ma i babani vivira i pa, “Iraḡelei vomairi me anona aiwai?” ¹¹ Ma tau i, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”*

† **8:34:** Wei lamna awanaina. Anona lamna Iesu ana tauvotaḡotaḡo anina vinimala ma apoapoei ina nelaḡai aubaina tau i, tauna i votaḡotaḡoi. Tauna eḡa ita ririwa da ana tauvotaḡotaḡo au korosi ina iraḡe me tauna. ☆ **9:7:** Mrk 1:11

* **9:11:** Mai Jew i vitumaḡana da Elijah au naona ina nememei ma Keriso muriai ita nei. (Mal 3:1, 4:5-6). Ma tau i eḡa ita notai da Elijah rau-iviapoapoe ina nelaḡai ana au nememei.

¹² Iesu i paribelei, “Riwa kaua Elijah au naona ina nei da aiwai anapuna ina vokaukauei. Aubaina wariağa i girumi da Rava Natuna ina vinuapoapoe kaua ma ina inana-geduaiei. ¹³ Wate a ririwana-kauemi da Elijah anina i nei ma rava, ai ęoanei tauna i rau-iviapoapoelei me i girugirumia nanare.”†

*Iesu, arua-apoapoena tevera orotona awarina i viopuni
(Matthew 17:14-21; Luke 9:37-43a)*

¹⁴ Iesu ana tauvotaęotaęo tonuęa maiteni olei i ęaira memei ai rava awari ma patara ęaęaena, tau i garięuruvi. Ma Jew ai tarawatu babadai, tau maiteni i vivitarapiri. ¹⁵ Maranai patara, Iesu i 'nanai. Tau orai i auepai ma awarina i ruba ma i viegualaei. ¹⁶ Iesu, tau i vitara-virevirei, “Aiwai o vitarapiriei?”

¹⁷ Orototagogi patara au poui i paribelana, “Tauviararamana, arua-apoapoena natu orotona au orana e mamae ma i kauei da eęa ita bababani, lamna aubaina a neiai awarim. ¹⁸ Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ęirięiriei; ma inina e badobado. Am tauvotaęotaęo a vibaęai da arua-apoapoena ita viopuni, wate eęa tagotagogina da ita kauei.”

¹⁹ Ma Iesu i paribelei, “Oo mara aiwai ona vitumaęana! Ta mae ęaęa ma ami vita ana 'vara ęaęalei? Tevera awariu ona neiai!”

²⁰ Ma tevera i neiai Iesu awarina. Ma maranai arua-apoapoena, Iesu i 'nanai, maratagogi tevera i viaikwajiana-guratei da au doa i tonei ma i vitatauvira ma i vivipuropuro. ²¹ Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai. ²² Arua-apoapoena mara au anapuna, tauna ai au araratana ma au waira e tawatawanei ma i ęoei da ita viraęeni. Mepa da tam tagotagogina; ma raunu'apoapoelelai ma ma voaęui!”

²³ Iesu, tauna i riwei, “Menanare da u riwa, ‘Mepa da tam tagotagogina?’ Aiai ravana e vivitumaęana, God anapuna ina kauei tauna aubaina.”

²⁴ Maratagogi tevera amana i garara, “A vitumaęana, wate au tumaęana eęa ita rata ma ma voaęui da ina rata!”

²⁵ Iesu i 'nana da patara i rierieiai awarii ma lamna aubaina arua-apoapoena i egari i pa, “Tam arua tanięa-potapotana ma gungum. Tau a egaęarim da tevera ma opu-tawanei. Ma eęa melanai au orana ma rui me!”

²⁶ Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maęamaęai

† 9:13: Iesu lamna John Taubabataito i bababaniei da tauna Elijah (Mat 11:13-14, 17:10-13)

kampa i riwa, “Tauna i’raḡe!” ²⁷ Ma Iesu, tauna urana i vojijini ma i sinaepai da i mairi.

²⁸ Muriai Iesu, ana tauvotaḡotaḡo maiteni i rui au numa. Ma maranai tau i ava ma i paridadanei i pa, “Aiwai aubaina tauai eḡa tagotagogina da arua-apoapoena ata viopuni?”

²⁹ Iesu, i riwa, “Arua-apoapoei me wenanare, pari ainelana ina viopuni.”

*Iesu ana iraḡe i babaniana-melei
(Matthew 17:22-23; Luke 9:43b-45)*

³⁰ Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita ḡoei da rava ita aramanei da tau i mepa. ³¹ Aubaina tauna, ana tauvotaḡotaḡo i viararamani i pa, “Tau i Rava Natuna ina amverenei rava ḡelau i au urai. Ma tau i ina viragēni. Wate au pom tonuḡa au murina ina vomairi me.”

³² Wate tau i eḡa ita aramanei tauna aiwai i bababaniei. Ma pari-dadanana i rovoei.

*Tauvotaḡotaḡo i vitarapiri vivira da aiai i ḡetelara
(Matthew 18:1-5; Luke 9:46-48)*

³³ Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, tau i vitara-virevirei, “Au etanai aiwai O vitarapiriei?”

³⁴ Wate tau i genuana, aubaina au etanai tau i vitarapiri vivira da aiai i ḡetelara. ³⁵ ✨Iesu i kiala ma Apasol 12 i raukwatuei awarina ma i riwei i pa, “Aiai e ḡoeḡoe da ina vibada. Tauna ina tereḡairana-melei ma ina vimuri dewadewa ma ina vitaunola rava aubai.”

³⁶ Ma Iesu, tevera i vaia ma au poui i vimairini. Ma urana au jiḡona i tere-taḡonei. Ma tau i riwei i pa, ³⁷ “Aiai ravana; tau wavau ei, tevera wenanare i rauḡorei. Lamna tau maiteni e rarauḡoreiu. Ma aiai da tau e rarauḡoreiu. Lamna taupar-itawaneu maiteni e rarauḡorei.”

*Aiai eḡa ata ḡavia, lamna turata
(Luke 9:49-50)*

³⁸ Anina ma John, Iesu i riwei, “Tauviararamana! Tauai, oroto tagogi a inamai; tam wavamei arua-apoapoena i viviopuni ma tauna eḡa turata. Lamna aubaina a viḡaei da eḡa ina kauana-melei.”

³⁹ Iesu i riwa, “Eḡa ona viḡaei! Eḡa aiai au wavau kaua babai ina kau ei ma muriai ina parivai-apoapoeniu. ⁴⁰ Aiai ravana eḡa ata ḡavia; lamna turata. ⁴¹ Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaḡotaḡo. Tau i ai maia eḡa ina vine-boai.”

*Rauelara babanina**(Matthew 18:6-9; Luke 17:1-2)*

⁴² Aiai ravana i kauēi da wei teverana ana tumaḡana Tau awariu i viapoapoeni da ḡo'apoapoe i kauēi. Lamna i ai da ḡaima ḡaeḡaena ravana au uatabana ina duri ma au boga ina tawaneī aubaina God, tauna ina kovoḡa-guratei. ⁴³⁻⁴⁴ Mepa da nimam i kauem da ḡo'apoapoe u kauēi. Ma bori-tawaneī! I aii da nimam tagogiava ma lawana mamae-nonoana ma vaia. Ma eḡa ma kauēi da nimam ruaḡa aiaii ma ma nae ai au menamenana; mepa ai eḡa melanai ita bobo.† ⁴⁵⁻⁴⁶ Mepa da aem i kauem da ḡo'apoapoeni u kauēi. Ma bori-tawaneī! I aii da sigesigem au lawana mamae-nonoana ma rui. Eḡa me aem ruaḡa aiaii ma ai au menamenana ina tawanem. § ⁴⁷ Ma mepa da matam ina kauem da ḡo'apoapoeni u kauēi. Ma vaitawaneī! I aii da matam tagogi ma God ana vigulau ma rui. Eḡa me matam ruaḡa ma ai au menamenana ina tawanem; ⁴⁸ dobuna mota-motana eḡa ita irairāḡe ma ai eḡa ita bobo.

⁴⁹ Au Tauvotaḡotaḡo anataputapui, ai ararataneī ina bogai.

⁵⁰ “Nia i ai lam viaiainana aubaina. Ma mepa da i tomatoma, mena ma vidagiānei. Nia au orami ina mae ma ona viturana vivira!”

10*Iesu, tavine vilamonana i babaniei*

¹ Ma Iesu, dobuna i netawaneī ma i nae Judea ana paratana. Ma Waira Jordan i damani da au baba ḡelauna. Patara ḡaeḡaena i riana-melei. Ma Iesu i viararamana, me mara patapatana i kaukauēi nanare.

² Ma Pharisi ḡelau i ḡoei da tauna ita waroi. Ma lamna aubaina i vitara-virevirei, “Tarawatu e mamae bo eḡa da rava, awana maiteni ita vilamonei?”

³ Ma Iesu i paribelei, “Moses ana Tarawatu aiwai e ririwei?”

⁴ Ma tauī i riwa, “Moses ana Tarawatu e ririwa da oroto vilamona pepana ina girumi ma awana ina verei. Ma tauī ina vilamonei.”

⁵ Iesu i paribelei, “Taumi orami i bada. Au baina Moses wei Tarawatuna i terei. ⁶ ✱Wate ona notai da au karena, maranai God rava i kauēi ma tauna oroto ma wavine i kauēi. ⁷ ✱Ma lamna aubaina oroto amana ma alona ina netawaneī ⁸ ma awana maiteni ina vitagogi da tauī eḡa ruaḡa me au naona ma tupua tagogi.

⁹ God aiwai i vitagogiei, eḡa aiai ina vilamonei.”

¹⁰ Maranai tauī i naeme au numa, ma tauvotaḡotaḡo, Iesu i vitara-virevirei wei kauai aubaii. ¹¹ Iesu i paribelei, “Mepa da

† **9:43-44:** Wariāḡa nimaiei i giruma damanei tauī riwana tagogina me vs 48.

§ **9:45-46:** Wariāḡa nimaiei i giruma damanei tauī riwana tagogina me vs 48.

✱ **10:6:** Gen 1:27 ✱ **10:7:** Gen 2:24

oroto, awana i voterei. Ma wavine ġelauna i ravaġi. Lamna tauna, awana awarina i rauviapoapoe. ¹² Ma nanarena mepa da wavine, awana i voterei ma oroto ġelauna i ravaġi. Lamna awana, awarina i rauviapoapoe.”

Iesu, roaroa i viaiaini

¹³ Rava ġelau, roaroa i neiai Iesu awarina da urana au tepai ita terei. Ma ana tauvotaġotaġo, ravai i viġaei. ¹⁴ Maranai Iesu wei kauai i 'nanai. Ma ana tauvotaġotaġo i eni ma i riwa, “Roaroa ona voterei da awariu ina nei. Ma eġa ona viġaei. Au baina God ana vigulau, lamna rava wenanare aubai me wei roaroai. ¹⁵ A ririwana-kauemi. Aiai, God ana vigulau eġa ina vaia me tevera aburuna nanare. Tauna, eġa God ana au vigulau ina rui.” ¹⁶ Ma roaroa i taravaini ma i rapai, urana au tepai i terei, i raupari ma i viaiaini.

Purapura ravana

(Matthew 19:16-30; Luke 18:18-30)

¹⁷ Ma maranai Iesu i vomairi da i nena. Oroti i ruba ġeta ma au naona i raudune ma i riwa i pa, “Taugiu vinualaulaunam. Aiwai ana kauei da lawana maemae-nonoana ana vibuderiei?”

¹⁸ Ma Iesu i paribelei i pa, “Aiwai aubaina, tau u vikaua vinualaulauneu? God, tauna ava vinualaulaunana. ¹⁹ *Tam, God ana Tarawatu u aramanei, *Eġa ma viraġena! Eġa ma awadanene! Eġa ma danene! Eġa ma viwavu-moru! Eġa ma amkwalakwala! Amam ma Alom ma vivirei!*”

²⁰ Ma tauna i riwei, “Taugiu! Maranai tau aburueu da amadodo, wei tarawatui anatapui a voteletelei.”

²¹ Iesu, tauna i 'nanai ma i vinuavainei ma i riwei, “Kaua tagogi e mamae eġa uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaiem. Ma ma nei ma ma votaġotaġoiu!”

²² Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

²³ Iesu i 'nana viravira ma ana tauvotaġotaġo awari i riwa, “I piripiri kaua da purapura ravana, God ana au vigulau ina rui.”

²⁴ Tauvotaġotaġo riwana i baiei maranai Iesu wenanare i babani. Ma Iesu i riwa me, “Natunatu! I piripiri kaua da purapura ravana, * God ana au vigulau ina rui. ²⁵ I telatela kaua da ġamoġamo ġaeġaena wavana kamel, iġoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei.”

* **10:19:** Exo 20:13; Exo 20:14; Exo 20:15; Exo 20:16; Exo 20:12 * **10:24:** Wei riwana buka ġelau awarii e mamae ma ġelau eġa purapura ravana.

26 Tau i vinuanaina ma ai nota i kwa. Ma tau i ava i babani vivira i pa, “Mepa da nanare; amapo aiai lawana mamae-nonoana ina vaia?”†

27 Iesu awarii i ’nana ma i riwei, “Rava awarii wei kauai i piripiri. Wate eġa God awarina. God awarina aiwai anata-puna i telatela kaua.”

28 Ma Peter i riwei, “Ma tauai menanare? Tauai ai purapura a voterei ma tam a votaġoim.”‡

29 Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votaġotaġoiu; tau ma Riwana Aiaina aubaina. 30 Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anata-pui ina maġa. Rava ina rau-iviapoapoelem; aubaina tam, tau au Tauvotaġotaġo da mara au murina tauna lawana mamae-nonoana ina vaia. 31 Wate maġamaġai marina e vivinao; tau i ina vimuri. Ma maġamaġai da e vivimuri; ina vinoa.”

Iesu ana iraġe babanina i vitonui

(Matthew 20:17-19; Luke 18:31-33)

32 Iesu, ana tauvotaġotaġo maiteni i ġeġae au Jerusalem. Iesu, tau i au naoi i nena. Tauvotaġotaġo i baie. Ma rava ġelau i au muri i nenei i rovo kaua.§ Ma tau i 12 i rauġorei au ririva ma i raukarei da kaua amapo da awarina ina tupua; tau i vieġei 33 I pa, “Ona inana, tauta ta ġeġae au Jerusalem. Ma Rava Natuna ina verenei pirisi babadai; ma tarawatu babadai awarii. Ma tau i ana iraġe ina vianinei. Ma Mai Jentail ina verei. 34 Ma tauna ina vijiboġi ma ina ovai ma ina kwapui ma ina viraġeni. Au pom vitonuina ina vomairi me.”

James ma John ai vibaġa

(Matthew 20:20-28)

35 - Zebedi natunatuna James ma John i nei Iesu awarina ma i vibaġai i pa, “Tauviararamana! Tauai ai ġoana a vivibaġei uta kauai.”

36 Iesu i riwa i pa, “Aiwai o ġoeġoei ana kauai aubaimi?”

37 Tau i paribelana, “Ma verelai da ana kiala, tagogi au oiem ma ġelauna au kelakelaum am au vigilau.”

† 10:26: Mai Jew i notai da rava vipurapurai lamna BADA ana verena ana nuavaina matairana, tau i e notai da BADA, rava vipurapurai eġa ina gagaloei, tauna ravai ġelau i maiteni eġa ina gagaloei. ‡ 10:28: Peter i ġoei da ita aramanei da tauvotaġotaġo ai au iraġe maiana aiwai, ina vaia. § 10:32: Iesu i ġeġae au Jerusalem ma rava maġamaġai i viġaviei ma lamna aubaina ana tauvotaġotaġo i baie da tauna tepana i tora da weka i nena. Rava ġelau i votaġotaġo, tau i rovo kaua da aiwai awarina ina tupua maranai i ġeta au Jerusalem.

38 Iesu i paribelei, “Taumi eġa ota aramanei aiwai o vivibaġei! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoui?”*

39 I paribelei, “Tauai tagotagogina!”

Iesu i riwei, “Iniviara kelakana anina ona umai ma ona iraġe me tau ana iraġe. 40 Wate tau au rewapana eġa ita mamae da ana veremi da mepa ona kiala au oieu bo au kelakelau. God, rava i vinevinei; tau i ai gabu i vokaukauei.”

41 Maranai Tauvotaġotaġo 10 ġelau, wei riwana i nonori. Tau James ma John awarii i ġaiawa. 42 Ma Iesu, tau anatapu i ġorei da awarina ma i riwei, “O aramanei da jentail ai babada, dobu ġela ravai jentail awarii e mamae-ġaeġae ma e rarau-iviapopoelei. Wate tau i ai babada ġaeġae, ai rewapana i ġetelera da ai rava e vibadebadei da ai ġoana e kaukauei. 43 ☆Wate au tauvotaġotaġo eġa nanare. Eġa da aiai i ġoei da ina ġetelara taumi au poumi; tauna anina da ina vitaunola. 44 Aiai i ġoei da ita vinao. Tauna ina vitaunola rava anatapu i aubai. 45 Ma nanare Rava Natuna eġa ita nei da tauna, tana nolei. Wate ita vitaunola rava aubai. Ma ana lawana ita verenei da rava maġamaġau i ai lawana ita gimara-melei.”†

*Iesu, rava mata-potapotana Batimeus i vilawani
(Luke 18:35-43)*

46 Ma tau i ġeta au Jeriko. Iesu, ana tauvotaġotaġo, patara ġaeġaena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viamgigimana. 47 Maranai i nonori da tauna, Iesu Nasaretei; garara i raukarei i pa, “Iesu, tam David natuna! Ma raunu’apoapoeleu!”‡

48 Rava maġamaġau, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapoeleu!”

49 Iesu i tumairi ma i pa, “Ona ġoreiai!”

Anina tau, mata-potapotana i ġoreiai i pa, “Tepam ina tora ma ma vomairi! E ġoreġorem!”

50 Tauna, ana puru i tawanei ma i vomairi laġilaġina ma i nei Iesu awarina.

51 Iesu i paridadana i pa, “Aiwai u ġoei ana kauei aubaim?”

* **10:38:** ...babataito me tau ina babataitoui tau iniviara ma iraġe e bababaniei, maranai Iesu au Gethsemani i raraupari muriai da ana iraġe tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelaġai.

☆ **10:43:** Mrk 9:35 † **10:45:** Iesu i vinuapoapoe ma iraġe aubaita me Isaiah i girugirumia nanare au Isa 52:13-53:12. ‡ **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariaġa nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24)

Mata-potapotana i paribelei, “Tauviararamana! A ġoei da ana inana me.”

⁵² Iesu i riwa, “Ma nael! Am tumaġana i vilawanim.” Maratagogi tauna i 'nana me ma Iesu au eta i votaġotaġoi.

11

Iesu i rui au Jerusalem

(*Matthew 21:1-11; Luke 19:28-40; John 12:12-19*)

¹ Ma maranai Jerusalem i tuġereġerei ma i rui au Betphagi ma Bethani* au ola *Olives*. Ma ana tauvotaġotaġo ruaġa i paritawanei, ² ma i riwei i pa, “Ona nae au melagai au naomi. Maranai o ruirui, kampa *donki* natuna ġaubo, raġiraġitana ona nelaġai. Tauna eġa aiai ita geru-dadanei. Ona rupeni ma ona neiai.† ³ Mepa da aiai ina paridadana, ‘Aiwai aubaina wei o kaukauei?’ Ona riwei, ‘BADA e ġoeġoei ma maratagogi ina paritawana-melei.”

⁴ Ma i nae ma *donki* ġaubona au doa au metaeta raġiraġitana i rupeni. ⁵ Rava ġelau i kampa i maimairi i paridadana i pa, “Aiwai o kaukauei *donki* ġaubona o ruperupeni?”

⁶ Ma i paribelei me Iesu i ririweia nanare ma tau i voterei da i nae. ⁷ Tauri *donki* i neiai Iesu awarina ma ai puru au uporana i tawana-epai ma au tepana Iesu i kiala. ⁸ Ma rava maġamaġau, ai puru au eta i ebani ma ġelau, ai rugurugu i taratarai i ebani. ⁹ Tauri i vivinao ma tau i muri i nenei i garara:

“Hosanna!”‡

“Viviaiainana tauna BADA au wavana e nenei!”

¹⁰ “Viviaiainana amata David ana viġulau e nenei!”

“*Hosanna* au aidamo telarana!”

¹¹ Iesu i ġeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, tauri 12 maiteni.

Iesu, damala aina i parivai-irairaġeni

(*Matthew 21:18-19*)

¹² Ma marana i tom, tauri Bethani i opu-tawanei ma Iesu amiraġe. ¹³ Au weia ma damala aina i 'nanai ana ruguruguna. Ma i nae da ita inanai da i ua bo eġa. Maranai kampa i ġeta, eġa aiwai ita nelaġai. Anina ai ruguruguna ava, aubaina eġa damala ana mara. ¹⁴ Iesu, damala aina i riwei i pa, “Eġa aiai amadodo ma amapo anom ina am-melei!” Ma ana tauvotaġotaġo i nonori aiwai i latoni.

* **11:1:** Eng. Bethphage & Bethani. † **11:2:** Mai Jew awari, donki lamna nola aubaina ma eġa gulau ana anigeru. Donki i gerui lamna e ririweta da tauna gulau ana nuaubana ma vilamolamonana i nei. ‡ **11:9:** Lamna pona Aram anona ma vilawaniai ma muriai lamna vieġulau ma vimae-ġaeġaena aubaina.

*Iesu, taugimara tempolei i viaḡaḡana-opunei
(Matthew 21:12-17; Luke 19:45-48; John 2:13-22)*

¹⁵ Maranai tau i ḡeta au Jerusalem, Iesu i rui Tempol garina au orana ma taugimara i viaḡaḡana-opunei, mane tauviraina[§] ai kepakepa ma gabubu taugimareina ai anikiala i vitauvirai. ¹⁶ Ma i viḡaei da eḡa aiai ana gimara Tempol au orana ita avarainaiei. ¹⁷ ☆ Ma rava i viararamani i pa, “I girugirumia nanare, ‘Au numa ina ḡorei pari numana dam anatapui au dobu aubaii.’

Wate taumi o vovirai da kwalakwalai ai guba.”*

¹⁸ Pirisi Babadai ma tarawatu Babadai i nonori ma i ogei da ita viraḡeni. Tau, Iesu i roveoi aubaina patara ana viararamana i baiei.

¹⁹ Ma au bigai Iesu ana rava, Jerusalem i opu-tawanei.

*Damala aina i poi
(Matthew 21:20-22)*

²⁰ Ma ubaubanai tau i nene ma damala aina i ‘nanai anatapuna i poi. ²¹ Peter i notai ma i riwa “Tauviararamana ma inana! Damala aina u parivai-irairaḡenia i poi.”

²² Iesu i paribelei, “God ona vitumaḡanei! ²³ A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuanuana eḡa ina raḡaraḡa ma ina vitumaḡana da aiwai e ririweia, ina tupua. ²⁴ Lamna aubaina a ririwemi. Aiwai ami au pari o vibaḡei, ona vitumaḡana da taumi boiboḡi o vaia ma ina viḡarimiei. ²⁵ Ma maranai e raraupari, au naona rava anatapui ai ḡo’apoapoe awarim ma nota-tawanei. Ma nanare amam au mara am ḡo’apoapoe ina nota-tawanei.”†

*Jew babadai, Iesu ana vibadana i vitarapiriei
(Matthew 21:23-27; Luke 20:1-8)*

²⁷ Tau i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina. ²⁸ Ma i paridadanei i pa, “Aiwai vibadanei wei kauai e kaukauei? Aiai vibadana i verem da wei kauai uta kauei?”

²⁹ Iesu i paribelei i pa, “Au vitaraviravira tagogi ana terei ma ona paribeleu. Ma ana riwemi; aiwai vibadanei wei kauai

§ 11:15: Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ḡelau i virai da Tempol mane wei lamna Jew tarawatu i vianinei gimara au Tempol aubaina (Exo 30.13). ☆ **11:17:** Isa 56:7 * **11:17:** Iesu dobuḡela manena tauviraina ma gimara ravai i viwavui da tau pari numana i vovirai da amkwalakwalai ai guba, tau rava ai arua nolana e viviapoapoeni Jer 7:11-15. † **11:25:** Riwa wadubo nonoana uraiei i girugirumia vs 26 weka eḡa ita mamae, Mepa da rava ai apoapoei eḡa ma nota-tawanei, amam au mara nanare am apoapoei eḡa ina nota-tawanei.

a kaukauei. ³⁰ Aiai, John taubabataito vibadana i verei da rava ita babataitoi, God bo rava? Ona riweu!”

³¹ Tau i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina eġa ota vitumaġanei?’ ³² Wate eġa tana riwa da, ‘Ravei.” Tau i rava i rovoei, aubaina rava anata-pui, ai nota da John anina peroveta. ³³ Ma i paribelei, “Tauai eġa ata aramanei.” Iesu i riwa, “Tau nanare eġa ana riwemi aiwai vibadanei wei kauai a kaukauei.”

12

Tauipi ai awanaina

(Matthew 21:33-46; Luke 20:9-19)

¹ *Iesu i vikarei ma awanainei awari i babani i pa, “Mara tagogi oroto, ana wapu i kauai ma grape i paewi* ma i gari ma grape anigudana ma violaġa numana i voai. Ma tauipi ġelau i verei da ita nolei tau i anata-pui aubai. Ma i vaġai au dobu ġela. ² Tuaruta ana mara i ġetai ma taniwaga, ana taunola i paritawanei tauipi awarii da ana ġuta ita vaia. ³ Wate tauipi, tauna i vojijini ma i kwapui ma kwakwavina i paritawanei. ⁴ Ma taniwaga, taunola ġelauna i paritawanei. Ma tau i, kolana i viaibauni ma i vitepaubaubai. ⁵ Ma taunola ġelauna i paritawanei ma tauna i viraġeni ma i maġa ġelau i paritawanei, ġelau i kwapui ma ġelau i viraġeni. ⁶ Ma tagogi ava e mamae da ina paritawanei. Lamna natuna orotona tagotago ana nu-avainana. Ma tauna au murioina i paritawanei ma i pa, ‘Tau i, natu ina vivirei.’ ⁷ Wate tau i, tauna i nanai ma i riwa vivira i pa, ‘Wei taniwaga natuna. Ona nei, tana viraġeni ma ana buderi ina viġaritaiei!’ ⁸ Ma i vunui ma i viraġeni ma tupuana wapuei i tawanana-opunei.

⁹ —Wapu taniwagana marina aiwai ina kauai tau i awarii? Tauna ina nei ma tauipi ina viraġeni ma grape wapuna ina veredamanei tauipi ġelau awari. ¹⁰ Wei girumana o iavi bo eġa?

*‘Wei ġaimana, tauvoa i geduaiei,
wate muriai i nelaġai da tauna ġaima kaua.*

¹¹ *Wei lamna, BADA ana kaua
ma inanana i vinualaulauna.”* (Psalm 118:22-23)

¹² Jew babadai i aramanei da awanaina lamna tau i bababaniei ma i ġoei da ita pani. Wate tau i patara i rovoei, lamna aubaina Iesu i voterei ma i nae.

*Caesar awarina tax tana terei bo eġa?
(Matthew 22:15-22; Luke 20:20-26)*

☆ **12:1:** Isa 5:1-2 * **12:1:** Parivainota wadubona, God au anata-puna Israel e bababaniei me tauna ana grape wapuna, me Isa 5:1-2.

13 Ma Pharisi ḡelau i ma Herod ana rava ḡelau i nae Iesu awarina da riwei ita waroi. 14 Taui i nei ma i riwa, “Tauviararamana, tauai aramanei da tam rava jijjimanim. Ma rava wavai naenaeni ma rava labalababa eḡa uta vibainaenaeni ma anatapu i e vaivaia da tagogi. Wate tam God ana babani riwa kau e viararamani. Ma riwelai tax tana terei Rome gulauna wavana Caesar† awarina, i aii bo eḡa?”

15 Wate Iesu, ai moru i 'nana-bauni ma i riwei, “Aiwai aubaina o raudadani? Mani tagogi ona nei ai da ana inanai!”

16 Denarius tagogi i nei ai Iesu awarina ma tau i vitara-virevirei, “Wei ai ai aruana ma wavana?”

I paribelei, “Caesar.”

17 Iesu i riwa, “Aiwai Caesar ḡarinei, Caesar ona verei. Ma aiwai God ḡarinei, God ona verei!” Ma tau i baiei.

Sadusi ḡelau, Iesu i vitara-virevirei irairagelei vomairina aubaina

(Matthew 22:23-33; Luke 20:27-40)

18 ✧ Mai Sadusi ai vitumaḡana da rava eḡa ita vovomairi-me maranai e irairage.† Anina ma ḡelau i nei Iesu awarina ma i paridadanei, 19 “Tauviararamana! God ana tarawatu, Moses wenanare i girumi: Mepa da oroto i'rage ma kaiababana i netawanei ma eḡa natunatu. Orotu vareina kaiababana ina ravaḡi ma roaroa ina ḡuni vareina aubaina. 20 Mara tagogi varevarei seven i mae. Ma natuevou i tavine ma eḡa natunatu ma oroto i'rage. 21 Vareina viruaina kaiababa i ravaḡi ma tauna maiteni eḡa natuna ma i'rage. Ma nanare vareina vitonuina. 22 Ma nanare anatapu i seven, wavinena i ravaḡi ma eḡa natunatu. Au muriai wavine i'rage. 23 Anatapu i seven, wavinena i ravaḡi. Vomairi me au marana, lamna ai ai awana?”

24 Iesu, tau i riwei, “Aiwai Moses i girumi ma God ana rewapana eḡa ota aramanei. 25 Maranai tau iragelei ina vomairi, tau eḡa ina tavine bo ina vitavinei. Wate ina mae me anela au mara. 26 ✧ Ma rava iragelei ai vomairi babanina, Moses ana tarawatu eḡa ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God.* 27 Tauna eḡa rava irairagei ai God, wate rava lawalawai ai God. Taumi o moru kau!§”

† 12:14: Sisa. ✧ 12:18: Act 23:8 † 12:18: Sadusi tau gulagula ma rava gaeḡaei mai Jew ai giu babadai tau maiteni eḡa ita vitumaḡana da anela bo arua ḡelau e mamae ma buka 5 i vinoa, Moses i girugirumia, tau lamna ava e vivitumaḡanei (Karena, Exodus, Leviticus, Numbers, Deuteronomy). Ma eḡa buka ḡelau. Wate Moses ma BADA riwaiei tau i viatataiei da lawana e mamae irage au murina. ✧ 12:26: Exo 3:6 § 12:27: ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, tau lawalawai maranai BADA, Moses awarina i babani.

*Tarawatu ġeġetelarana**(Matthew 22:34-40; Luke 10:25-28)*

²⁸ Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua, lamna aubaina tauna i vitara-viravira, “God ana tarawatu metauna i ġetelara?”

²⁹ ✧ Iesu i paribelei, “Ġeġetelarana tagogi lamna wei: *Ona rautaniġana Israel! BADA ata God, tauna ava BADA.* ³⁰ BADA ami God nuanuami ina vaia orami anatapunei ma aruami anatapunei ma ami nota anatapunei ma ami rewapana anatapunei! ³¹ ✧ Ma viruaina lamna wei: *Rava ġelau nuanuam ina vaia me tam nuanuam e vaivai-melei!* Wei tarawatui ruaġa i ġetelara, eġa me ġelau nanare.”

³² Tarawatu badana i riwa, “Taviararamana u babani kaua! Riwa kaua u babaniei, BADA Tauna ava God ma eġa mepa ġelauna. ³³ Ma nuanuami ina vaia orami anatapunei ma ami nota anatapunei ma ami rewapana anatapunei. Ma, Rava turam nuanuam ina vaia me tam nuanuam e vaivai-melei. Wei tarawatui ruaġa lamna i ġetelara, eġa me pulo apuapunana bo pulo ġelau.”

³⁴ Iesu i ’nanai da tauna i paribelana kaua ma i riwei, “Tam, God ana vigulau au ġereġerena e ġeġeta.” Ma eġa aiai tepana ita tora da Iesu ita vitara-viravirana-melei.

*Keriso tauna aiai?**(Matthew 22:41-46; Luke 20:41-44)*

³⁵ Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna? ³⁶ ✧ Arua Vivivireina, David nota i verei ma tauna i riwa:

‘MAMAE-NONOANA au gulau i riwei,

Au oieu ma kiala

da am ġavia

au ae karem da ma tuvaidoedoei.’ (Psalm 110:1)

³⁷—David, tauoina wei gulauna i ġorei bada. Ma menanare da badana lamna, David natuna?” Patara ġaġaena riwana i nonori ma i vinuaiai.

*Iesu, Tarawatu Babadai ai kaua i babaniei**(Matthew 23:1-36; Luke 20:45-47)*

³⁸ Ma Iesu, tau i viararamani i pa, “Tarawatu babadai ona rovoei. Ai gara manamanai ma e bababara nae au deba da rava tau i vivivirei. ³⁹ Tau i anikiala vinevinei pari au numana ma au torela, gabu aiaii e vaivaia. ⁴⁰ Tau i, kaika-iababa e morumorui ma ai numa e kwalekwalei, e morumoru ma e raraupari-vai-manamanawa. Tau i ai kovoġa ina apoapoe guratana.”

*Kaiababa ana pulo**(Luke 21:1-4)*

⁴¹ Ma Iesu, pulo aniterenana au baba ḡelauna i kiala ma rava i 'nanaanai mane i tereterei. Rava maḡamaḡau vivimanei, mane maḡamaḡau i terei. ⁴² Wate kaiababa molamolakana i nei ma mane muomuoi ruaḡa i terei, ruvana i aburu kaua. ⁴³ Ana tauvotaḡotaḡo i ḡorei ma i riwei, “Anina a ririwemi, wei kaiababa molamolakana i tere-guratei, eḡa me taui ḡelau. ⁴⁴ Tau i ḡelau ai maurei i verena, wate wei kaiababa molaka ma ḡarinei anapuna i terei, ana anilawana anapuna.”

13*Iesu i riwa da rava God ana Tempol ina rikai**(Matthew 24:1-2; Luke 21:5-6)*

¹ Iesu, Tempol i nene-tawanei ma ana tauvotaḡotaḡo tagogi i riwa, “Tauviararamana! Numa i viḡulau ḡaḡa ma numa ḡaimai i rata ḡaḡa.”

² Iesu i paribelei, “Wei numai ḡaeḡaei u inanai, eḡa ḡaimai tagogi, turana au tepana ina mae. Ḡaima anapui ina rikai.”

Rava ina vinuapoapoe kaua. Iesu ana tauvotaḡotaḡo ina vipatutu

(Matthew 24:3-14; Luke 21:7-19)

³ Iesu i kiakiala au ola *Olives*, Tempol au navanavaḡela ma Peter, James, John ma Andrew i nei ma i vitaraviravirana govaḡei ⁴ i pa, “Ma riwelai mara aiwai wei kauai ina tupua? Ma aiwai ina vimataira da wei kauai anapui ina tupua?”

⁵ Iesu, tau i riwei, “Ona inana kaua da eḡa aiwai ina terevaideḡaimi! ⁶ Rava maḡamaḡau, wavauei ina nei ma ina riwa, ‘Tau Keriso tauvilawana!’ Ma rava maḡamaḡau ina terevaideḡai. ⁷ Ma maranai viḡavia ona nonori ma viḡavia aueia riwana ona nonori; eḡa ona rovo! Wei kauai anina da ina tupua, wate wei eḡa damona. ⁸ Dam, damai ina viḡavia vivira ma dobu, dobuai ina viḡavia vivira. Ma lolo ma gomara dobu au anapuna. Wei kauai, lamna me wavine ana iniviara e vivikarei maranai e vivinatuna.

⁹ —Ona inana kaua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votaḡotaḡoiu. Ma tau awarii, Riwa Aiaina ona raugugulei. ¹⁰ Riwana Aiaina ona raugugulei rava anapui awari ma muriai damona ina nei. ¹¹ Ma maranai i panimi ma i etaremi. Eḡa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eḡa taumi ota babani, wate Arua Vivivireina. ¹² Rava, vareina ina verenei da ina viraḡeni. Ma ama, natunatuna ina verenei da ina viraḡeni. Ma roaroa,

amamai ma aloloi ina viġaviei da ina iraġe. ¹³ Rava anatapui ina geduaiemi tau aubaiu. Wate aiiai da e maimairi-jijina da au damona, tauna ina lawana.”

Iniviarā ġaeġaena ana mara
(*Matthew 24:15-28; Luke 21:20-24*)

¹⁴ “Maranai ‘Kaua apoapoe kaukauana’* e maimairi mepa avena ita mairi. (Buka tauiaavana wei ina aramanei anona aiwai). Taii aiavoi au Judea ina ruba laġilaġina au ola. ¹⁵ Aiiai numa au tepana eġa ina ġaira bo ina rui au numa da aiwai ina vaia. ¹⁶ Aiiai au wapu eġa ina naeme au numa da ana gara ina vaia. ¹⁷ Ma iniviarā ġaeġaena, waivine duaduamai ma taii da e viviġuġu awari nai au marana! ¹⁸ God awarina ona raupari da wei kauai eġa au bodu ina tupua. ¹⁹ ✧Ma nai au marana amapo iniviarā ġaeġaena. Ma maranai God dobu i kauei, iniviarā ġaeġaena eġa nanare ita tupua ma amapo eġa nanare ina tupua me. ²⁰ Wate BADA nai marana ina vitupoi. Mepa da eġa ina vitupoi, rava anatapui ina iraġe. Wate rava, tauna ana vinevine ina vilawani lamna aubaina mara ina vitupoi.

²¹⁻²² —Muriai keriso tauvilawana morumorui ma peroveta morumorui ina nei ma mataira ma kaua babai ina kauei ma ina kauana dadanei da God ana vinevine maiteni ita terevaideġai. Lamna aubaina mepa da aiiai ina riwemi, ‘Ma inanai, Tauvilawana noi!’ bo ‘Tauna noi!’ Nai babanina eġa ona vitumaġanei! ²³ Ona inana kaua; anatapuna a riwana-nonoemi!”

Rava Natuna ana nei
(*Matthew 24:29-31; Luke 21:25-28*)

²⁴ Iesu wenanare i riwa, “Ma iniviarā ġaeġaena au murina.

Madeġa eġa ina rarana

ma nawaravi eġa ina lalai.

(*Isaiah 13:10*)

²⁵ *Ma ubona marei ina peu*

ma rewapanā ġelau i aidamo ina gui.

(*Isaiah 34:4*)

²⁶ ✧—Nai maranaina, *Rava Natuna ana rewapanana ma ana borumana apauei ina nei.* ²⁷ Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu ġela au damona.”

Damala ana awanaina
(*Matthew 24:32-35; Luke 21:29-33*)

²⁸ “Damala aina ana awanaina ona aramanei. Maranai ai e numonumoi, lamna ona aramanei da maura e tuturiiai. ²⁹ Ma nanare, maranai wei kauai anatapui ina tuputupua, ona aramanei da Rava Natuna i turiai; au metaeta i ġetai. ³⁰ Anina a ririwemi da wei kauai au naona ina tupua ma muriai

* **13:14:** Eng. *Abomination of Desolation* Dan 9:27 11:31 & 12:11 ✧ **13:19:** Da 12:1 ✧ **13:26:** Da 7:13

da rava marina lawalawaii ina iraḡe. ³¹ Mara ma dobu ina amoa. Wate riwau eḡa ina amoa.”

Bada ainelana ana nei i aramanei
(Matthew 24:36-44)

³² “Ma eḡa ai ai ita aramanei nai marana bo madeḡa aiwai ina nei. Anela au mara eḡa ita aramanei ma Natuna eḡa ita aramanei. Amana, tauna ava i aramanei. ³³ Ona vineneḡana ma matami ina kala!† Eḡa ota aramanei mara aiwai, wei kauai ina tupua. ³⁴ Wei me rava ana numa i netawanei ma i vaḡai. Ma ana taunola nununai i terei da ita vipaipai ma tagotagogi ava ai nola i verei da ita kauei. Ma tauvineneḡana i riwei da ita vineneḡana. ³⁵ Ona vineneḡana! Eḡa ota aramanei mara aiwai, numa taniwagana e nenei; mepa da au bigai bo au nubautuva bo maratomtomi bo ubaubanai. ³⁶ Ma eḡa matamatavemi ina nelaḡaimi. ³⁷ Aiwai riwana a ririwemi, riwana tagogina rava anatapui a riwei, ona vineneḡana!”

14

Jew ai babada, Iesu i ogei da ita viragēni
(Matthew 26:1-5; Luke 22:1-2; John 11:45-53)

¹ ☆Au pom ruaḡa muriai da Raḡona ma Palawa Bagibagina torelai,* Pirisi babadai ma Tarawatu Babadai eta i baibaiei da menanare govagovaḡanei Iesu ita vunui. ² Ma i riwa, “Au torela wei kauai eḡa tana kauei, mepa da viḡaiḡaiawa ḡaeḡaena ina tupua.”

Wavine, daji ḡabuḡabuna Iesu au kolana i waḡi
(Matthew 26:6-13; John 12:1-8)

³ Maranai Iesu au Bethani, Simon i ḡoreḡorei lepeleperana ana au numa i kiala ma i amam. Wavine, wagi wavana alabaster i voai ma i ḡeta ma wagi uana i vogai ma daji ḡabuḡabuna, maiana ḡaeḡaena e ḡoreḡorei *nard*, Iesu au kolana i waḡi. ⁴ Rava ḡelau kampa i mamae i ḡaiawa ma i riwa, “Aiwai aubaina daji u vikalokaloei? ⁵ Wei dajina ita gimarei 300 *denarii* † ruvana ma manena molamolakai ita verei.” Ma tau, wavine i vienenei.

⁶ Wate Iesu i riwa, “Ona voterei! Aiwai aubaina o vinuabolai? Tauna, kua aiaina awariu i kauei. ⁷ Molamolakai awarimi e mamae-nonoa ma ona ḡoei ma tau ona voagui. Wate tau awarimi eḡa ata mamae-nonoa. ⁸ Wavine ana nola i kauei. Tauna, dajiei tupuau i vokaukauana-nonoei vikokoaga

† **13:33:** Wedau Evanelia i girumi, ma i raupari, wate buka wadubo nonoana wei eḡa ita mamae, Luk 21:16 kampa ona inanai da e mamae. ☆ **14:1:** Exo 12:1-27

* **14:1:** Raḡona (passover) Exo 12:1 Palawa eḡa yist maiteni (Unleavened-Bread) Exo 12:17 & 23:15 † **14:5:** Wei lamna me taubagibagi ana maia madeḡa tagogi aubaina.

aubaina.† ⁹ A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma eġa nuanuai ina vuru.”

¹⁰ Judas Iskariotei tauna Apasol tagogi, Pirisi Babadai awari i ġeta da Iesu ita vibenabenamei. ¹¹ Taui i vinuai ai kaua maranai wei i nonori ma Judas i parivainuaġani da mane ita verei. Ma Judas i 'nana da mepa gavogavo ita inanai da Iesu ita amverenei.

Iesu ma Apasol, Raġona torelana i ani.

(Matthew 26:17-25; Luke 22:7-14, 21-23; John 13:21-30)

¹² Ma Palawa Bagibagina torela ina vikarei. Maranai sipu orotoi ġauboi e vunuvunui Raġona torelana aubaina. Tauvotaġotaġo, Iesu i paridadanei, “Mepa u ġoeġoei Raġona torelana ana vokaukauei aubaim?”

¹³ Iesu, taui ruaġa i riwei ma i paritawanei, “Ona nae au Jerusalem ma oroto, waira wagina e avavarai ona inanai ma ona votaġotaġoi. ¹⁴ Au numana e ruiruiana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaġotaġo maiteni Raġona torelana ana ani?” ¹⁵ “Ma tauna, numa vatavatara ina viatataiemi i vokaukauana-nooei ma kampa aubaita ona vokaukaua.”

¹⁶ Tauvotaġotaġo i nae au Jerusalem ma i ririweia nanare i nelaġai ma Raġona torelana i vokaukauei.

¹⁷ Au i biga ma Iesu i nei Apasol maiteni. ¹⁸ Taui au kepakepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

¹⁹ Tauvotaġotaġo i vinuabola ma tagotagogi ava i pa, “Eġa tau tapa?”

²⁰ Iesu i paribelei, “Taumi tagogi weka palawa e vivigaloi au aboma tau maiteni. ²¹ Wariaġa i girugirumia nanare, Rava Natuna ina iraġe. Wate ai ai da Rava Natuna i vibenabenamei; tauna, kovoga ġaeġaena ina vaia! I aii da alona avena ita vinatunei.”

²² Maranai i amam ma Iesu palawa i vaia ma i viegualau, i vogimagimai ma Tauvotaġotaġo i verei ma i riwa, “Ona vaia; wei tupuau.”

²³ Anina ma *wine* kelakana i vaia ma i viegualau ma i verei da anatapui i umei, ²⁴ ✧ “Wei tau tarau i toi rava maġamaġaui aubai ma au parivainuaġana bagibagina ina vovai-virewapani. ²⁵ Anina a ririwemi, *wine* eġa ana uma-melei da maranai God ana rava aubaii ana vigulau.”

²⁶ Ma taui voepaepa welana i ravi ma i ġae au Ola *Olives*.

† **14:8:** Mai Jew ai kaua da taubeu dajiei e bulobuloi muriai au kokoaga e tereterei.

✧ **14:24:** Exo 24:8; Jer 31:31-34

Peter; Iesu ina boviei

(Matthew 26:31-35; Luke 22:31-34; John 13:36-38)

²⁷ Iesu, tau i riwei “I girumi nanare,

God i riwa, *‘Tauviḡamoḡamo ana viraḡeni ma sipu ina vilamonei.’*
(Zekariah 13:7)

Ma nanare anapumi ona ruba-tawaneu. ²⁸ Wate au vomairi au murina ana aivinao au Galili.”

²⁹ Peter i riwa, “Mepa da anapui ina rubatawanem, wate eḡa tau!”

³⁰ Iesu, Peter i riwei, “A ririwana-kauem da amadodo wagu-varai muriai da kokorereko ina tou mara ruaḡa; tam mara tonuḡa ma bovieu.”

³¹ Wate Peter, ponana i bagibagi ma i riwa, “Avena mepa da tau, tam maiteni ana iraḡe. Eḡa melanai ana boviem!” Ma tau i ḡelau riwana tagogina i latoni.

Iesu au Gethsemani i raraupari

(Matthew 26:36-46; Luke 22:39-46)

³² Ma au Gethsemani i ḡeta ma Iesu, ana tauvotaḡotaḡo i riwei, “Weka ona kiala ma ana raupari.” ³³ Ma Peter, James ma John i taravaini ma nuanuana i raḡe ma nuanuana i bolakauēi. ³⁴ Ma tau i riwei, “Au nuabola i rata kaua au orau da e vunuvunuii. Weka ona mae ma ona vineneḡana.”

³⁵ Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoenā tauna ita netawaneī. ³⁶ Iriwa i pa, “*Abba* Amau! Aiwai anapuna tagotagogina tam awarim. Wei kovoḡa kelakana ma vaitawaneī. Wate eḡa tau au ḡoana, wate tam am ḡoana.”

³⁷ Ma Iesu i nememei ma tau i tonuḡa rarau-nuavurui i nelaḡai. Ma Peter i riwei, “Simon! S tam aiwai matavena? Mara aburuna uta vineneḡana bo eḡa?” ³⁸ Ma Iesu, tau i riwei, “Ona vineneḡana ma ona raupari da eḡa au raelara ona peul Arua e ḡoēḡoei, wate tupua i ḡokokokara.”

³⁹ Ma i naeme ma parina tagogina i raupariei. ⁴⁰ Maranai i nememei ma i nelaḡai, i matamatave; tau i matai i vitai. Ma tau i eḡa ita aramaneī aiwai ita riwei.

⁴¹ Mara vitonuina i nene-memei ma tau i riwei, “Taumi amapo ona matamatave ma laumi ina tautau? Anina! Mara i ḡetai, ona inanai. Rava Natuna ina vibenabenamei ḡo’apoapoe ravai au urai. ⁴² Ona vomairi; tana nae; ona inana! Tauvibenabenameu e nenei!”

Iesu i pani

(Matthew 26:47-56; Luke 22:47-53; John 18:3-12)

43 Iesu i bababani ma Judas, tauna ana Tauvotaḡotaḡo tagogi i ḡetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai. 44 Muriai da Iesu awarina ita ḡeta; Judas, patara ai mataira i verei, “Orotona ana vigia laḡolaḡonei; nai tauna. Ona pani ma ona naiei ma ona inana-kauei!”

45 Maranai Judas i ḡeta ma i nae Iesu awarina ma i riwei, “Tauviararamana!” Ma i vigia-laḡolaḡonei. 46 Ma tau, Iesu i vojijini ma i pani. 47 Ma tagogi kampa i maimairi, ana sword i taina-lavui ma Pirisi ḡeḡetelarana ana taunola taniḡana i borituini. 48 Ma Iesu, tau i riwei, “Taumi ana apiami o nei da ota panu bo, apamina tau amkwalakwalau? 49 Marana patapatai taumi maiteni ta mamae au Tempol ma a viararamana ma eḡa ota panu. Ma i girugirumia nanare, ina tupua.”

50 Ma Tauvotaḡotaḡo anatapu, Iesu i voterei ma i ruba-tawanei.

51 Ma laraga tagogi, i vikareko ma Iesu i votaḡotaḡoi. Tau i ḡoei da ita vojijini, 52 wate ana kareko i vojijini ma tauna ana kovakovana i ruba.

Tau, Iesu i etarei.

(*Matthew 26:57-68; Luke 22:54-55, 63-71; John 18:13-14, 19-24*)

53 Ma tau, Iesu i naiei Pirisi Ḡeḡetelarana. Pirisi Babadai, dogadogara ma Tarawatu Babadai mepa i vitagogieiana. 54 Ma Peter i votaḡotaḡo da Pirisi Ḡeḡetelarana ana numa. Ma ana au debadeba, purusimani maiteni i kiala ma i viviairara. 55 Pirisi Babadai ma mai Jew ai boru ḡeḡetelarana,* Iesu ana apoapoe i baiei da ita viraḡeni; ma i baiana-avei. 56 Matamata maḡamaḡau, Iesu i viwavu-morumoruei, wate ai viwavu taputa-punei ava.

57 Ma ḡelau i vomairi ma wei wavuna morumoruna i kauei Iesu awarina, 58 “Tauai a nonori tauna i riwa, ‘Wei tempolna i voavoai. Tau ana rikai ma au pom tonuḡa au murina, Tempol ḡelauna ana voai ma lamna eḡa rava ita voai.” 59 Wate nanare ai viwavu taputapunei ava.

60 Pirisi ḡeḡetelarana i mairi tau i au naoi ma Iesu i vitara-virevirei, “Wei ravai e viviwavuim ma eḡa aiwai ma paribelei bo?”

61 Ma Iesu i genuana ma eḡa ita paribelei.† Ma Pirisi ḡeḡetelarana i vitaraviravirana-melei, “Tam Keriso tauvilawana bo? Viviaianana Natuna bo?”

62 † Iesu i paribelana, “Tau tauna! Ma *Rava Natuna ona inana, Vivirewapanana au oiena ina kiala ma mara ladanei ina nei.*

* 14:55: Mai Jew e ḡoreḡorei Sanhedrin. † 14:61: Isaiah i parivereta da Keriso ana au iraḡe eḡa ina gagaloana-melei. (Isa 53:7). ☆ 14:62: Da 7:13

⁶³ Pirisi ġeġetelarana, amlona i ġaiġai ma ana gara i sikai ma i riwa, “Aiwai aubaina matamata ġelau tana ġoei? ⁶⁴ Taumi, vijiboġa o nonori ma ami nota aiwai?”

Tau i anatapui i riwa, “Tauna ana ġo’apoapoe aubaina anina da ina iraġe!”

⁶⁵ Ma ġelau i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tauvipaipai, Iesu i vaia ma i vunui.

Peter, Iesu i boviei

(Matthew 26:69-75; Luke 22:56-62; John 18:15-18, 25-27)

⁶⁶ Ma Peter au gabaura i mammae ma Pirisi ġeġetelarana ana taunola guguini i ġetai. ⁶⁷ Maranai tauna, Peter i ’nanai i viviairara; ma i ’nana-tunutunui ma i riwa, “Tam maiteni Iesu Nasaretei, ana tauvotaġotaġo!”

⁶⁸ Wate tauna i bovi ma i riwa, “Eġa ata aramanei aiwai e bababaniei, a vinuanainei!” Ma i tuopu au metaeta ma [koko-rereko i tou†].

⁶⁹ Taunola guguini, Peter i ’nanai ma i raukarena-melei ma rava au ġereġere i maimairi i riwei, “Wei ravana, tau tagogi!” ⁷⁰ Wate Peter i bovi me.

Mara aburuna muriai, tau i ġereġere i maimairi, Peter i riwana-melei, “Tam anina, tau tagogi; aubaina tam, Galiliei!”

⁷¹ Ma Peter i riwa, “God au matana, tau a ririwa kaua, ravana o ririweia a vivinuanainei!”

⁷² Maratagogi kokorereko i tou mara viruaina ma Peter, Iesu riwana i notai - *Muriei da kokorereko ina tou mara ruaġa, tam mara tonuġa ma bovieu*. Ma Peter i vinuabola kaua ma i tou.

15

Iesu i taravaina-naiei Pilate au naona

(Matthew 27:1-2, 11-19; Luke 23:1-5; John 18:28-38)

¹ Ubaubanai boiboġi, pirisi babadai ma dogadogara ma tarawatu babadai anatapui i viboru* ma i vianina da Iesu i pani ma i veredamanei Pilate au urana. ² Pilate, Iesu i vitaravirevirei i pa, “Tam mai Jew ai gulau bo?” Iesu i paribelei i pa, “Anina e ririwa nanare.” ³ Pirisi Babadai e viviwavuim kaua maġamaġau aubai. ⁴ Ma nanare Pilate, Iesu i vitaraviravirana-melei i pa, “Tam ma paribelana bo eġa? Ma nonori e viviwavuim kaua maġamaġau aubai!” ⁵ Wate Iesu i genuana ma eġa ita paribelei. Ma Pilate i ba kaua.†

† **14:68:** Wei riwana buka au wadubo nonoana eġa ita mammae. * **15:1:** Mrk

14:55 Sanhedrin † **15:5:** Mai Rome ai tarawatu e mammae da maranai i viwavuim ma tauetara eġa uta paribelei lamna tam anina wavu ma varai.

Iesu ana iraḡe i vianinei

(Matthew 27:15-38; Luke 23:13-25; John 18:39-19:16)

⁶ Taui ai kaua maemaena da Raḡona Torelana au marana, Pilate, panipani tagogi, rava ai ḡoanei e ruperupeni ma e vovoterei da e nenaē. ⁷ Oroto tagogi wavana Barabas; tauna Rome gabemani i viḡaviei ma i pani da panipani au numana i mamae. Ana rava maiteni tauviraḡena. ⁸ Ma patara i ḡeta da Pilate ita vibaḡai da panipani tagogi ita rupeni Raḡona Torelana au marana. ⁹⁻¹⁰ Pilate i paribelei, “Taumi o ḡoēḡoei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina. ¹¹ Wate Pirisi Babadai, patara i egari da Pilate, Barabas ita rupeni ma eḡa Iesu. ¹² Pilate, patara i paridadana-melei i pa, “Tauna o ḡoreḡoreia mai Jew ai gulau mena ana kauanei?” ¹³ Taui i garara, “Ma tuparatui!” ¹⁴ Pilate i riwa, “Aiwai apoapoena i kauēi?” Ma taui i garara guratana, “Ma tuparatui!” ¹⁵ Pilate i ḡoei da patara ita vinuaubai ma Barabas i rupeni ma sorodia i egari da Iesu i kwapui da i vitaratarai ma i naei da ita tuparatui.

Sorodia, Iesu i vinamei

(Matthew 27:27-31; John 19:2-3)

¹⁶ Sorodia, Iesu i taravaina-ruiei Pilate ana au numa ma ai rava ḡelau i ḡoreiai. ¹⁷ Ma gara lebalebarina[‡] [*me gulau ana gara*] Iesu i vioteni ma kunuteia ai donadonanei i viri da au kolana i terei. ¹⁸ Ma vinamana i raukarei ma i garara, “Egualau mai Jew ai gulau!” ¹⁹ Ma kolana gonuei i raviravi ma i ovaovai. Ma ae-tutuiei i mae-ḡaira au doa ma i raudunelei ma i vivinamei. ²⁰ Ma i vijiboḡa vorovei ma gara lebalebarina i voḡiḡi-tawanei ma ana gara i vioteni. Ma i taravaina-opunei da ita tuparatui.

Iesu i tuparatui

(Matthew 27:32-44; Luke 23:26-43; John 19:17-37)

²¹ Taui i nenaē ma Simon i nelaḡai, rava Sairinie[§] (tauna Rufus ma Alexander amai). Simon wapuei i nenei. Ma sorodia, tauna i egari da Iesu ana korosi i avarai. ²² Taui, Iesu i naiei da gabu i ḡoreḡorei Golgotha, lamna anona unu gabuna. ²³ Sorodia, wine bunama myrrh maiteni i virai ma Iesu i veredadani, wate tauna i geduaiei. ²⁴ Ma Iesu i tuparatui ma ana gara, taui ava au orai i ḡutai.*

²⁵ Ubaubanai 9 kilok nanare, Iesu i tuparatui. ²⁶ Aniviwavuna i girumi ma i tutui, “Mai Jew ai gulau.” ²⁷⁻²⁸ ✨Danedanenei ruaga, Iesu au ririvana i tuparatui; tagogi

[‡] 15:17: Eng. purple. § 15:21: Eng. Cyrenian. * 15:24: Taui ḡaima i tawanei me dice da aiai aiwai garana ita vaia. ✨ 15:27-28: Isa 53:12

au oiena ma ġelauna au kelakelauna.†

29 ☆Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuġa ma voa-melei. 30 Ma vilawana-melem ma *korosiei* ma ġairai!”

31 Ma nanare Pirisi Babadai ma Tarawatu Babadai maiteni, Iesu i vivinamei, “Rava ġelau i vilawani, wate ainelana ita vilawana-melana-avei. 32 Keriso Tauvilawana, Israel ana gulau; marina *korosiei* ma ġairai ma tana inana da tana vitumaġanei!” Danedanenei i tupatuparatui maitenai, Iesu i vinamei.

Iesu ana iragē

(*Matthew 27:45-56; Luke 23:44-49; John 19:28-30*)

33 Ma au benai dobu anatapuna i waguwarei da 3 kilok au bigai. 34 Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona, “*Au God, au God aiwai aubaina u netawaneu?*” 35 Ma rava ġelau i gēreġere i maimairi i nonori ma i riwa, “Ona rautaniġanei, Elijah e kwatukwatuei!” 36 Ma rava tagogi i ruba da gara ai au damona i pani ma au *wine* tomatomana i vigaloi ma i voepai Iesu au ipirina ma i riwa,‡ “Ona vipaipai ma tana inana mepa da Elijah ina nei da ina tereġairei.” 37 Ma Iesu ponana i rata ma i kwatu ma i lavutu tawanana. 38 Ma Tempol au orana anitereġaġara au pouna i wanasikai au tepana da i ġaira au doa. 39 Ma *sorodia* ai bada, Iesu au naona i maimairi; i ’nanai da i lavutu tawanana ma i riwa, “Wei anina God Natuna.” 40 Waivine ġelau i aueia i mae ma i raraubiga: Mary Magdalene ma Mary (James keikeina ma Joses§ aloi) ma Salome. 41 Taui, Iesu i votaġotaġoi ma i vovoagui maranai au Galili i mamae ma waivine ġelau maġamaġau, tauna maiteni i ġeġae au Jerusalem, anatapui kampa.

Iesu i vikokoagei

(*Matthew 27:57-61; Luke 23:50-56; John 19:38-42*)

42-43 Ma au biga i tuturiai Joseph Arimathea* tauna rava ġaeġaena tagogi boru ġetelarana au orana. Tauna God ana vigulau ana nei i vipaipaei. Ma vokaukaua marana (Lamna Sabat au naona)† ma Joseph ana tepatorana, Pilate awarina

† **15:27-28:** Giruma ġelau waduboi vs 28 e mamae Ma aiwai i kaukaueia lamna peroveta i ririweia i tupua, Taui i ’nanai me taui ġo’apoapoe taukauei. Isa 53:12

☆ **15:29:** Mrk 14:58 ‡ **15:36:** Psa 69:21 peroveta i girumi da Keriso ita verei.

§ **15:40:** Au Mat 27:56, Matthew i girumijoseph ma eġa Joses. * **15:42-43:**

Eng. Arimathea. † **15:42-43:** Mai Jew ai Sabate, madeġa e neneulai au Friday e vivikarei da madeġa e neneulai au Saturday e kwakwa. Mai Jew ai Tarawatu e ririwa da rava i ’raġe lamna marana tagogina ina doboi. Sabate amadodo madeġa e neneulai ina vikarei lamna aubaina Joseph i volaġilaġina da Iesu taubeuna ita doboi.

i rui ma Iesu taubeuna i vibaḡei. ⁴⁴ Pilate i baiei da Iesu boiboḡi i'raḡe. Tauna, *sorodia* ai bada i kwatuei ma i vitara-virevirei da Iesu i'raḡe bo eḡa? ⁴⁵ Maranai *sorodia* ai bada i pariverei da anina riwa kaua. Ma Pilate, Joseph i riwei da Iesu tupuana i vaia.

⁴⁶ Joseph, gara maiana ḡaeḡaena i gimarai ma Iesu tupuana i tere-ḡairei. Gare i umai ma au guba tupuana i vimataveni ma ḡaima ḡaeḡaena i kaipeuri da kokoaga metaetana i viaitomeni. ⁴⁷ Mary Magdalene ma Mary - Joses alona i 'nanai mepa Iesu taubeuna i vimataveni.

16

Iesu i vomairi

¹ Ma Sabat au murina, Mary Magdalene ma Mary - James keikeina alona ma Salome, bunama ḡabuḡabui i gimarai da i naiei da Iesu tupuana ita buloi.* ² Ma Sunday ubaubanai boiboḡi maranai madeḡa i gogogo, tau i nae au kokoaga. ³ Ma i nena ma i bababani, "Ai ai aubaita ḡaima kokoaga au metaetana ina kaipeura-tawanei?" ⁴ Maranai tau i taepai, i 'nanai da boiboḡi ḡaima i kaipeura-tawanei - ḡaima ḡaeḡae kaukauana. ⁵ Maranai i rui au guba ma oroto laragana ana gara ararapoirina i 'nanai au oiena.† Ma tau orai i auepai. ⁶ Orotu laragana i riwa, "Eḡa orami ina auepai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna eḡa weka! Tau weka taubeuna i vimataveni. ⁷✱Marina ona nae ma ana tauvotaḡotaḡo ona riwei, ma Peter eḡa nuanuami ina vuru da Iesu e vivinao au Galili. Kampa ona inanai i ririwemi nanare." ⁸ Tau i opu ma kokoagei i viruberubei ana ini sisisi ma ana rovoi. Tau i rovo kaua, lamna aubaina eḡa rava ita riwei.

Mark 16:9-20

Mark Riwana Aaina damona lamna wariḡa i vine-boai. Ma rava ḡelauna aiwai i notanotai nanare au vs 9 da 20 i girumi. Wei damonana weka i vikarei.

Iesu, Mary Magdalene awarina i eḡa

⁹ Iesu iraḡelei i vomairi me au Sunday ubaubanai boiboḡi ma i ainae da Mary Magdalene awarina i eḡa. Maraotai Iesu, Mary awarina arua-apoapoei seven i viopuni. ¹⁰ Iesu, ana tauvotaḡotaḡo i vivinuabola ma i toutou ma Mary i ḡeta da i pariverei. ¹¹ Ma Mary i pariverei da Iesu i lawana me ma tauna matanei Iesu i 'nanai. Wate tau i eḡa ita vitumaḡanei.

* **16:1:** Mai Jew ai kaua maemaena da taubeu monamonei ina buloi ma muriai ina doboi ma waivine i ḡoei da wei kauai ita votaḡotaḡoi. † **16:5:** Tupua i vimataveni au oiena i kiakiala, ana gara ararapoirina. ✱ **16:7:** Mrk 14:28

Iesu, tauvotaḡotaḡo ruaḡa awari i eḡa

¹² Wei au murina Iesu inanana tapuna ma ana tauvotaḡotaḡo ruaḡa awari i eḡa; maranai tau i nena au melagai. ¹³ Tau i naeme ma tauvotaḡotaḡo ḡelau i vieḡei. Wate tau nanare eḡa ita vitumaḡanei.

Iesu, Taii 11 awari i eḡa

¹⁴ Muriai tau i 11 i amam ma Iesu awarii i eḡa. Ma i eni aubaina tau orai i bado ma eḡa ita vitumaḡana maranai rava, i riwei da Tauna i vomairi me. ¹⁵ ✧Iesu ana Apasol i riwei, “Ona nae dobu au anapuna. Ma God Riwana Aiaina ona jimei rava anapui awarii. ¹⁶ Aiai da i vitumaḡana ma i babataito; tauna ina lawana. Ma aiai da eḡa ita vitumaḡana ina kovoḡi. ¹⁷ Ma tau aiavoi da i vitumaḡana, rewapana ina verei da kua babai ina kauēi. Ma arua-apoapoei ina viopuni ma pona tapunei ina babani. ¹⁸ Tau, mota uraiei ina vaia ma waiawa ina umai ma eḡa ina rauputei. Ma urai doridoriai au kolai ina terei ma ina lawana.”

God, Iesu i ḡaiei au Mara

¹⁹ ✧BADA Iesu, awari i babani vorovei. Ma tauna i ḡaiei au mara ma God au oiena i kiala. ²⁰ Tauvotaḡotaḡo i opu ma dobu au anapuna i raraugugula. Ma BADA, tau i voagui ma kua babai i kaukauei da tauvotaḡotaḡo aiwai i bababaniei i vovai-virewapani.

Apasol ai kaua Pariverena

Luke ana buka i giruma vorovei ma muriai Apasol ai kaua bukana i girumi. Tauna ana ano ġaeġaena lamna i ġoei da rava ita vieġei da menanare Arua Vivivireina Iesu ana tauvotaġotaġo i rau-etaraveni da Riwana Aiaina ita vituai,

Au Jerusalem ma au Judea au anatapuna ma au Samaria ma dobu au ġia dewadewana.

(1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vitumaġana. Tauamgiruma ana nota ġaeġaena da wei bukana tauivana ita pariveri da kerisiana avena Rome gabemanina ita viviġaviei. Kerisiana vitumaġanana lamna mai Jew ai vitumaġana e kaukauana-paiei. Wei bukana i ġutai da raġaraġana tonuġa, ma e viviatataieta da dobu au anatapuna Iesu Riwana Aiaina i jimei ma ekalesia i vitupui:

Iesu ana ġae au murina Ekalesia au Jerusalem ai nola i vikarei;

Palestine taun ġelau i awari i tua-nae;

Ma i tua-nae au Mediteranean da i nae au Rome paratana.

Wei bukana ana kaua ġaeġaena lana Arua Vivivireina i nolanola, ma rewapana tauvitumaġana au Jerusalem i verei au Pentecost. Ma wei au bukana i vieġeta da Arua vivivireina mara nonoa agu ma rewapana ekalesia ma ai babada i verei ai au aninola au anatapuna. Wariaġa kerisiana ai pariverena i tere-tagogiei raugugula au maġamaġai, ma kaua ma ai nola i kaukauei anatapui. Wei au bukana i girumi da wei parivai-nuaġanana ana rewapana tauvitumaġana ai au lawana ma kerisiana ai au voepaepa i viatataieta.

Buka rereġana 1.

Vokaukaua tauvimatamata aubai (1:1-26)

Iesu ana tarawatu ma ana parivainuaġana damona (1:1-11)

Judas Epaiana (1:12-26)

Tauvimatamata au Jerusalem (2:1—8:3)

Tauvimatamata au Judea ma Samaria (8:4—12:25)

Paul ana nola (13:1—28:31)

Paul ana vaġai tagogi (13:1—14:28)

Boru au Jerusalem (15:1-35)

Paul ana vaġai viruaina (15:36—18:23)

Paul ana vaġai vitonuina (18:24—21:16)

Paul i vipaniapani au Jerusalem, Caesarea, ma Rome (21:17
—28:31)

Iesu ana Apasol i parivainuaḡani

¹ Eḡalau Theophilus, buka au naona a girugirumia* lamna Iesu ana tupua ma ana nola i vikarei da i kaukauei ma i viviararamana a pariverem² i nae da ana ḡae au marana. Muriai da Iesu i ḡaiei au mara, Tauna Arua Vivivireinei ana apasol vinevinei riwa bagibaginei i parivere. ³ Iesu ana irage au murina i vieḡana-melei ana apasol awarii. Ma kua maḡamaḡai i kaui da apasol i vitumaḡana kua da Tauna anina i lawana me. Tau i awarii i eḡa au pom 40 au orana ma God ana vigulau i babanie. ⁴ Maranai ana apasol maiteni i vitagogiei ma i riwanaguratei i pa, “Eḡa Jerusalem ona oputawanei, wate pulona amau i paripari-vainuaḡanimi ona paini, maraotai a ririwemi nanare. ⁵ *John wairei i babataito, wate mara aburuna ava Amau, Arua Vivivireinei taumi ina babataitomi.”

God Iesu i ḡaiei au Mara

⁶ Muriai maranai Iesu ma Apasol i vitagogiei ma tau i Iesu i vitara-virevirei i pa, “Bada! Marina, Israel ana† vigulau ma vere-melei bo?”

⁷ Ma Iesu i paribelei, “Amau ainelana ana rewapani mara ma iri e vivibadei, aubaina da taumi eḡa ona aramanei. ⁸ *Wate maranaina Arua Vivivireina au orami ina rui, maranaina taumi rewapana ona vaia. Ma aubaiu ona vitaunola au Jerusalem, Judea, au Samaria ma dobu au anatapuna.”

⁹ *I babani vorovei ma au matai God Iesu i ḡaiei au mara. Ma apau i nei da i purui ma tau i eḡa ita inana-melei.

¹⁰ Ma tau i ḡoḡouta au mara ma nelara ruaḡa ai gara ararapoi au ririvai i raumairiei. ¹¹ Ma i riwa, “Mai Galili, aiwai weka o maimairiei ma o ḡoḡoutatei? Wei ravana menanarena o inanai i ḡaenei, amapo nanare ina nememei.”

Judas epaiana i vinei

¹² Anina ma Apasol Ola Olive, i voterei ma i ḡaira me au Jerusalem lamna eḡa uama ma au ḡereḡere. ¹³ *Ma au Jerusalem i ḡeta ma i ḡae numana i mamae lana au tepana au vatavatara. Tau i ai wava, Peter, John, James ma Andrew, Philip ma Thomas, Batolomeo ma Matthew, James - Apilus natuna, ma Simon tauna au naona Zealot‡ ma Judas -

* **1:1:** Bukana au naona i girugirumi lamna Luke ana Gospel * **1:5:** Mrk 1:8
† **1:6:** Rome gabemanina Juda i vibadei wei au marana, Mai Jew wei eḡa ita ḡoei, ma i ḡoei da ita virai. * **1:8:** Mrk 16:15 * **1:9:** Mrk 16:19 * **1:13:** Mrk 3:16-19 ‡ **1:13:** Rava ununurana. Wei ravai mai Rome ai gabemani e viviḡaviei.

James natuna. ¹⁴ Ma wei ravai mara patapatana i vivitagogiei ma i raraupari gogona, waivine ġelau ma Iesu ana roaroa ma aloi Mary maiteni kampa.

¹⁵ Wei au marana, tauvitumaġana 120 i vitagogiei ma Peter i vomairi ma wenanare awari i babani, ¹⁶⁻¹⁷ “Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana wariġa gulau David i riwei da ina tupua; ma aiwai i ririwei anina nanare i tupua.” ¹⁸ Judas Iesu i amverenei mane vainana aubaina, ma wei manenei doa i ġimarai. Ma nai au doana tauna kolanei i peu ma manawana i wanawamai da amoamona i opu. ¹⁹ Ma rava anatapui au Jerusalem wei iraġena riwana i nonori, lamna aubaina tau i nai dobuna ai ponei i viwavai Hakeldama, wei anona *Tara Doana*.

²⁰ “Wariġa Gulau David i girugirumia, nanare i tupua,

Ana animae ina kwakwava,

ma eġa ai ai au orana ina mae.

(Psalm 69:25)

Ma

rava ġelauna ana nola ina vaia.

(Psalm 109:8)

²¹ ✧ Lamna aubaina marina awarita, rava ġelauna tana vinei da ina raviepaiai. Tauna ravanana Iesu maiteni ta bababara-nae madeġa tonuġa au orana, ²² John rava i babataitoi au marana ma i nae da Iesu i ġaiei au mara. Ma maiteni tana nola ma rava tana riwei menanarena God Iesu iraġelei i vovaimairini.”

²³ Ma tau i rava ruaġa i vinei, Joseph-Barsabas (ana wava ġelauna Justus) ma Matthias. ²⁴⁻²⁵ Anina ma tau i raupari, “BADA tam rava anatapui orai u aramanei. Ma vieġelai da wei ravai ruaġa, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu.”

²⁶ Anina ma tau i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

2

Arua Vivivireina i ġairai

¹ Pentecost torelana i ġetai ma tauvitumaġana anatapui numa tagogi au orana i vitagogiei. *

² Maratagogi gugura ġaeġaena, nonorana me ive vivire-wapanana marei i ġairai ma tauvitumaġana i mamae numana

✧ **1:21:** Mrk 1:9; Mrk 16:19 § **1:26:** Wei kalona wenanare: mai Jew wava ġaima muomuoi awari i girugirumi ma e tawatawanei, ma ai ai ana namba i eġa lamna tauna ina vaia. Tau i vitumaġana da wei kauana awarinei God tau i ina viatataiei da ai ai ita vinei. (Pro 16:33) * **2:1:** Mai Jew ai Raġona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei.

i vioai. ³ Tauī purapura inanana me ai menamenana i 'nanai, i ġairai ma rava tagotagogi ava au kolai i kiala. ⁴ Ma Arua Vivireina anapui i vioai ma pona taputapunei ava i bababani Arua ana aguei.

⁵ Nai maranaina mai Jew patupatutui dobu au anapuna i vitaomana au Jerusalem da Pentecost torelana ita apui. ⁶ Ma patarai kampa i viruberubei, ma i nonori da gugurana lamna tauvitumaġana tauī tagotagigiava ai ponei i bababani ma tauī ai nota i kwa. ⁷ Tauī anapui i baei ma tauī ava i babani vivira i pa, “Wei mai Galili bo?” ⁸ Ma menanarena da anaputa awarita ata ponei e bababani! ⁹⁻¹⁰ Tauta ġelauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijia, Pamphilia, Egypt ma Libya navanavana, au Sairini au ġereġerena, ma ġelauta mai Rome, ¹¹ ġelauī mai Jew ma ġelauī Jentail wate inibori i vaia da i vimai Jew. Ma ġelauta mai Crete ma mai Arabia. Wate God kaua ġaeġaena i kaukaueia, ata ponei i bababaniei ma ta nononori!” ¹² Tauī anapui i vinuanaina, nuanuai i raġaraġa ma i bababani vivira, “Wei aiwai kauana e tuputupua?”

¹³ Wate ġelauī tauī i vinamei i pa, “Wei ravai i uma bua!”

Peter rava awarii i raugugula

¹⁴ Anina ma Peter i vomairi Apasol 11 maiteni, ma ponana ġaeġaenei patara awarii i babani,

Au rava mai Jew ma anapumi au Jerusalem maemaemi, babani ana tere-kauēi da ona aramaneī. Ona rautaniġana kaua. ¹⁵ Wei marinaota, 9 kilok ubaubanai! † Wei ravai eġa ita uma bua me taumi o notanotai nanare,

¹⁶ Wei lamna wariāġa peroveta Joel i ririweia e tuputupua:

¹⁷ *Mara au damona,*

Aruau rava anapui awari ana iwaġi.

*Ma natunatumi nelarai ma waivineī riwau ina jimeī,
ma nelara voui mataieī kaua ina inanai,
ma babada magumaguri raubonieī kaua ina inanai.*

¹⁸ *Wate nanare, Aruau ana iwaġi au taunola nelarai ma
waivineī awarii,
ma ina vitaubabani.*

¹⁹ *Ma kaua babai au mara ana kauēi,
ma au dobu mataira ana vieġai*

ai araratana, tara ma bau potopotona.

²⁰ *Ma madeġa ina waguwarei*

ma nawaravi ina ravitaratarai,

† 2:15: Mai Jew tauī au bigai sia e aniani ma wain e umaumai.

*muriai da BADA ana mara g̃aeḡaena ma boruboru-
mana ina nei.*

21 *Nai au marana aiavoi da BADA awarina e viviḡore agu
aubaina BADA tauī ina vilawani. (Joel 2:28-32)*

22 *Ma Peter i babani me:*

*Mai Israel ona rautaniḡana: God Iesu Nasaretei i vovai-
virewapani da kua babai, ma mataira g̃aeḡaei i kauēi da
ita viatataiemi da tauna anina Godei i nei. 23 ☆Wate God
wariāḡa i viogeī ma ana ḡoana nanare da Iesu au urami
i terei, ma taumi ḡo'apoapoe ravai ai aguei, Tauna au ko-
rosi o tuparatui da o virāḡeni. 24 ☆Wate God, Iesu iraḡelei
i vovaimairini, ma iraḡe iniviarana i vaitawanei ma iraḡe eḡa
tagotagogina da tauna ita vojijini. 25 Wariāḡa David Iesu
i bababaniei maranai i riwa:*

Tau a inanaī BADA God au naou mara au anatapuna.

Tauna au oieu lamna aubaina eḡa ana rovo.

26 *Lamna aubaina nuaiāi orau i oai ma menau i morelana,
ana iraḡe ma a aramanei da tupuau ma paina-kauēi.*

27 *Ma aruau eḡa rava irairaḡei ai au dobu ma voterei,
ma tam eḡa am taunola vivivireina tupuana ma voterei da
ina buda.*

28 *Tam lawana etanaina u viatataieu,
ma Tam maiteni a mamae ma a vinuaiāi kaua. (Psalm
16:8-11)*

29 *Au rava, A riwana-kauemi da amata gulau David i'raḡe
da i doboi, ma ana kokoaga weka e mamae. 30 ☆Wate David
lamna peroveta, ma i aramanei da God i parivainuaḡani da
ana damei gulau ina opu, me tauna nanare. 31 Ma David
i 'nanai God muriai aiwai ina kauēi ma i riwa,
Keriso ina vomairi me,*

*ma tupuana eḡa rava irairaḡei ai au dobu ina voterei da
ina buda. (Psalm 16:10)*

32 *Ma God Iesu-na tagogina iraḡelei i vovaimairini, ma tauai
anatapuiai a vimatamata. 33 Ma God i ḡaiei ma au oiena
i vikialai. Ma Arua vivivireina i verei me i parivainuaḡana
nanare, ma nai Aruana tagogina Iesu awariai i waḡi, lamna
marina o nononori ma o inainanai. 34 ☆ David eḡa ita ḡae au
mara, ma wate i riwa, BADA au Bada i riwei, "Au oieu ma kiala
35 ma am ḡavia au ae karem ana terei. (Psalm 110:1)*

36 *Lamna aubaina mai Israel anatapumi ona aramana-
kauēi da wei ravana Iesu o tupatuparatuia, God i terei da BADA
ma Tauvilawana.*

37 *Ma maranai rava wei riwana i nononori, tauī orai
i rautonai da Peter ma Apasol ḡelau i riwei, "Varevareiai, tauai
aiwai ana kauēi da ana lawana?"*

³⁸ Ma Peter i paribelei, “Taumi tagotagogi ava Iesu Keriso wavane i ona rupena ma ona babataito ma ami ġo’apoapoei ina nota-tawanei, ma God ana pulo Arua Vivivireina ona vaia. ³⁹ Wei parivai-nuaġanana lamna taumi natunatumi maiteni aubaimi. Ma wate nanare mai jentail - aiavoi da e kwatukwatuei ina nei Tauna awarina.”

⁴⁰ Ma Peter riwa ġelau i maiteni rava i vinua-terenei, ma i egari, “God ona vianinei da ina vilawanimi, ma eġa kovoga ona vaia.” ⁴¹ Ma rava maġamaġau i Peter ana babani i vitumaġanei ma i babataito ma nai au marana rava 3,000 ai au boru i rui.

Tauvitumaġana i mae gogona

⁴² Ma tauvitumaġana Apasol ai viararamana i nononori, ma i viboruboru, i amam ma i raraupari gogona. ⁴³ Apasol kaua babai ma mataira ġaeġae maġamaġau i kaukauei ma anatapui i rovo ma God i vivirana-kauei. ⁴⁴ *Ma tauvitumaġana anatapui gabu tagogi i vivitagogiei ma aiwai ġariei ai rava maiteni i ġutaġutai. ⁴⁵ Tai ai doa, ai numa, ai wapu ma ai purapura i gimagimarei ma manena ai rava ġelau i maiteni i ġutaġutai. ⁴⁶ Tai mara patapatai au tempol i vivitagogiei, ma ai au numa ana nuaiiai ma ana morelanai i amam gogona. ⁴⁷ Ma tau i God i vovoepapai ma rava anatapui i vivinuaiaini. Ma marana patapatai rava voui i neneiai Iesu awarina ma tauvitumaġana ai boru i viviratai.

3

Peter, oroto aena gwaġagwaġana i vilawani

¹ Mara tagogi au bigai 3 oklok, Peter ma John pari aubaina i ġeġae au Tempol. ² Ma oroto tagogi aena gwaġagwaġana i tupuei, ma mara au anatapuna ana rava i avavara neiai da Tempol metaetana, e ġoreġorei, metaeta aiaina, kampa i vivikialai ma rava i ruirui tempol au orana i vivigimane i mane aubaina. ³ Maranai i 'nanai da Peter ma John aburuna ava da au metaeta ita rui, ma i vibaġai mane aubaina. ⁴ Peter ma John orotona i 'nana-tunutunui ma Peter i riwa, “Ma inanaiai!” ⁵ Ma orotona tau i 'nanai ma i notanotai da aiwai awarii ita vaia. ⁶ Ma Peter, orotona i riwei, “Awariu silva ma gold eġa wate aiwai awariu lamna ana verem. Iesu Keriso Nasaretei, wavane i ma vomairi, ma babara!”

⁷ Ma Peter oroto nimana au oieina i vojijini ma i voagui da i vomairi. Ma maratagogi oroto aena ma ae kwarukwaruna i ai ma i virewapana, ⁸ ma aenei i viauepa ma babara i vikarei. Anina ma tau i maiteni i rui au tempol ma tauna tempol oraninei i bababara, i viviauepa ma God i vovoepapai. ⁹ Ma

* 2:44: Act 4:32-35

rava anatapui orotona i 'nanai i bababara ma God i vovoepapai,
 10 ma i aramanei da tauna ravana tagogina tempol metaetana
 e ġoreġorei *inanana aaina* au naona, i kiakiala ma i vivigigimana.
 Ma rava anatapui i 'nanai aiwai i tupua wei orotona awarina
 ma i ba-guratana.

Peter patara awarii i babani

11 Ma orotona Peter ma John i vovojijini ma rava anatapui
 i bana-kauei, ma i viruberubei tauai awari au lovelove e ġoreġorei,
Solomon ana lovelove. * 12 Ma maranai Peter patarai i 'nanai
 ma i riwei:

Au rava mai Israel, aiwai aubaina o vivinuanaina? Ma
 aiwai aubaina o inainana-tunutunui, apamina tauai ai re-
 wapanai bo ai vipatutuei, wei ravana a kauei da i babara?
 13 ☆Wei lamna amamata Abraham, Isaac ma Jacob ai God,
 ana taunola Iesu i viborumei, ma taumi Tauna o verenei da
 ita viraġeni, ma Pilate au matana o geduaiei. Pilate i ġoei
 da ita rupeni wate taumi eġa ota vianinei. 14 ☆Iesu lamna
 rava vivivireina ma jijimanina, wate o geduaiei. Ma Pilate
 i ġoei da Iesu ita rupeni, wate taumi o ġoei da tauviraġena
 i rupeni aubaimi. 15 Ma taumi lawana maemae-nonoana
 tauvereina o viraġeni, wate God i vilawana-melei, tauai wei
 a vimatematei. 16 Wei ravana aena gwaġagwaġana Iesu au
 wavana i vitumaġana ma lamna aubaina i lawana. Taumi
 o aramanei ana doria menanare, Wate ana tumaġana Iesu
 awarina i vilawani.

17 Ma au rava marina a aramanei da taumi ami babada
 maiteni Iesu o viraġeni, aubaina taumi eġa ota aramanei da
 tauna tauvilawana. 18 Wate wei lamna wariġa God ana
 peroveta anatapui i ririweia i tupua, God i riwa da ana tauvi-
 lawana ina vinuapoapoe. 19 Ami ġoa apoapoe Ona voterei
 ma ona mae-taviremi God awarina da tauna ami ġo'apoapoe
 ina nota-tawanei. 20 Ma lamna maranaina God aruami
 nualawalawana ina verei, God Iesu i vinei da ami Tauvi-
 lawana ma ina paritawaneiai. 21 Iesu au Mara ina mae da God
 kua anatapui ina ravivouni, me God ana peroveta vivivirei
 wariġa i ririweia nanare. 22 ☆Moses i riwa, "BADA ami God
 peroveta, me tau nanare, ina terei ma tauna ami dam oinei
 ina nei. Ma aiwai anatapuna e ririwemi ona rautaniġanana-
 kauei. † 23 ☆Ma aiai da wei perovetana eġa ina rautaniġanei
 lamna God ana rava awariei ina vilamonei."

* **3:11:** Solomon ana lovelove tagogi tempol au orana e mamae. Wei lamna gari
 au ririvana ma ana tuatua maġamaġauna. ☆ **3:13:** Exo 3:15 ☆ **3:14:** Mrk
 15:6-14 ☆ **3:22:** Deu 18:15, 18 † **3:22:** Mai Jew e ririwa da Moses lamna ai
 peroveta ġaeġaena. ☆ **3:23:** Deu 18:19

24 Peroveta Samuel ma muriai Peroveta maḡamaḡai, kaua i ririweia marina e tuputupua. 25 ☆Taumi nai perovetai natunatui ma taumi maiteni parivainuaḡana bagibagina au orana. Au baina God Abraham i riwei, “Am epaepaia awariei dam anatapui au dobu ana viaiaini.” 26 Ma maranai God ana taunola i vinei, ma au naona i paritawaneiai awarimi da ita viaiainimi, ma lamnei taumi tagotagogi ava ami ḡo’apoapoe ota opu-tawanei ma ota nei Tauna awarina.

4

Jew babadai Peter ma John i etarei

1 Peter ma John rava awari i bababani ma pirisi pulo tauapuina ma tempol taupainii* ai bada ma Sadusi ḡelau † i ḡetai. 2 Taui amloi i ḡaiḡai kaua Peter ma John awari aubaina tau i viviararamana da God, Iesu iraḡelei i vovaimairini ma wei i viatataiana da God rava anatapui iraḡelei ina vovaimairini. 3 Taui Peter ma John i pani ma au i pom aubaina panipani au numana i terei da i mae mara. 4 Wate rava maḡamaḡai riwa i nonori ma i vitumaḡana, ma ai maḡa nelara 5,000 waivine eḡa ita iavi.

5 Ma mara i tom ma Jew babadai, dogadogara ma tarawatu babadai au Jerusalem i vitagogiei. 6 Ma pirisi ḡeḡetelarana Annas kampa ma Caiaphas, John, Alexander ma pirisi ḡeḡetelarana ana rava maiteni. † 7 Ma taui Peter ma John i neiei da au naoi i vimairini ma i riwei, “Aiwai rewapananei, ma aiai wavanei wei o kauiei?”

8 Arua Vivivireina Peter orana i vioai ma taui i riwei, “Rava ai babada ma dogadogara; 9 tauai kaua aiaina a kauiei gwaḡagwaḡana awarina ma amadodo taumi o vitara-virevirelai, da menanare tauna i lawananei. 10 Ma wei ona aramana-kauiei, da taumi ma mai Israel anatapui, da Iesu Keriso Nasaretei o tuparatui, Wate God tauna iraḡelei i vovaimairini ma tauna wavanei wei orotona au naomi lawalawaina e maimairi. 11 Taumi tauvoa nai ḡaimana o geduaiei, wate wei ḡaimana lamna numa ogona, numa ana tapuna e vovojijini. §

12 —Lamna aubaina Iesu ainelana ina vilawanita. Ma God eḡa aiai ḡelauna au dobu rewapana ita verei da ina vilawana.”

☆ 3:25: Gen 22:18 * 4:1: Tempol tau-painina lamna anatapuna au tempol e inainana-vaitetei (purusimani). Taui pirisi ḡeḡetelarana ana taunola. † 4:1: Sadusi taui iraḡelei vomairime eḡa ita vitumaḡanei † 4:6: Mai Rome Caiaphas i vinei da Pirisi ḡeḡetelarana, poiana Annas epaiana. Wate mai Jew ai au giu da aiai pirisi ḡeḡetelarana vaivaina i vaia, tauna anina ina mae da au iraḡe. Luke e ririwa da Annas tauna pirisi ḡeḡetelarana. § 4:11: Mai Jew ai numa ḡaimai i voavoai. Iesu tauna anina God ana Tempol vouna oḡona. (Eph 2:19-21, Isa 28:16).

13 Ma tau i Peter ma John ai tepatora inanai ma maranai i aramanei da tau i eġa girugirumai, ma i baei. Ma i aramanei da tau i Iesu ana tauvotaġotaġo. 14 Ma wate i nanai oroto i vivilawania Peter ma John maiteni i maimairi, lamna maranai tau i gamoi i pota. 15 Anina ma Peter ma John i riwei da boru gabuna i opu-tawanei, ma tau i ava i vitarairavira vivira. 16 Tau i vitaraviravira-viravira i pa, “Aiwai tana kau ei wei nelarai awari? Rava anatapui au Jerusalem i aramanei da tau i kaua babai i kaukauei, lamna eġa tana boviei. 17 Wate tana viġaei da wei kauai eġa ina tua rava ġelau i awari, ma riwa bagibaginei tana viġaei da eġa ai i awarina Iesu wavanei ina raugugula.”

18 Anina ma tau i ġorei da i rui me, ma riwa bagibaginei i viġaei da eġa ai i awarina Iesu wavanei ina raugugula bo ina viararamana. 19 Wate Peter ma John tau i paribeiei, “Taumi ami nota aiwai. Tau i God ana voteletei bo taumi? 20 Tau i aiwai a inainanaia ma a nononoria babanina eġa ana voterei.”

21-22 Wei Orotona i vivilawani lamna gwaġagwaġana ma ana madeġa 40. Lamna aubaina rava anatapui God i vovoepapai, ma babada eġa ita aramanei menanare Peter ma John ina kovoġanei. Ma i parivairovorovo-meiei ma i paritawanei da i nae.

Tauvitumaġana God i vibaġai agu aubaina.

23 Peter ma John i nae me ai rava awari ma pirisi ġaeġaei ma dogadogara aiwai i ririweia tau i vieġei. 24 *Maranai tauvitumaġana wei riwana i nonori, tau i anatapui i raupari gogona God awarina:

BADA tam ai gulau, Tam mara, dobu, boga ma anatapuna au orana maema ei taukaueina. 25 Tam Arua Vivivireinei am taunola, amaia i David gamonei u babani ma u riwa, *Aiwai aubaina rava awariai e mejimeji,*

ma aiwai aubaina ai oga e taratara labalabai?

26 *Ma dobu ai gulagulau i vokaukauea ma babada ġaeġaei ġelau i maiteni i vitagogiei da*

BADA ma ana tauvilawana* maiteni i viġaviei. (Psalm 2:1)

27 *Anina riwa kaua. Wei kauai weka au Jerusalem i tupua, Herod ma Pontius Pilate, Jentail ma mai Israel maiteni i vitagogiei, da am taunola vivivireina Iesu u bulubuloia i viġaviei. 28 Ma tam am rewapanai ma am ġoanei am oga menanare u tarataranei marina nanare i tupua. 29 BADA, nai ravai ai parivai-rovorovo au uram ma am taunola ma vovai-wirewapani da ana tepatorai riwam ina raugugulei. 30 Uram

* 4:24: Exo 20:11

*

4:26: Wei lamna Keriso.

* 4:27: Mrk 15:1

ma viloloi da ma vilawana ma kaua babai ma mataira gāeḡaei ma kauēi, am taunola Vivivireina Iesu wavaneī.

³¹ Ma pari au murina, tauī mēpa i vivitagogiei gabuna i vīgu. Ma Arua Vivivireina anātapui orai i vīoai. Ma ana tepatorai God riwana i raugugulei.

Tauvitumaḡana ḡariei i ḡutaḡutai

³² ✧Tauvitumaḡana anātapui ai nota ma orai tagogi. Ma ai purapura tagogi ma eḡa aiwai ita nuaneī. ³³ Ma Apasol ana tepatorai ma rewapanai BADA Iesu ana irāḡe, ma ana vomairi me i raugugulei. Ma God ana viaiaina gāeḡaena tauī anātapui awari i peu. ³⁴⁻³⁵ Ma tauī au orai eḡa aiwai ita voladaḡei aubaina, ai rava ḡelauī ai doa bo ai numa i gimagamareī ma manena i neneiai Apasol awari i teretereī, ma aiwai da aiwai i vovoladaḡei nanare i vovoagui.

³⁶ Me Joseph, tauna Levi ana damei, au Saipras i tupua, ma Apasol tauna i ḡoreḡorei Barnabas, wei wavana anona lamna tauduḡu. ³⁷ Tauna ana doa i gimareī, ma manena i neiai da Apasol awari i terei.

5

Ananias ma Saphaira

¹ Anina ma Ananias awana Saphaira maiteni ai doa navanavana i gimareī. ² Ma airuaḡa i vianina tagogi da mane navanavana i nuaneī, ma Ananias mane navanavana i naiei da Apasol awari i terei.

³ Anina ma Peter tauna i vitaravirevirei, “Ananias aiwai aubaina Satan u vianinei da au oram i rui ma Arua Vivivireina u morui, ma doa u gimagamareī manena navanavana u nuaneī?”

⁴ Doa lamna tam ḡarimeī da uta gimareī bo eḡa. Ma maranai u gimareī lamna manena tam ḡarimeī da uta vereneī, aiwai aubaina nota apoapoena au oram i rui? Tam eḡa rava awarina uta moru, wate God awarina u moru.” ⁵⁻⁶ Maranaina Ananias wei riwana i nononori, tauna i peu da i rāḡe. Anina ma nelara i rui da tupuana i umai ma i naiei da i doboi. Ma aiavoī da wei riwana i nonori i rovo kaua.

⁷ Tauī eḡa ita mae gurātana, ora tonuḡa nanare ma awana i nei, aiwai i tupua eḡa ita aramaneī. ⁸ Ma Peter wavine i paridadaneī, “Abe uta riweu, tam awam Ananias maiteni doa o gimagamareī maiana anina wei bo?” Ma tauna i paribelei, “Ee, doa maiana anina nai.”

⁹ Ma Peter i riwa, “Aiwai aubaina taumi o vianina da BADA Aruana ota raudadani? Nelaraī awam i dobodoboī ma inanai au metaeta da tam maiteni ina avara-opunem.”

¹⁰ Maratagogi wavine Peter au ae karena i peu da i'raḡe. Maranai nelara i rui au numa ma i 'nanai da wavine i'raḡe, anina ma i avara-opunei da awana au ririvana i doboi. ¹¹ Lamna maranaina ekalesia anapui, ma rava aiavoi da wei riwana i nonori i rovo kaua.

Apasol rava maḡamaḡai i vilawani

¹² Ma Apasol mataira ma aniba kauai maḡamaḡai i kaukauei rava awari. Ma tauvitumaḡana Solomon ana au lovelove i vivitagogiei. ¹³ Wate rava ḡelau ai au boru ruina i rovoei, wate rava tau i vivirana-kauei. ¹⁴ Wate nelara ma waivine maḡamaḡai Iesu awarina i vitumaḡana ma tauvitumaḡana ai au boru i ruirui. ¹⁵ Ma lamna aubaina rava ai rava doridoriai i avavara-opunei au eta ma ai au animatave i vimataveni, da Peter inii ita vodadani bo eḡa da ḡouna tau i ita ḡouni da ita lawana. ¹⁶ Ma melagai ḡelau Jerusalem au ririvana ravai maḡamaḡai ai rava doridoriai, ḡelau arua-apoapoei i ruiruinia i neiai ma anapui i vilawani.

¹⁷ Anina ma piriḡi ḡeḡetelarana ma ana rava mai Sadusi anapui orai unura i oai. ¹⁸ Ma Apasol i pani, ma panipani au numana i terei. ¹⁹ Wate waguvarai BADA ana anela i nei da panipani numana metaetana i votawanei, ma tau i taravainapunei ma i riwei, ²⁰ "Ona rui tempol au orana, ona mairi ma lawana vouna riwana anapuna rava ona pariveri." ²¹ Anela i ririwei nanare, tau i tempol i rui ma rava viararamanai i vikarei. Nai maranai piriḡi ḡeḡetelarana ana rava maiteni i ḡetai ma boru ḡaēḡaena e ḡoreḡorei Sanhedrin i terei. Ma rava i paritawanei au panipani numana da Apasol ita neiai awari. ²² Tau i panipani au numana i ḡeta ma i baina-avei, ma i naeme da i vieḡa. ²³ I pa, "Panipani numana anina i gudu-kauei, ma tauvipapai au metaeta i maimairi; wate maranai tau i metaeta a votawanei lamna eḡa aiai kampa." ²⁴ Maranai tempol taupainina ai bada ma piriḡi babadai wei riwana i nonori, tau i vinuanaina da aiwai i tupua.

²⁵ Ma rava tagogi i nei ma i riwa, "Ona rautaniḡana! Nelara panipani au numana o teretereia, tau i tempol e maimairi ma rava e viararamani." ²⁶ Anina ma tempol taupainina ai bada, ma babada ḡelau maiteni i nae ma Apasol i neiai. Tau i rovo ma eḡa ita egari mepa da rava ḡaime i ita ravi.

²⁷ Ma Apasol i neiai boru ḡeḡetelarana au naoi, ma piriḡi ḡeḡetelarana tau i vitara-virevirei. ²⁸ I pa, "A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tau i o vereverelai."

²⁹ Ma Peter Apasol ġelau i aubai i vitauvibabani i pa, “Tauai God ana voteletelei ma eġa rava. ³⁰ Taumi Iesu au *korosi* o tuparatui ma o viragēni, wate amamata ai God Tauna i vovaimairini. ³¹ Ma marina Tauna God au oiena e kiakiala, Tauna BADA ma Tauvilawana, Da mai Israel ai ġo’apoapoe ina rupeni, ma ai ġo’apoapoe ina nota-tawanei. ³² Ma tauai Arua Vivivireina maiteni wei kauai anatapui mataielai a inanai. Ma nanare God Arua Vivivireina i paritawanei rava votelatelai awari.”

³³ Tai wei babanina i nonori ma amloi i ġaiġai kua, ma i ġoei da Apasol ita viragēni. ³⁴ Wate Pharisi ma tarawatu badana wavana Gamaliel, rava anatapui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava. ³⁵ Anina ma ana rava i riwei, “Mai Israel, ona inana kua ma muriai da aiwai wei ravai awari ona kauai. ³⁶ Mara tagogi oroto wavana Theudas viġavia i vikarei ma i kauana-melei da tauna rava ġaeġaena, ma rava ai maġa 400 nanare tauna i votaġotaġoi. Ma maranaina tauna i viragēni ana tauvotaġotaġo i vilamonei ma aiwai anatapuna kampa i kwa. ³⁷ Wate tauna au murina oroto Galilei wavana Judas i ġeta, census au marana ma rava maġamaġau tauna i votaġotaġoi, ma tauna maiteni i viragēni, ma ana tauvotaġotaġo i vilamonei. ³⁸ Lamna aubaina a ririwemi da wei ravai ona voteretawanei! Mepa da tau i nola ravei, amapo ina peu. ³⁹ Wate mepa da Godei, taumi eġa tagotagogina da wei ravai ona viġaei, taumi mepa da God O viviġaviei.”

⁴⁰ Tai Gamaliel ana babani i voteletelei. Ma Apasol i riwei da i rui, ma i wipiei i kwapui ma i viġaei da Iesu wavanei ina jima, ma i paritawanei da i nae.

⁴¹ Aubaina i aramanei da God tau i vinei da Iesu wavana aubaina ina vinuapoapoe. Anina ma Apasol ana nuaiaii Sanhedrin i opu-tawanei, ⁴² Tai mara patapatana tempol au orana ma au numa God riwana aiaina i raraugugulei ma i viviararamana da Iesu tauna Keriso.

6

Stephen i vinei tauvoaġu

¹ Tauvitumaġana ai boru i rarata, ma au orai mai Jew Greek taubabanieina, mai Jew kampa maemaei i viamparipariei. Tai i beubeura da ai kaikaiababa ai ġuta eġa ita tereterei. ² Anina ma Apasol 12 tauvitumaġana ai boru i raukwatuei. Ma i riwei, “Tauai Apasol ma ai nola lamna God riwana ata jimejime i ma avena mane nolana maiteni ata kaukai. ³ Lamna aubaina au rava, awarimi rava 7 ona vinei, tau i orai

Arua Vivivireina i oai ma nuaulaulai da wei nolana ina kauai,
⁴Ma tauai ai nola da pari ma God riwana ava ana jimei.”

⁵Rava anatapuai wei ogatarana i vianinei, ma Stephen i vinei, Arua Vivivireina orana i oai, ma ana tumaġana God awarina i rata kua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana. ⁶Ma wei ravai i neiai ma Apasol nimai tau i au tepai i terei ma i raupariei.

⁷Anina ma God riwana i vituai ma au Jerusalem rava maġamaġau i Iesu i vitumaġanei, ma nanare pirisi maġamaġau i vitumaġana.

Stephen i pani

⁸Anina ma God Stephen i viaiaini ma i vovai-virewapani da mataira ma kua babai i kaukauei rava awari. ⁹Wate mai Jew ġelau provins nununai i nei mai au Sairini, mai Alexandria, ma Silisia ma Eisia ai parinumana e ġoreġorei panipani *waduboi, Stephen ana ġavia i vomairi. ¹⁰Wate Arua Vivivireina, Stephen nuaulaula ma riwa i verei ma i bababani da tau i vgamopotai. ¹¹Lamna aubaina tau rava ġelau i gwalai da moruei Stephen ita vibenabenamei, ma ita riwa, “Tauai a nonori Stephen, Moses ma God i vivijiboġi.” ¹²Ma lamnei patara i viamlo-ġaiġaini, dogadogara ma tarawatu babadai maiteni. Anina ma tau Stephen i vojijini ma i naiei mai Jew ai Boru Ġeġetelarana† awarina. ¹³Ma tau rava ġelau i neiai da moruei Stephen i vibenabenamei, ma i riwa, “Wei ravana mara patapatana Tempol vivivireina ma Moses ana tarawatu i vivijiboġi. ¹⁴Tauai a nonori i riwa da Iesu Nasaretei tempol ina rikai ma tarawatu Moses i verevereta anatapuai maiteni ina virai.”

¹⁵Ma rava anatapuai nai au boruna i kiakiala, Stephen i 'nana-tunutunui, ma i 'nanai da tauna naona i lalalai me anela.

7

Stephen ana babani.

¹Anina ma Pirisi ġeġetelarana Stephen i paridadanei, “Wei viwavuna, riwa kua bo?” ²*Stephen i paribelei:

Varevareiu ma amamau, au babani ona rautaniġanei. God boruborumana noita Abraham awarina i eġa au Mesopotamia, muriai da ita nae au Haran. ³Ma God tauna i riwei, *Am dobu ma am dam ma netawanei da ma nae dobu*

* **6:9:** Wei ravai lamna slave waduboi, marina i voterei da ana ġoanei e mamae.

† **6:12:** Sanhedrin. ✧ **7:2:** Gen 12:1

ana viatataiem lana. ⁴ ✧ Anina ma Abraham Mesopotamia i netawanei ma i nae da au Haran i mae. Amana i'raḡe ma au murina God Abraham i paritawanei da marina dobuna o mamae lana kampa ita mae, ⁵ ✧ Nai maranaina God eḡa Abraham doa ita verei, eḡa aburu dadadana! Wate i parivainuaḡani, da ina verei tauna ma ana epaepaia aubaii. Nai au marana Abraham eḡa natunatuna, ⁶ ✧ ma God we-nanare Abraham i riwei, *Am epaepaia au dobu ḡela ina mae ma ina vitaunola, nai dobuna ravai tau i rau-iviapoapoelei da madaḡa 400 ina kwa.* ⁷ ✧ *Wate ravai, awarii e vivitaunola ana kovoḡi, ma muriai mai Israel ina opui ma wei au dobuna ina voepaepaiu.* ⁸ ✧ Anina ma God inibori parivai-nuaḡanana bagibagina Abraham maiteni i kauei, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anatapui inii i bori. Wei babadai lamna tauta noinoita.

⁹ ✧ Jacob natunatuna vare i Joseph i unurei ma i gimarei da ita vitaunola au Egypt, wate God tauna awarina i mae. ¹⁰ ✧ Ma ana au nuabola i gagaloei. Ma God nuaulaula i verei ma i kauei da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei. ¹¹ ✧ Ma gomara ḡaeḡaena i ḡeta au Egypt ma au Canaan, ma vinuapoapoe ḡaeḡaena i tupua. Ma noinoita eḡa ai lam. ¹² Ma maranai Jacob i nonori da au Egypt lam, ma noinoita i paritawanei au Egypt, wei ai babara naona. ¹³ Ma muriai i nae me ma wei maranai Joseph i vieḡana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei. ¹⁴ ✧ Anina ma Joseph riwa i paritawanei amana Jacob awarina ma i riwei da ana numa ravai anatapui, ai maḡa 75, ita nei au Egypt. ¹⁵ ✧ Anina ma Jacob i nae au Egypt. Tauna kampa i'raḡe ma nanare natunatuna anatapui. ¹⁶ Taubeui i naiana-melei au Shekem ma Abraham Hamor natunatuna awarii kokoaga i gimagimaraia, kampa i vimataveni.

¹⁷ ✧ Maranai mara i tuḡereḡerei da God Abraham i pariparivainuaḡania ita kauei, ata patara i maḡa guratana au Egypt. ¹⁸ Ma Pharaoh vouna au Egypt i vibada ma tauna noita

✧ **7:4:** Gen 12:4 ✧ **7:5:** Gen 12:7; 13:15; 17:8 ✧ **7:6:** Gen 15:13-14 ✧ **7:7:** Exo 3:12 ✧ **7:8:** Gen 17:10-14; Gen 21:2-4; Gen 25:26; Gen 29:31-35:18 ✧ **7:9:** Gen 37:28; Gen 39:2-21 ✧ **7:10:** Gen 41:39-41 ✧ **7:11:** Gen 42:1-2 ✧ **7:14:** Gen 45:9-10, 17-18 ✧ **7:15:** Gen 46:1-7; Gen 49:33 ✧ **7:17:** Exo 1:7-8

Joseph eġa ita aramanei. ¹⁹ ✧ Tauna amamata i morui ma i rau-iviapoapoelei, i egari da natunatui melamelai numei i viopuni da ita iraġe. ²⁰ ✧ Wei au marana Moses i tupua, tevera inanana aiaina. Amana ma alona natui i ġamoi da nawaravi tonuġa i kwa. ²¹ ✧ Ma maranai tevera numei i tereopunei, gulau natuna guguinina tevera i vaia ma i ġamoi da natuna. ²² Ma mai Egypt ai nuaulaula Moses i viararamani ma i virewapana, babani ma nola awarina.

²³ ✧ Moses ana madeġa 40 ma i nota da ita nae ana dam ravai ita raugenari. ²⁴ Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i viraġeni. ²⁵ Moses i notai da ana rava ita aramanei da God tauna i paritawanei da ita agui da Egypt ita oputawanei. Wate tau i wei eġa ita aramanei. ²⁶ Ma maratonna Moses i nae me ma ana rava ruaġa i viġaiġaiawa i 'nanai, ma i riwei, "Taumi ava ma aiwai aubaina o viġaiġaiawa?" ²⁷ Wate ġaiawa tauvikareina Moses i vokaririei ma i riwei, "Tam ai ai i terem da ma vibadelai bo tauai ai taurauetara?" ²⁸ Tam ma viraġeniu me pom Egyptei u viraġeni nanare bo?" ²⁹ Maranai Moses wei i nonori tauna Egypt i ruba-tawanei ma i nae au Midian, wei eġa ana dobu wate kampa i mae. Muriai dobuna wavi- nena i ravaġi ma natunatuna nelarai ruaġa i tupua.

³⁰ ✧ Ma kampa i mae madeġa 40 i kwa ma BADA ana anela au mutulua ola Sinai au ġereġerena tauna awarina i eġa, inanana me ai menamenana ai aburuna rugurugui au orana i ġeġae. ³¹ Wei i 'nanai ma i baei ma i nae au ġereġere da ai arata ita tuvirevirei ma i nonori BADA i riwa i pa, ³² "Tau amamam ai God, Abraham ma Isaac ma Jacob ai God." Maranai Moses wei i nononori i rovo kaukaua ma naona i tere-govaġi. ³³ Ma BADA i riwa, "Am ae uma ma votawanei! Wei gabuna au tepana e maimairi, lamna doa vivivireina ma Viaiainana. ³⁴ A inanai menanare mai Egypt, natunatu e rarau-iviapoapoelei. Ai ora-tou a nonori ma a ġairai da tau i ata vai-tawanei. Ma marina ma nei, Tau ana paritawanem au Egypt."

³⁵ ✧ Stephen i riwa:

Wei Moses na tagogina, mai Israel i parivirevirei i pa, "Ai ai i terem da tauai ma vibadelai ma ma rauetarelai?" Moses i paritawaneiai da ita vibademi ma ita tereopunemi, anela i eġaeġa ai menamenana au poui, ana aguei. ³⁶ ✧ Ma Moses tau i Egyptei i ravena-opunenei ma mataira babai

ma vivirewapanai i kaukauei au Egypt, Boga lebalebarina ma ai au vaḡai madeḡa 40 au mutulua. ³⁷ ☆Wei Moses-na tagogina, mai Israel i riwei, “God muriai peroveta ami damei ina paritawaneiai me tau.” ³⁸ ☆Moses Israel patarana maiteni Egypt i opu-tawanei i vitagogiei au ola Sinai ma anela Moses awarina i bababani, tauna kampa noinoita maiteni. Ma riwa mamae-nonoana i nonori ma wei lamna i veredamanei tauta awarita. ³⁹ Wate noinoita Moses i parivirevirei ma au orai i ḡoei da ita nae me au Egypt. ⁴⁰ ☆Ma tau i Aaron i riwei, “Nai ravana Moses, Egyptei i taravai-opunelai, tauai eḡa ata aramanei aiwai awarina i tupua. Ma tauai ai god kokoitau ma kauai da ina rauetaraveniai.” ⁴¹ ☆Anina ma bulumakau ḡaubona kokoitauna i kauai, ma pulo i apui awarina ma i amei ma i umei, da aiwai uraiei i kaukauei i vimae-ḡaeḡaeni. ⁴² Wate God tau i mae-puputei ma i voterei da ubona ma nawaravi ma madeḡa au mara i vimae-ḡaeḡaeni. Wei lamna peroveta nununai i ririweia i tupua:

Rava mai Israel! Maranai madeḡa 40 au mutulua.

Taumi eḡa Tau awariu ḡamoḡamo ota vunui ma ota apui tapa?

⁴³ *Taumi ami god Molek ana numa gara ma ami ubona god kokoitauna Rephan o avarai.*

Kokoitau o kauai da ota vimae-ḡaeḡaeni.

Lamna aubaina rava borui ami au dobu ina vainimi ma ina naiemi aueia,

Babilon ina netawanei da dobu au ḡelauna. (Amos 5:25-27)

⁴⁴ ☆Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare. ⁴⁵ Muriai Joshua noinoita i rau-etaraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

⁴⁶ ☆God, David nuanuana i vai-kauai ma David i vibaḡa da tauna God ana numa ita voai. ⁴⁷ ☆Wate David eḡa numa ita voai ma natuna Solomon numa i voai. ⁴⁸ Wate God ḡeḡetelerana eḡa rava uranei numa ita voavoai au orana ita mamae, me peroveta wariḡa i riwa i pa:

⁴⁹⁻⁵⁰ *Aubaina Tau aiwai anatapuna au mara ma au dobu a kauai. Tapa?*

BADA i riwa, “Mara au anikiala*

☆ **7:37:** Deu 18:15, 18 ☆ **7:38:** Exo 19:1–20:17 ☆ **7:40:** Exo 32:1 ☆ **7:41:** Exo 32:2-6 ☆ **7:44:** Exo 25:9, 40 ☆ **7:46:** 2Sa 7:1-16 ☆ **7:47:** 1Ki 6:1-38

* **7:49-50:** Wei anona lamna Bada wenanare natuna i riwei, “Tam au oieu ma kiala ma am ḡavia au ae kareu ana tuvaidoedoei”

ma dobu aeu kareu aniterenana.

Wate numa aiwaina ona voai tau aubaiu? Eḡateni!

Tau au animae-kaua mepa? Eḡa mepa! (Isaiah 66:1-2)

51 Ma Stephen i riwa:

Taumi orami badobadoi. Ma eḡa ota ḡoeḡoei da God ona voteletelei ma taniḡami o vopotai da ana riwa eḡa ota nononori. Taumi Arua Vivivireina o viviḡaviei me noinoimi i kaukauei nanare. 52 Noinoimi metau i perovetai eḡa ita rau-iviapoapoelei. Wariaḡa perovetai, God ana tauvilawana, ana nei i vinolenolei; Wate noinoimi wei perovetai maiteni i viraḡeni. Ma marina Tauna i nei ma o vibenabenamei ma o viraḡeni. 53 God ana anela i paritawaneiai da ana tarawatu noinoita i verei, wate taumi tarawatuna eḡa ota voteletelei.

Stephen ḡaime i viraḡeni

54 Maranai babada wei riwana i nonori ma i meji guratana ma ivoi i uta-ḡiriḡiriei Stephen awarina. 55 Wate Arua Vivivireina Stephen orana i oai, i taepai au mara ma God ana boruma i 'nanai, ma Iesu God au oiena i maimairi. 56 Ma i riwa, "Ona inana! Mara metaetana i wanatawanei ma Rava Natuna a inainanai God au oiena e maimairi." 57 Marina tau i anatapui taniḡai i vopotai, i vigaragarei ma Stephen aubaina i ruba, 58 ma i taina-opunei au doa, taon i opu-tawanei da au ririva ma ḡaime i ravina i vikarei. Ma tauviwavu ai kwama i votawanei ma tevera laragana wavana Saul au aena i vidamni. 59 Tau i virauraei ma tauna i raupari i pa, "BADA Iesu, aruau ma vaia! 60 Ma ae-tutunei i peu ma i garara, "BADA ai ḡo'apoapoe ma notatawanei." Wenanare i riwa ma i'raḡe.

8

1-2 Ma Saul kampa da Stephen ana iraḡe i 'nanai ma i vianinei. Rava patupatutui ḡelau i ana toutoui ma ana tarakwatui i nei ma Stephen taubeuna i naiei ma au kokoaga i terei.

Saul Ekalesia i rau-iviapoapoelei

Nai maranaina rau-iviapoapoe ḡaeḡaena i vikarei ekalesia awarii au Jerusalem, Ma anatapui i viruba-tomana au Judea provins ma Samaria provins. Apasol ava au Jerusalem i mae. 3 ☆Wate Saul i vikarei da ekalesia ai boru ita viamoai. Numa anatapui i ruini ma nelara ma waivine i taina-opunei ma i paritawanei au panipani-numana.

Philip au Samaria

☆ 8:3: Act 22:4-5; 26:9-11

⁴ Wate tauvitumaḡana Jerusalem i rubaruba-tawanei taon ma dobu anatapuna i naeni ma Riwana Aiaina i raugugulei. ⁵ Ma Philip i nae au taon tagogi au Samaria ma kampa BADA ana Vinevine Keriso i raugugulei. ⁶ Maranai patarana, Philip i raraugugula i nonori, ma i 'nanai kaua babai ma mataira ḡaeḡae i kaukauei tau i anatapui orai taputapunei i rautaniḡana. ⁷ Tauna arua-apoapoei rava maḡamaḡau i orai i egari da ana garagararai i viopuopuana, ma nanare rava maḡamaḡau gwaḡagwaḡai ma sigesigei i vilawani. ⁸ Ma nuai i ḡaeḡaena i mae nai au taona.

Simon tauna barabaravuna

⁹ Wenanare, nai au taona oroto tagogi i mae wavana Simon, ma tauna wariḡa ava ana baravu i kaukauei ma mai Samaria i baibaiei. Ma i voepaepana-melei da tauna rava ḡaeḡaena. ¹⁰ Rava labalababa, ma wavai naenaei anatapui ana babani i rarautaniḡana-kauai ma i ririwa, “Tauna, God ana rewapana e ḡoreḡorei, Rewapana Ḡaeḡaena.” ¹¹ Tau i vineneḡanana-kauai aubaina mara nonoa tau Simon ana baravu i baebaei. ¹² Wate tau Philip i vitumaḡanei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da i babataito. ¹³ Simon maiteni i vitumaḡana ma i babataito. Ma Philip mepa i nene tauna kampa aubaina kaua babai ma mataira vivirewapanai i kaukauei. Tauna wei pulona i bana-kauai.

¹⁴ Maranai Apasol au Jerusalem i nonori da mai Samaria, God Riwana i vitumaḡanei, tau Peter ma John i paritawanei awari. ¹⁵⁻¹⁶ Ma au Samaria i ḡeta ma tau i raupariei da Arua Vivivireina ita rui au orai. Aubaina tau Iesu wavanei ava i babataito. Ma arua vivivireina eḡa ita rui. ¹⁷ Peter ma John urai tau i tepai i terei ma i raupari da Arua Vivivireina au orai i rui. ¹⁸ Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi, ¹⁹ ma i vibaḡa i pa, “Tau maiteni nai rewapanana ma vereu da rava au kolai urau ana terei ma tau Arua Vivivireina ina vaia.” ²⁰ Wate Peter i paribelei i pa, “Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimarai! ²¹ Tam wei nolana au orana am gabu eḡa ita mamae, aubaina oram eḡa ita ai God au matana. ²² Am nota apoapoe ma votere-tawanei. Ma mae-tavirem BADA awarina ma ma vibaḡai da am nota apoapoe ina nota-tawanei. ²³ Aubaina a inanaim da unura oram i oai tauai awariai ma wei notai apoapoei e panipanim.” ²⁴ Simon marina Peter ma John i riwei, “Aubaiu BADA awarina ona raupari da aiwai o ririwei eḡa ina tupua awariu!”

25 Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i ġeta au Jerusalem.

Philip ma Ethiopiei

26 Mara tagogi BADA ana anela, Philip i riwei, “Ma vokaukaua ma ma nae au rauanaġei, etanai au Jerusalem da e ġaiġaira au Gaza.” (Wei etanaina lamna au mutulua). 27 Anina ma Philip i vokaukaua ma i nae. Ma wei au etanaina oroto Ethiopiei i ’nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina, 28 ma i nena-me ana au dobu. Ma ana au chariot i kiala ma wariġa peroveta Isaiah buka i girugirumia i ’aiavi. 29 Ma Arua Vivivireina Philip i riwei, “Ma nae ma chariot au ririvana ma babara-nae.” 30 Anina ma Philip i ruba chariot au ririvana ma i nonori badana peroveta Isaiah ana buka i ’aiavi. Ma Philip i paridadana, “Aiwai e iaiavia e araramanei bo eġa?” 31 Orotona i paribelei, “Menanare ana ’ramananei mepa da rava eġa ita parivai-araramani!” Ma Philip i vibaġai da i ġeta da au ririvana i kiala. 32 Buka au orana, wei riwana i ’aiavi,

*Tauna i taravaina-naiei me sipu viraġenana aubaina
me sipu natuna e genugenuana maranai aparana e boribori,
tauna eġa aiwai ita latoni.*

33 *Tauna i vijiboġi ma i vinimalamalai ma eġa ita kauana-kauei awarina.*

Aiai ana epaepaia ina babaniei.

Aubaina ana mara au dobu i waitawanei.” (Isaiah 53:7-8)

34 Ma orotona, Philip i paridadanei, “Isaiah e babaniana-melei bo rava ġelauna e babaniei?” 35 Ma Philip, wei riwana awarina i vikarei ma riwa ġelau maiteni mā Iesu Riwana Aiaina i vjararamani. 36 Ma i nena da waira i ’nanai ma Ethiopiei i riwa, “Ma inana waira noi, aiwai aubaina da eġa ana babataito?” 37 * 38 Badana, chariot taurubeina i riwei, “Chariot ma vojijini” Ma tauna ma Philip i ġaira waira au orana ma Philip, badana i babataitai. 39 Maranai wairei i ġeta, BADA Aruana maratagogi Philip i vai-tawanei ma turana eġa ita inana-melei, ma ana morelanana i nae ana au dobu. 40 Wate Philip au Asotus i raueġa ma dobuna i naeni ma Riwana Aiaina i raugugulei da au Caesarea taon i ġeta.

9

Saul i vitumaġana

* 8:37: Buka wadubo nonoana vs 37 eġa ita mamae.

¹ Wate Saul amapo da i mejimeji ma i gōeḡoei da BADA ana tauvitumaḡana ita viragēni. Ma i nae Pirisi Ḡetelarana awarina, ² ma i vibaḡai da pepa ita girumi boru-numai babadai awarii au Damaskas da rewapana ita verei da Iesu ana etanai tauvitu- maḡanai, nelara ma waivine ita pani ma ita neiai au Jerusalem. ³ Ma Saul, Damaskas i tuḡereḡerei, nanare ma lalalaina marei i ḡairai da tauna i ravilalai. ⁴ Tauna i peu au doa ma pona i nonori awarina i babani i pa, “Saul, Saul! Aiwai aubaina e rarau- iviapoapoeleu?”

⁵ Saul i paridadana, “Tam aiai bada?”

Ma pona i paribelei, “Tau Iesu, tauna e rarau-iviapoapoelei! ⁶ Marina ma vomairi ma ma rui au Damaskas, ma kampa aiwai ina riwem ma kauēi.”

⁷ Nelara Saul maiteni i nēnae i mairi kwakwa, ana gamopotai, tauī pona i nonori wate eḡa aiai ita inanai. ⁸ Ma Saul au doa i matamatave i vomairi ma matana i kala, wate eḡa aiwai ita inanai. Ma ana rava i raunimavoai ma i taravaina-naiei au Damaskas. ⁹ Ma au pom tonuḡa eḡa ita inana, eḡa ita am bo ita uma.

¹⁰ Au Damaskas tauvitumaḡana i mae wavana Ananias. BADA ana au inana i viatataiei i pa, “Ananias!”

Ma i paribelei, “Bada, tau weka!”

¹¹ BADA tauna i riwei, “Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu. ¹² Ma ana au inana i ’nanai oroto wavana Ananias i nei awarina ma urana au inina i terei da ita inana-me.”

¹³ Wate Ananias i paribelei, “Bada, rava maḡamaḡai i riweu da wei ravana ana kaua i apoapoe kaua tauvitumaḡana awarii au Jerusalem! ¹⁴ Ma weka i nei pirisi ḡaeḡaei ai rewapanei da aiai wavam e viviborumei ina pani.”

¹⁵ Wate BADA, Ananias i riwei, “Ma nael! Tau a vinei da aubaiu ina vitaunola ma wavau ina jimei, Jentail ma ai gulagulau awarii ma nanare mai Israel awarii. ¹⁶ Tau ana viatataiei da aubaiu ina jima ma rau-iviapoapoe ḡaeḡaena ina nei awarina.”

¹⁷ Anina ma Ananias i ḡeta au numa ma i rui. Ma urana Saul au tepana i terei ma i riwei, “Vareiu Saul, BADA Iesu, Tauna au etanai awarim i eḡa maranai weka u nenei, i paritawaneu awarim da ma inana me ma Arua Vivivireina oram ina vioai.”

¹⁸ Maratagogi purapura inanana me iana wenavina au matana i peu, ma tauna, inana me. Ma i vomairi ma i babataito.

¹⁹ Ma i am ma ana rewapana i vai-melei.

Saul au Damaskas i raugugula

²⁰ Ma tauna maratagogi i nae ma pari au numai i raraugugula da Iesu anina God natuna. ²¹ Tauī aiavoi da Saul i nonori

i ba kua ma tau i ava i babani vivira i pa, “Wei ravana tagogina, rau-iviapoapoe gāeāena Iesu ana tauvitumaāana awarii i kaukauei au Jerusalem bo? Tauna i nei weka nolana tagogina aubaina da tauvitumaāana ita pani ma ita naiei Pirisi babadai awarii bo.” ²² Wate Saul ana raugugula i virewapana kua ma lamnei mai Jew au Damaskas i aramanei da Iesu anina Keriso, Vinevinena, ma lamna aubaina ana babani eāa ita parivirevirei.

²³ Ma au pom biāa au murina Jew babadai i viogatara da Saul ita virāeni. ²⁴ Mai Jew marai ma waguvarai taon garina au metaetana i vipaipai da Saul ita virāeni. Wate Saul ai ogatara riwana i nonori. ²⁵ Ma waguvarai tauvitumaāana i gēlāui ai bada Saul i taravaini ma iriga gāeāena au orana i poai ma gavogavo aburuna taon au garina, kampa gūravei i teregāirei au doa ma i ruba.

²⁶ Saul i gēta au Jerusalem ma maranai i gōei da tauvitumaāana ai au boru ita rui. Wate tau i rovoei ma eāa ita vitumaāanei da tauna Iesu ana tauvotaāotaāo. ²⁷ Wate Barnabas tauna i taravaini ma i naiei Aposol awarii, ma i riwei menanare au etanai Saul, BADA i nanai ma aiwai awarina i babaniei. Ma menanare au Damaskas ana tepatorana i raugugula Iesu wavanei. ²⁸ Anina ma tau Saul i taravaini ma maiteni i mae ma Jerusalem i naeni ma ana tepatorai i raugugula BADA wavanei. ²⁹ Ma nanare Saul mai Jew pona Greek taubabanieina maiteni i babani ma i vipariparigai, ma tau i viogatara da tauna ita virāeni. ³⁰ Maranai tauvitumaāana gēlāui wei i nonori, ma Saul i taravaina-naiei au Caesarea da i paritawanei au Tarsus.

³¹ Anina ma ekalesia au Judea, Galili ma Samaria ana nuubaii i mae. Ma Arua Vivivireina ana ageuei ekalesia ai tumāana i vovai-virewapani, Ma ai boru i rarata, ma tau BADA i vivirana-kauei.

Aeneas ma Dorkas

³² Nai maranaina Peter dobu maāamaāgai i naeni, ma God ana tauvitumaāana awarii i gēta au Lidda. ³³ Kampa oroto wavana Aeneas i nelaāai, tauna gwaāagwaāana madeāa 8 ana au aravi i matave. ³⁴ Peter i riwa, “Aeneas, Iesu Keriso i vilawanim! Ma vomairi ma am aravi ma noui!” Ma maratagogi i lawana. ³⁵ Anina ma rava maāamaāgai au Lidda ma Sharon wapuna melagaina, i mae-tavirei BADA awarina.

³⁶ Au Joppa tauvitumaāana tagogi wavana Tabitha (Greek ponanei lamna Dorkas) tauna marana patapatana kua maāamaāgai aiāi i kaukauei molamokai aubaii. ³⁷ Wei marana

tauna i doria ma i'raḡe ma tupuana i oḡai ma numa vatavatara au aidamo, i vimataveni. ³⁸ Lidda, lamna Joppa au ḡereḡerena ma maranai tauvitumaḡana i nonori da Peter au Lidda, tau i rava ruaḡa i paritawanei da Peter i egari i pa, "Laḡilaḡina ma nei!"

³⁹ Ma Peter tau i maiteni i nae da i ḡeta ma i taravaina-ruiei au numa vatavatara. Kaikaiababa maḡamaḡau ana toutoui Peter i mairi kwaviviroi. Maranai Dorkas lawalawaina ma kwama da gara i popopoia Peter i viatataiei.

⁴⁰ Wate Peter anapui i vibaḡai da i opu au doa, ma aetutunei i mae-ḡaira ma i raupari, ma taubeu i riwei, "Tabitha, ma vomairi!" Tabitha matana i kala ma maranai Peter i 'nanai, i vomairi da i kiala. ⁴¹ Peter urana i viloloi ma i voagui da i vomairi. Ma tauvitumaḡana anapui ma kaikaiababa maiteni i kwatueiai, ma wavine lawalawaina tau i verei. ⁴² Ma wei riwana dobu Joppa i naeni ma rava maḡamaḡau Iesu i vitumaḡanei. ⁴³ Peter au Joppa i mae au pom biāḡa nanare Simon ḡamoḡamo opina taurauḡaroḡroeina ana au numa.

10

Peter ma Cornelius

¹ Au Caesarea oroto* wavana Cornelius, tauna mai Italy sorodia boruna ai bada. ² Tauna rava jijimanina ma patupatutuna, ma ana numa ravai maiteni God taurauduneleina. Ma molamolakai i paipaina-kauei ma marana patapatai i raraupari God awarina. ³ Au bigai tagogi 3 oklok nanare i raraupari ma ana au inana, God ana anela au aiaina i 'nanai, i nei awarina ma i riwa, "Cornelius!"

⁴ Cornelius ana rovona anela i 'nana-tunutunui ma i riwa, "Au bada, menanare!"

Ma anela i paribelei, "Am pari ma am verena molamolakai awarii, i ḡeta God awarina me pulo apuapunana ḡabuna. ⁵ Ma marina nelara ḡelau ma paritawanei au Joppa ma ravana wavana Simon wavana ḡelauna Peter ina taravainiai. ⁶ Tauna rava wavana Simon, ḡamoḡamo opina taurauḡaroḡroeina awarina e mamae gera au ririvana."

⁷ Maranai anela i nae, Cornelius ana taunola ruaḡa i ḡoreiai, ma ḡelauna lamna sorodia, tauna ana tauvipaipai, tauna God tauvitumaḡaneiana. ⁸ Tauna aiwai anapuna tau i riwei ma i paritawanei au Joppa.

Peter Cornelius i raugenari

⁹ Maratomna au benai nanare maranai nelarai Joppa i tuḡereḡerei, Peter i ḡeta numa au tepana da ita raupari. ¹⁰ Ma

* 10:1: Wei ravana jentail.

am i 'raḡe ma i ḡoei da aiwai ita ani, maranai tau lam i vovokaukauei, ma Peter matanei rauboni i 'nanai. ¹¹ I 'nanai mara i wanatawanei ma purapura inanana me puru ḡaeḡaena au adana 4 i vojijini ma marei i tere-ḡaireiai au dobu. ¹² Au orana lamna sia tapuna ma tapuna, tetetei me mota ma kiu au aidamo lavelavei. ¹³ Ma pona i riwa, "Peter ma vomairi, ma virāḡena ma ma am!"

¹⁴ Wate Peter i paribelei, "Eḡa! Lamna eḡa melanai ana kauei. Eḡa melanai lam viviḡana ata am-dadani."

¹⁵ Wate pona i babani me, "Aiwai God i viviaiainia, eḡa ma riwa da i apoapoe."

¹⁶ Mara tonuḡa wenanare i tupua ma me marana puruna i ḡaiana-melei au mara.

¹⁷ Ma Peter aiwai i 'nainanai anona i vinua-notenotei, nanare ma Cornelius nelara i paripari-tawanei, tau Simon ana numa i nelaḡai ma i ḡeta ana au metaeta. ¹⁸ Tau i paridadana, "Weka rava wavana Simon-Peter e mamae bo eḡa?"

¹⁹ Peter amapo da wei i vivinua-notenotei maranai Arua vivivireina i riwa, "Simon, nelara tonuḡa e baibaieim! ²⁰ Lamna aubaina ma vomairi ma ma ḡaira au gabaura, eḡa ma geduai, aubaina tau a paritawanei awarim."

²¹ Peter i ḡaira ma awarii i riwa, "Taumi tau o baibaieu bo, Ami ḡoana aiwai?"

²² Ma nelarai i paribelei, "Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maḡamaḡau tauna e vivivirei. Anela vivivireina i riwei da uta nei ana au numa da aiwai u araramanei uta riwei." ²³ Ma Peter nelarai i ḡorei da i rui au numa ma kampa i matave.

Peter Cornelius ana au numa

Ma maratamna anatapui i nae, Tauvitumaḡana ḡelau i au Joppa maiteni i vomairi. ²⁴ Ma au pom ḡelauna tau i au Caesarea i ḡeta. Cornelius tau i paipaini, ma ana numa ravai ma ana rava i ḡorei da i nei. ²⁵ Ma maranai Peter i ruirui au numa, Cornelius Peter i 'nanai ma i mae-ḡaira au ae karena ma ana vivirana i raudune. ²⁶ Wate Peter tauna i voepai ma i riwa, "Ma vomairi, Tau rava ota me tam."

²⁷ Peter ma Cornelius i bababani ma i ruirui au numa. Ma i 'nanai da patara tauna i paipaini. ²⁸ Peter tau i riwei, "Taumi o aramana-kauei da tauta mai Jew ata tarawatu e viviḡaeta da Jentail maiteni tana mae-gogona bo tana raugenari. Wate God i viatataieu da eḡa rava ana ḡorei rava apoapoena bo miramirana. ²⁹ Lamna aubaina maranai u vibaḡaiu da ata nei, Tau

au nota aiainei a nei. Tau ata pari-dadanem, Marina ma riweu aiwai aubaina au riwa u paritawanei?”

³⁰ Cornelius i paribelei, “Au benai wenanare au pom 4 marina i kwa, au numa a raraupari, nanare ma rava ana gara ararapoirina ma namanamarina au naoiu i raumairiei. ³¹ Ma i riwa, Cornelius! God am pari i nonori ma am verena molamolakai awarii i vinuaiaiei! ³² Ma nelara ma paritawanei au Joppa da Simon e ġoreġorei Peter awarina. Tauna Simon, ġamoġamo opina taurauġaroġaroena ana au numa e mamae.’ ³³ Lamna aubaina da am riwa laġilaġina ava a paritawanei, ma i ai da tam u nei. Tauai anatapuiai marina weka God au matana a vivipaipai da BADA aiwai i riwem ana nonori.”

Peter ana babani

³⁴ Ma Peter babani i raukarei, “Marina a inana-kauei da God rava anatapui e vaivaia da tagogina. ³⁵ Wate dobu dobuai ravai God e vivivirei ma kua aiiai e kaukauei, Tauna wei ravai e ġoeġoei, ³⁶ Taumi o aramanei God Riwana Aiaina i paritawanei mai Israel awarii da rava ina mae-kaua God maiteni, maranai Iesu Keriso ina vitumaġanei ma tauna ai lawana ina vibadei. ³⁷ Taumi o aramanei Iesu aiwai i kauei Judea au anataputa, au Galili i vikarei maranai John babataito ai kua i raugugulei. ³⁸ God Arua Vivivireina ma rewapana Iesu Nasaretei i verei da dobu maġamaġgai i naeni ma kua aiiai i kaukauei, ma rava au orai arua apoapoe i rui ruini, i vilawani.

³⁹ —Aiwai anataputa au Judah provins ma au Jerusalem i kaukauei tauai anatapuiai a vimatematei ma a bababaniei. Tauna au korosi i tutui da i’raġe. ⁴⁰ Wate God tauna iraġelei i voepa-melei aupom au vitonuina ma i kauei da ġelauai awariai i eġa. ⁴¹ Eġa rava maġamaġgai tauna ita inanai, anina tauvimatamata i vinevinei awari ava i ġeta. Lamna tauai maiteni a uma ma am ana vomairi au murina. ⁴² Ma i egariai da dobu au anataputa ana raugugula ma ana jima da God Iesu i vinei da rava anatapui lawalawaii ma irairaġei ina rauetarei. ⁴³ Peroveta anatapui i jimei da maranai rava Iesu i vitumaġanei, Tauna wavinei God tau ai ġo’apoapoe ina vaitawanei.”

⁴⁴ Maranai Peter i bababani ma Arua Vivivireina i ġairai ma rava i raurautaniġana i vioai. ⁴⁵ Ma mai Jew Joppei i nenei Peter maiteni, i ba kua maranai God Arua Vivivireina i paritawana ġairei Jentail awarii. ⁴⁶ Au baina mai Jew i nonori taui pona tapunei i bababani ma God i vivimae-ġaeġaeni. Anina ma Peter i riwa, ⁴⁷ “Tau i Arua Vivivireina i vaia me tauta. Wei lamna aubaina eġa aiiai ina viġaeta da wei ravai tana babataitoi.” ⁴⁸ Ma tau Cornelius ana numa ravai maiteni ma ana rava ġelau

Iesu Keriso wavaneī i babataitoi, ma tauī Peter i vibaḡai da maiteni ita mae mara aburuna.

11

Peter ana babani

¹ Apasol ma tauvitumaḡana au Judea provins i nonori da Jentail maiteni God riwana i nonori ma i vitumaḡana. ² Ma maranai Peter i ḡeta me au Jerusalem tauvitumaḡana mai Jew ḡelauī tauna i eni i pa, ³ “Tam Jentail ai au numa u rui, ma maiteni u am!”

⁴ Anina ma kaua menanare i tuputupuaneī anatapuna Peter tauī i pariverei: ⁵ I riwa i pa:

Maranai a raraupari au Joppa ma matauei kaua a inanai, ma purapura inanana me puru ḡaeḡaena adana 4 i vojijini ma marei i tere-ḡaireiai awariu. ⁶ Au orana a inana lamna ḡamoḡamo maramaraḡamai ma moduei, tetetei me mota ma kiu au aidamo lavelavei. ⁷ Ma pona a nonori i pa, “Peter ma vomairi, ma viraḡena ma ma am!”

⁸ Tau a paribelei, “Eḡa! Lamna eḡa melanai ana kauē. Eḡa melanai lam viviḡana ata am-dadani.”

⁹ Wate pona marei mara viruaina i babani, “Aiwai purapurana God i riwa da i ai, tam eḡa ma riwa da i apoapoe.”

¹⁰ Mara tonuḡa wenanare i tupua, ma puruna i ḡaiana-melei au mara.

¹¹ Nai maranaina mai Caesarea ai rava tonuḡa i paripari-tawaneiai, au metaeta i raumairiei. ¹² Ma Arua Vivivireina i riweu da eḡa aiwai ana notai ma orau taputapuneī ana nae. Mai Joppa tauvitumaḡana 6 maiteni a nae ma ravana ana au numa a rui. ¹³ Cornelius i riwelai da anela awarina i eḡa, ma i riwei, “Rava ma paritawaneī au Joppa da rava wavana Simon Peter ina neiai.” ¹⁴ Tauna wei riwana ina neiai ma lamnei tam ma am numa ravai maiteni ina vilawanimi.

¹⁵ Ma babani a raukarei ma Arua Vivivireina i ḡairai da tauī i vioai me au naona awarita i tupua nanare. ¹⁶ ✧ Anina ma Iesu aiwai i ririwei a notai, “John wairei i babaito, wate taumi Arua Vivivireinei ina babaitoimi.” ¹⁷ Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaḡaneī, ma tau aiāi da God ata viḡaei?

¹⁸ Tauī i vīgamopotai maranai wei i nonori, ma God i viborumei i pa, “Riwa kaua da God Jentail maiteni i vianinei da ina rupena ma ina lawana.”

Ekalesia au Antiok

¹⁹ ✧ Ekalesia ḡelauī rau-iviapoapoe i rovoei maranai Stephen

i viraḡeni ma i vilamonei au uama. Ḡelau i ruba nae au Phonisia, au Saipras ma Antiok, ma kampa Iesu Riwana Aiaina i raugugulei mai Jew ava awarii. ²⁰ Wate ekalesia ḡelau mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei. ²¹ BADA ana rewapana tau i orai i mae ma Jentail maḡamaḡau i vitumaḡana ma i mae-tavirei BADA awarina.

²² Wei riwana i ḡeta ekalesia awarii au Jerusalem, ma tau i Barnabas i paritawanei au Antiok. ²³⁻²⁴ Maranai i ḡeta ma i 'nanai da God ravai i viaiaina-kauei, tauna i vinuai ai ma i egari da BADA awarina ina vipatutu orai taputapunei. Barnabas tauna rava aiaina, Arua Vivivireina orana i oai ma ana tumaḡana i rata, ma God ana aguiei, i rauguga ma rava maḡamaḡau i taini BADA awarina.

²⁵ Ma Barnabas i nae au Tarsus da Saul ita baiei. ²⁶ Ma i nelaḡai ma i nei ai au Antiok, ma kampa tauvitumaḡana maiteni i mae madeḡa tagogi i kwa, ma patara ḡaeḡaena awarii i viararamana. (Weka au Antiok lamna i vikarei da tauvitumaḡana i viḡorei Kerisiana)

²⁷ Wei au marana peroveta ḡelau Jerusalem ei i ḡairai. ²⁸ *Peroveta tagogi wavana Agabas i vomairi ma God ana rewapanei i vieḡa da gomara e nenei au naoii dobu au anatapuna (Caesar Claudius ana vibada au marana gomarana i nei). ²⁹ Tauvotaḡotaḡo au Antiok i vianina da tau i ava ita kauana-guratei da mane vounaina ita kauei da ai rava ekalesia au Judea ita voagui. ³⁰ Tau i nanare i kauei ma manena Barnabas ma Saul au urai i terei ma tau i ekalesia ai babada au Jerusalem i verei.

12

James i viraḡeni ma Peter i pani

¹ Lamna maranai, gulau Herod Agrippa* i raukarei da ekalesia ḡelau i rau-iviapoapoelei. ² James, John tuana uana sodei i bori-tuini. ³ Ma maranai Herod i 'nanai da mai Jew wei kauana i vinuai ai ai, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua. ⁴ *Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i ḡoei da Peter ita vojijini da raḡona torelana au murina ma au deba ita rauetarei. ⁵ Ma

* **11:28:** Act 21:10 * **12:1:** Tauna gulau Herod 1 ḡoḡana. * **12:4:** Exo 12:1-27

lamna aubaina Peter au pani numana i vojijini mara aburuna. Wate ekalesia i raraupari guratana God awarina Peter aubaina.

Peter pani numanei i tere-opunei

⁶ Ma nai waguvaraina, ma maratamna da Peter ita rauetarei, Peter sorodia ruağa au poui i matamatave. Urana seinei i raġini sorodia ruağa au urai, ma sorodia ġelau i metaeta i vipaipai.

⁷ Maratagogi BADA ana anela i eġa ma pani numana i ravilalai. Ma Peter i vogugui da matana i kala ma i riwei, “Laġilaġina ma vomairi!” Ma sein au urana i dabarara. ⁸ Ma Peter i riwei, “Ma vigara ma ae uma ma oteni.” Ma nanare i kauai. Ma i egari, “Am kwama potopotona ma oteni ma ma votaġotaġoiu.”

⁹ Peter anela i votaġotaġoi da pani numana i opu-tawanei, wate eġa ita aramanei anela aiwai i kaukai, tauna i notai i rarauboni. ¹⁰ Tau i sorodia boruna ruağa au doa i netawanei, da i opu au metaeta iramei, wei e opuopu au taon. Metaeta ainelana i wanatawanei aubaii ma i opu. Tau i etanai tagogi i ġairani ma maratagogi anela tauna i voterei.

¹¹ Peter ana nota i nememei ma i riwa, “Wei anina riwa kaua! BADA ana anela i paritawaneiai da Herod au urana i vaitawaneu, da mai Jew aiwai i notanotai da ita tupua lamna eġa ita tupua.”

¹² Maranai ana nota i nememei tauna i nae Mary ana au numa. (Mary lamna John alona. John wavana ġelauna Mark). Kampa rava maġamaġau i vitagogiei ma i raraupari. ¹³ Peter au metaeta i raupewapewa ma taunola wavana Rouda i nei da metaeta ita votawanei. ¹⁴ Ma Peter ponana i nonori ma i aramanei da tauna, ma i vinuaii guratana da eġa metaeta ita votawanei ma i ruba-rui da i vinolanola i pa, “Peter au metaeta e maimairi!”

¹⁵ Wate tau i eġa ita vitumaġanei ma i riwei, “Tam ma bubua!” Wate tauna i riwa bagibagi. Ma tau i riwa, “Nai Peter ana anela.”

¹⁶ Wate Peter i rarau-pewapewa ma maranai tau i metaeta i votawanei ma i nanai da tauna, tau i orai i auepai.

¹⁷ Peter urana i voepai da rava i genuana ma i riwei menanare BADA pani numanei i tere-opunei. Ma i riwei, “James[†] ma ekalesia ġelau wei ona parivere.” Ma Peter i nae au dobuġela.

¹⁸ Maranai mara i tom kampa au pani numana nuabola ma vinuanaina ġaeġaena i peu sorodia awarii da aiwai i tupua Peter awarina ¹⁹ Herod, ana sorodia i egari da Peter i bai i wate eġa ita nelaġai. Lamna aubaina sorodia 16 i etarei ma i viragēni. Muriai Herod Judea i netawanei ma i nae au Caesarea da ita mae mara aburuna.

† 12:17: Iesu ana tevera

Herod iraḡe

²⁰ Marina Herod amlona i ḡaiḡai kaua Taia ma Sidon ravai awarii, lamna aubaina tauī ana borui i nei da Herod maiteni wei i babaniei. Tauī Herod ana taunola ḡaeḡaena Blastus, i taravaini da ita voagui. Tauī rom i vibaḡei Herod maiteni. Aubaina ai lam Herod ana dobuei i nenei. ²¹ Ma marana i ḡetai da Herod maiteni ita viboru ma tauna ana vigulau garana i vigarei ma ana au anikiala i kiala ma awarii i babani. ²² Ma patara ana babani i nonori ma i logoi i pa, “Wei lamna god e bababani ma eḡa rava!”

²³ Maratagogi BADA ana anela Herod i vipeuni au doa ma motamota orana i ani da i’raḡe, aubaina tauna rava ai voepaepa i vinuaiaiei ma eḡa rava ita riwei da BADA ita voepaepai.

²⁴ Ma ekalesia BADA riwana i raraugugulei ma rava maḡamaḡai i nenei BADA awarina ma ekalesia i rarata. ²⁵ Maranai Barnabas ma Saul ai nola au Jerusalem i vikwai, tauī John-Mark i taravaini da maiteni i nei au Jerusalem.

13

Barnabas ma Saul i viaiaini ma i paritawanei

¹ Kerisiana au Antiok au orai peroveta ma taugiu wavai wenanare, Barnabas, Simeon (e ḡoreḡorei Gawara), Lusias Sairinie, Manaen (Tauna gulau Herod Antipas maiteni i rata tagogi), ma Saul. ² Mara tagogi maranai tauī i ujiuji ma BADA i vovoepaepai ma Arua Vivivireina i riwa i pa, “Tau, Barnabas ma Saul a vinei, ona tereriei au nola aubaina.” ³ Anina ma uji ma pari au murina tauī urai Barnabas ma Saul au tepai i terei ma God ruaḡai i viaiaini ma i paritawanei.

Au Saipras

⁴ Ma Arua Vivivireina Barnabas ma Saul i paritawanei da i ḡaira au Selusia ma kampa i amkuka damana au bonabona Saipras. ⁵ Ma au Salamis i ḡota ma i nae mai Jew ai au boru numana ma God riwana i raugugulei. John-Mark tauī maiteni i nae da ai tauagu.

⁶⁻⁷ Tauī bonabonana i kwaviviroi da au Paphos taon i ḡeta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualaulaunana ma i ḡoei da God ana babani ita nonori ma lamna aubaina Barnabas ma Saul i rauḡoreiai. ⁸ Wate barabaravuna Bariesu (Greek ponanei lamna Elimas) Saul ma Barnabas i viḡaviei da gavena ana tumaḡana ita viapoapoeni. ⁹ Saul wavana

ġelauna Paul, Arua Vivivireina orana i oai ma barabaravuna matana i 'nana-tunutunui. ¹⁰ Ma i pa “Tam Satan natuna ma kaua aiai ma jijimani tauviapoapoenina! Tam morumoru kaukauam ma gwalagwalamerum. Ma amapo da BADA ana kaua ma voviravirai da moru. ¹¹ Ma marina BADA urana ina kovoġim da matam ina apoapoe mara aburuna ma eġa madeġa lalalaina ma inanai.” Maratagogi matana i vinawanawa ma i gimtona ma nare da were i voladaġa-nae da rava au urana ita vojijina.

¹² Maranai gavena i 'nanai aiwai i tupua ma i vitumaġana, aubaina tauna BADA ana viararamana i bana-kauei.

Paul God Riwana Aiaina i jimejime i au Antiok taon au Pisidia

¹³ Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark tau i voterei ma i naeme au Jerusalem. ¹⁴ Perga i voterei ma i rui da au Antiok taon au Pisidia provins. Ma au Sabate i rui au boru-numana ma i kiala. ¹⁵ Ma rava ġelau, Moses ana tarawatu bukana ma peroveta ġelau ai buka i 'avi, ma babada riwa i paritawanei Paul ma Barnabas awari i pa, “Varevareiu! Mepa da awarimi nota aiwai da ota voagui ai lamna marina ona ġei da ona babaniei.”

¹⁶ Paul i vomairi ma urana i voepai da rava i genuana ma babani i vikarei i pa:

Mai Israel ma taumi eġa mai Jew ai God tauviborumeina, ona rautaniġaneu! ¹⁷ ✧Mai Israel ai God noinoita i vinei, ma i vimaurai ai au mae au Egypt, ma ana rewapana ġaeġane i dobunei i taravaina-opunei. ¹⁸ ✧Madeġa 40 au mutulua ami kaua apoapoei ami beura ma ami gunura anatapui amiauei. ¹⁹ ✧Dam ġaeġaei 7 i vipupui au Canaan ma dobuna mai Israel i verei da i viġariana-nonoei. ²⁰ *Wei anatapuna madeġa 450 au orana i tupua. Wei au murina God taurauetara† i terei da tau i vibadei da peroveta Samuel ana mara. ²¹ ‡Anina ma rava God i vibaġai da gulau ita verei. Ma God Saul, Kish natuna Benjamin ana damei i terei; ai gulau da madeġa 40 i kwa. ²² §Ma God Saul i tere-opunei ma David i terei ai gulau. Ma wenanare i riwa i pa, “Tau a aramane i da David, Jesse natuna orau ana rauoġara, ma au ġoana anatapuna ina kauei.”

✧ **13:17:** Exo 1:7 ✧ **13:18:** Num 14:34 ✧ **13:19:** Deu 7:1 * **13:20:** (a) Jdg 2:16; (b) 1Sa 3:20 † **13:20:** Wei ravai lamna ai ġavia babadai ma ai tauravena ma taurauetara *Judge*. ‡ **13:21:** (a) 1Sa 8:5; (b) 1Sa 10:21 § **13:22:** (a) 1Sa 13:14; (b) 1Sa 16:12

23 Muriai me God i parivainuaḡani nanare, Mai Israel ai Tauvilawana, Iesu David ana damei i nei. 24 ✨Muriai da Iesu ita nei, John mai Israel anatapui awari i jima da ai ḡo'apoapoe ina voterei ma ina mae-tavirei God awarina ma ina babataito. 25 ✨Ma John ana nola au damona i riwa, "Taumi o notanotai da tau Tauvilawana bo? Eḡa! Tau eḡa tauna. Wate ona rautaniḡana, rava au muriu e nenei tauna i ḡetelara, tau eḡa tagotagogina da ana ae uma ḡuravana ana rupeni."

26 Varevareu - Abraham natunatuna ma taumi Jentail God tauviviborumaina, God tauta awarita, kwakokwakoi vilawanai riwana i paritawaneiai! 27 Mai Jerusalem ai babada maiteni God ana Tauvilawana i vinua-nainai, ma lamnei Iesu i kovoḡi, Peroveta wei lamna i jimejime i au Sabate marana patapatana. 28 ✨Tauri eḡa ana apoapoenai aiwai ita nelaḡai da Iesu ita viragēni, wate Pilate i vibaḡai da ita viragēni.

29 ✨Maranai rava ai babada maiteni, ai nuabola Iesu awarina i kauana-paiei me peroveta i ririwei nanare, ma tupuana au korosi i tere-ḡairei ma au guba i vimataveni. 30 Wate God Iesu iraḡelei i vovaimairini. 31 ✨Ma au pom maḡamaḡau Iesu tauri maiteni au Galili da i ḡeḡae au Jerusalem awari i eḡa. Wei ravai marina e vivimatamata rava awarii.

32 Marina tauai Riwana Aiaina a paripariveremi. Wei parivainuaḡanana wariḡa noinoita awari i kauai. 33 Ma God nanare i kauai tauta eda muri aubaita, da Iesu iraḡelei i vovaimairini, au Psalm viruaina wenanare I girumi,
Tam natu.

Amadodo Tau a viamanem. (Psalm 2:7)

34 God Iesu iraḡelei i vovaimairini da eḡa tupuana ina buda. Me i girugirumi nanare i pa,
Au viaiaina vivivireina David a parivainuaḡani tam ana verem. (Isaiah 55:3)

35 Psalm ḡelauna wenanare i girumi,
A 'ramanei da Tam am Messiah-Tauvilawana tupuana eḡa au kokoḡa ma voterei da ina buda. (Psalm 16:10)

36 Maranai David i mamae ma God ana nola i kauai ma i'raḡe, ma amamana maiteni i doboi ma tupuana i buda. 37 Wate God Iesu iraḡelei i vovaimairini ma tupuana eḡa ita buda.

38-39 Lamna aubaina au rava, ona aramanei da Iesu awarinei God ami ḡo'apoapoe ina nota-tawanei. Rava anatapui da Iesu e vivitumaḡanei, ai ḡo'apoapoe e notanota-tawanei

✨ 13:24: Mrk 1:4 ✨ 13:25: Mrk 1:7 ✨ 13:28: Mrk 15:13-14 ✨ 13:29: Mrk 15:42-47 ✨ 13:31: Act 1:3

ma ai viturana e viviaiaini. Wei Moses ana tarawatu eġa ita kaukauei. ⁴⁰ Ona paina-melemi da peroveta aiwai i ririwei eġa awarimi ina tupua. Aubaina i riwa;

⁴¹ *Ona rautaniġana vivijiboġami,*

kaua ġaeġaena ana kauē da Ona baei ma ona iraġe!

Aubaina ami au lawana kaua ġaeġaena ana kauē da taumi ona vitumaġana-avei.

⁴² Paul ma Barnabas i opuopu ma rava i nei ma i vibaġa-guratei da ita nememei au Sabate ġelauna da Tauvilawana ana kaua ita babanana-kauē. ⁴³ Boru i kwa da rava i vilamonei, mai Jew borui ma ġelau marina ina bori i vaia da i vimai-jew, tau Paul ma Barnabas i votaġoi, ma i riwana-guratei da Iesu ana aguei ina mae jijina.

⁴⁴ Au Sabate ġelauna taon ravai anatapui i ġeta da Iesu riwana aiaina ita nonori. ⁴⁵ Maranai mai Jew wei patarana i 'nanai ma orai unura i oai ma Paul i vikaua-morumoruei ma i vitepaubaubai.

⁴⁶ Ma Paul ma Barnabas ana tepatorai i babani, "God riwana a jimei awarimi au naona, wate taumi wei riwana o geduaiei. Wei e viviatataiana da taumi lawana mamae-nonoana eġa ota ġoēġoei. Lamna aubaina ana voteremi ma God riwana ana jimei Jentail awarii. ⁴⁷ BADA wenanare riwa bagibaginei i riwelai,

Tau a vinemi da lalalaina Jentail awarii,

da rava anatapui au dobu ona riwei menanare ai ġo'apoapoe a nota-tawanei ma a vilawani. (Isaiah 49:6)

⁴⁸ Maranai Jentail wei riwana i nonori, tau i vinuai ai kaua ma BADA Riwana Aiaina i voepaepai, ma tau da God i vinei lawana mamae-nonoana ita vaia, i vitumaġana.

⁴⁹ Ma BADA Riwana Aiaina i vituai nai au paratana. ⁵⁰ Wate mai Jew Jentail waivinei manemanei ma mai Jew ġelau i egari da Paul ma Barnabas ai ġavia i vomairi ma dobunei i viagaġana-opunei. ⁵¹ *Anina ma tau ai pokauna i rauabuabui da ita viatataiei da BADA eġa ita vinuai ai awarii ma i nae au Ikoniam taon. ⁵² Wate Arua Vivivireina kerisiana voui au Antiok orai i oai ma i vinuai ai kaua.

14

Paul ma Barnabas i jima au Ikoniam.

¹ Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maġamaġau i vitumaġana. ² Wate mai Jew ġelau eġa vivitumaġana i Jentail i kelari ma ai nota i barai

* 13:51: Mrk 6:11

da Paul ma Barnabas i geduaiei. ³ Avena ma Paul ma Barnabas kampa i mae guratana ma ana tepatorai BADA ana aguei i jimajima. Ma kaua babaii ma vivirewapanai ma gāma gāui i kauēi. Wei i vimataira da ai jima lamna riwa kaua.

⁴ Taon i kai gēlauri mai Jew aubaii i mairi ma gēlauri Apasol aubaii i mairi. ⁵ Ma mai Jew ma Jentail gēlauri i vioga da Paul ma Barnabas gāime i virauraei. ⁶ Wate tau i riwana i vaia ma dobuna i ruba-tawane i ma i nae au taon gāe gāei Listara ma Derbi au Laikonia provins ma taon au ririvai. ⁷ Ma weka Riwana Aiaina i jimana-naiei.

Rava i notai da Paul ma Barnabas god

⁸ Au Listara oroto aena gōkokokarana, alona manawane i gwa gwa gwa i vinatune i ma ega ita babara dadana. ⁹ Kampa i kiala ma Paul i bababani i rarautani gane i. Paul matana i tawane i ma i 'nanai da tauna i vituma gana da ita lawana ¹⁰ ma i garara awarina, "Aemei ma mairi!" Ma orotona aenei i mairi ma babara i vikarei. ¹¹ Maranai patara i 'nanai Paul aiwai i kauēi tau i ava ai ponei i babani vivira, "god rua ga i gairai awarita me *rava." ¹² Tau i riwa da Barnabas lamna mai Greek ai god Zeus† ma Paul i vitauvibabani aubaina i riwa da tauna Hermes. ¹³ Zeus ana pulo gabuna, taon au giana, Zeus ana pirisi patara maiteni bull ma berana ululai i nei i taon au metaetana da Apasol ita puloi.

¹⁴ Wate maranai Paul ma Barnabas wei riwana i nonori, tau i ai gara i sikai ma i ruba-opu patara awarii ma i garara, ¹⁵ * "Aiwai aubaina wei kauana o kaukauei? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei ma ona nae BADA lawalawaina ona viborumei, Tauna mara ma dobu ma boga ma aiwai anapuna au orai i kauēi. ¹⁶ Wariaga tauna rava i voterei da ai goanei i mae. ¹⁷ Wate marana patapatai e viviatataiemi da tauna e mamae ma ana nuavaina e verevereta, garewa mare i ma maura ma lam e vereveremi ma au orami nuaiai e oaoai." ¹⁸ Apasol i bababani ma i kauana-guratei da ravai ita vi gaei da tau i avena ita puloi.

Mai Listara Paul gāime i virauraei.

¹⁹ Mai Jew gēlauri Antiok ei ma Ikoniamei i nei ma patarana i egari da Paul gāime i virauraei ma taonei i taina-opune i, i notai da tauna ira ge. ²⁰ Wate maranai vivituma ganai i gēta da i mae kwaviviroi, tauna i vomairi ma i naeme au taon.

* **14:11:** Paul ma Barnabas Greek ponane i bababani † **14:12:** Zeus lamna mai Greek ai god gae gaena. Rava ai vituma gana da godna e vivilawani. Hermes lamna Zeus natuna ma tauna lana Tau-vinolanolana. Zeus ma god gēlauri aubaii. Rava i notai da Hermes lana e kauwei da rava e babana-kauwa ma ai babara e aiiai. Wate nanarena e notanotai da tauna kauwa aiaina e vivitupui ma e kauwei da rava e vivinatuna kauwa. ☆ **14:15:** Exo 20:11

Aupom ġelauna tauna ma Barnabas i nae au Derbi.

²¹ Paul ma Barnabas Riwana Aiaina i jimei au Derbi ma ekalesia voui maġamaġaui i rui. Ma i nae me au Listara, Ikoniam ma Antiok. ²² Metauna au dobuna i jimajima kampa tauvitumaġana i ririwana-guratei ma i vovai-virewapani da ina mairi-jijina ai au tumaġana i pa, “Piripiri maġamaġaui au orana ona rui wate au murina God ana au vibadana ona rui.”

²³ Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini. ²⁴ Anina ma au Pisidia provins i verautua da i nae me au Pamphilia provins. ²⁵ Au Perga BADA riwana i jimei ma i ġaira au Atalia. ²⁶ Ma kampa i amkuka ma i nae me au Antiok au Syria provins, weka ai nola i vikarei, maranai ekalesia kampa God i vibaġai da tau i ita viaiaini ai au nola ma i paritawanei ma marina ai nola e vivikwai.

²⁷ Ma kampa i ġeta ma ekalesia i vitagogiei, ma aiwai anata-puna God ana aguei i kaukauei rava i vieġei, ma menanare Iesu metaeta i votawanei da Jentail maiteni Tauna i vitumaġanei.

²⁸ Ma kampa tauvitumaġana maiteni i mae guratana.

15

Boru au Jerusalem

¹ Wate nelara ġelau i Judeaei i ġairai au Antiok ma ekalesia i viararamani i pa, “Mepa da eġa inibori ona vaia Moses ana tarawatu e ririwei nanare, God taumi eġa ina vilawanimi.” ² Ma karuwaġawaġa ġaeġaena i bauni Paul ma Barnabas maiteni. Ma tau i Paul, Barnabas ma rava ġelau i vinei da i ġae au Jerusalem da Apasol ma babada ita inanai wei babanina aubaina. ³ Ma i paritawanei au Jerusalem, Ma ai au vaġai ekalesia au Phonisia ma Samaria provins i parivere i menanare Jentail i mae-tavirei God awarina. Ma tau i vinuiai i kaua maraina wei i nonori. ⁴ Maranai i ġeta au Jerusalem, ekalesia ma Apasol i nei da i nebelei. Tau i parivere i menanare kaua anatapui God ana aguei i tupua. ⁵ Wate ekalesia ġelau mai Pharisi, i vomairi ma i babani guratana i pa, “Jentail anina da inibori ina vaia ma ona egari da Moses ana tarawatu ina voteletelei.”

⁶ Apasol ma babada i viboru da wei babanina i okei. ⁷ ✧Ma i vitarapiri guratana ma Peter i vomairi ma tau i riwei i pa, “Au rava! O aramane i da au orata God i vineu da Riwana Aiaina ana jimei Jentail awarii da tau i ina nonori ma ina vitumaġana.

⁸ ✧God rava anatapui ai nota e araramane i, ma Jentail Aru-ana Vivivireina i verei me tauta nanare. Wei matairana i viatataieta da God i vianina. ⁹ Tauna Jentail ma tauta

e vaivainita da tagogina, ma ata vitumaḡanei orata i viaiaiani.
 10 Marina aiwai aubaina God o viviamlo-ḡaiḡaini? Tauta amamata maiteni eḡa tata virewapana da tarawatu tata vojijina-kauei. Wate marina wei vitana Jentail ta verevere-damanei.
 11 Eḡateni! Tauta anataputa ta vivitumaḡana da BADA Iesu ana aguei tana lawana, ma nanare Jentail maiteni.”

12 Rava anatapui igenuana ma Barnabas ma Paul i rautaniḡanei, tau i bababani menanare ana au vaḡai God ana aguei kaua aniba ma vivirewapana i kauei Jentail awarii.

13 Maranai i babani vorovei, James* babani i vikarei, “Au rava ona rautaniḡaneu.

14 —Peter † au naona i pariveremi menanare God Jentail i raugenari ma ḡelau i vinei da tauna ḡarinei. 15 Ma Peroveta nununai wei kauai i bababaniei marina nanare e tuputupua:

16 *Wei au murina ana nememei,
 ma David ana numa gara ana voa-melei.*

*Ana vituramairini
 ma ana kauei da ina virewapana me.‡*

17 *Da rava mamae-terenai*

BADA ina baiei,

Wate Jentail a rauḡorei da ḡariuei, BADAi riwa. (Amos 9:11-12)

18 Wariaḡa da marina wei ta aramanei.

19-21 —☆ Lamna au baina eḡa tana kauei da ina pipiripi Jentail aubaii, tau e mamae-tavirei God awarina. Wate pepa tana girumi ma tana egari da lam e pulopuloei god morumorui awarii eḡa ina ani, eḡa ina viawawana labalababa, ḡamoḡamo uai e kikiki eḡa ina ani ma sia ana tarana eḡa ina ani. Aubaina wariaḡa da marina Moses ana tarawatu e raugugulei boru au numai Sabatena patapatana.”

Pepa i girumi Jentail awarii

22 Ma Apasol, babada ma ekalesia anatapui rava ḡelau i vinei ma i paritawanei au Antiok au Syria provins Paul ma Barnabas maiteni. Tau ai babada ruaḡa i vinei wavai Judas wavana ḡelauna Barsabas ma Sailas. 23 Ma wei pepana au urai i terei,

Apasol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiai, egualau!

24 Tauai riwana a vaia da rava ḡelau ai au boru i ḡairai ma ai viararamani i vinuabolaimi ma i visina-viraviraimi, wate

* 15:13: Iesu ana tevera † 15:14: Peter wavana ḡelauna Simon. ‡ 15:16: Maranai God David ana numagara e bababaniei lamna David ana vibadana vouna e ririwei ma eḡa ana epaepaia. ☆ 15:19-21: Lev 18:6-23; Lev 17:10-16

tauai nai ravai eġa ata paritawanei. ²⁵ Lamna aubaina tauai a viboru ma a vianina da taupariverena ata paritawaneiai, ata rava Paul ma Barnabas maiteni, ²⁶ tau i verena-melei ma ai lawana eġa ita vinuabolei BADA Iesu Keriso wavana aubaina. ²⁷ Judas ma Sailas a pariparitawanei da tau i gamoiei ina riwemi aiwai tauai a girumi.

²⁸ Arua Vivivireina ma tauai ai ġoana da eġa vita ġaeġaena ana veremi, anina wei tarawatuna ava.

²⁹ Lam god morumorui i puloi eġa ona ani,

Eġa tara ona umai, Eġa ġamoġamo uana kikikina vioana ana tarana ona ani.

Eġa ona viawawana labalababa,§

Mepa da wei tarawatui ona vojijina-kauei, taumi kaua aiaina o kaukauei.

Egualau kaua.*

³⁰ Ma nelarai i paritawanei da i ġaira au Antiok, ma ekalesia i rieiai da pepa i verei. ³¹ Ma tau i 'avi ma i vinuai ai kaua pariv-erena aiaina aubaina. ³² Judas ma Sailas tau i God ana per-oveta ma i babani guratana awarii ma wei tau i vinuai aie ma ai tumaġana i vovai-virewapani. ³³ Ma kampa i mae mara aburuna ma ekalesia ana nuaubai i paritawana-melei au Jerusalem. ³⁴ †

³⁵ Wate Paul ma Barnabas au Antiok i mae, ma tau i maiteni BADA Riwana Aiaina i viararamani ma i raugugulei.

Paul ma Barnabas i vilamonei

³⁶ Ma muriai Paul, Barnabas i riwei, “Tana nae dobu au anat- apuna mepa BADA Riwana Aiaina ta raugugulei ma ekalesia tana raugenari, ma tana inanai tau i anina bo eġa.” ³⁷ Barnabas i ġoei da John-Mark ita taravaini. ³⁸ ✨Wate Paul wei notana eġa ita ġoei aubaina au naona John tau i Pamphilia i ruba-
tawanei ma eġa ita mae da maiteni ita nola. ³⁹ Ai vipari-
pariniġai i apoapoe guratana da tau i vilamonei. Barnabas,
Mark i taravaini ma kukei i damana au au Saipras. ⁴⁰ Paul, Sailas
i vinei. Ma ekalesia, BADA i vibaġai da ana aguei tau i ai au nola
ina paini. ⁴¹ Tau i Syria da Silisia i naeni ma ekalesia i raugenari
ma i vinua-terenei.

§ 15:29: Viawawana labalababa ġelau wei: Rava ġelau awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviaawanei (Lev 18:22, Rom 1:26-27) Ġamoġamo e viviaawanei (Lev 18:23) Rava eġa uta ravaġi ma e viviaawanei (Eph 5:3) Rava u egari da u viawawanei. (Gen 34:7, Deu 22:25-28) * 15:29: Kaua ġaeġaena lamna eġa ini bori ma Iesu ana aguei, u korosi i take aubaita. † 15:34: Buka waduwaduboi au orai vs 34 eġa ita mamae “Wate Sailas i ġoei da kampa ita mae.”

✨ 15:38: Act 13:13

16

Timothy Paul ma Barnabas maiteni i nae

¹ Paul i nae au Derbi da au Listara, kampa tauvotaḡotaḡo i mae wavana Timothy. Tauna alona Jew ei ma kerisiana, Wate amana Jentail. ² Ekalesia au Listara ma Ikoniām Timothy i voepaepana-kauei. ³ Paul i ḡoei da tauna ita taravaini ana au vaḡai, lamna aubaina ini bori i verei aubaina mai Jew kampa i aramanei da tauna amana Jentail. ⁴ Maranai taon nununai i nenaeni, ma ekalesia kampa i paripari-verei Apasol ma babada au Jerusalem ai nota, ma i riwei da tarawatu i ririwei ina votaḡotaḡoi. ⁵ Ma ekalesia ai vitumaḡana i vovai-virewapanai ma tauvitumaḡana voui i ruirui marana patapatai.

Paul ana rauboni

⁶ Arua Vivivireina Paul ana rava maiteni i viḡaei da eḡa BADA riwana ita jimei au Eisia provins, ma Pirijia ma Galatia paratana i naeni. ⁷ Maranai i nei Maisia ana au provins ma i ḡoei da ita damana au Bithinia provins. Wate Iesu Aruana eḡa ita vianinei. ⁸ Ma Maisia i verautuini da i nae au Troas. ⁹ Waguvaraina Paul ana au inana i 'nanai oroto Macedonie i maimairi ma i vivibaḡai i pa, "Ma damanai au Masedonia da ma voaguiai!" ¹⁰ Paul ana rauboni au murina tauai a vioga da laḡilaḡina ana vomairi Masedonia provins aubaina. Tauai a vitumaḡana da God i ḡorelai da Riwana Aiaina kampa ana jimei.

Paul i nae au Philipai.

¹¹ Au Troas tauai amkuka, a viaruana damana au Samotreis bonabonana a ḡeta ma au pom ḡela a kuka-nae au Neapolis. ¹² Ma kampa da a babara nae au Philipai taon au Masedonia provins, weka mai Rome ai sorodia ai bareki ḡaeḡaena i mae, kampa a veraumae. ¹³ Ma au Sabate taon a opu-tawanei ma a nae au waira, a notanotai da kampa boru gabuna wate eḡa. A kiala ma waivine ruaḡa ota kampa i rauriei awari a babani. ¹⁴ Taurautaniḡana tagogi lamna Jentail wavinena wavana Lidia ma ana dobu Thaiataira. Tauna gara lebalebarina maiana ḡaeḡaena taugimareina ma God i vitumaḡanei, ma God orana i votawanei da aiwai Paul i bababaniei i rautaniḡanana kauei. ¹⁵ Maranai wavine ana numa ravai i babataito ma i rauḡorelai i pa, "Ona nei au numa mepa da o notanotai da tau kerisiana ririwa kauana." Ma i egariai da ana au numa a mae.

Paul ma Sailas au panipani numana au Philipai

16 Mara tagogi a nenaē boru au gabuna ma taunola guguini a nebelei, Tauna au orana arua apoapoena i mae ma lamnei ai-wai amapo da ina tupua i vivieḡai. Ma mane ḡaeḡaena i kaukauei ana taniwaga aubaina. 17 Tauna Paul ma tauai i vogaḡotaḡoia ma i garagarara “Wei nelarai God ḡeḡetelarana ana taunola! E vivinolanola menanare God e vivilawananei.” 18 Wei kauana i kauē au pom biḡa da Paul i vianlo-ḡaiḡaini da i mae-tavirei ma arua apoapoena i riwei, “Iesu Keriso wavane i egaegarim da wavine ma opu-tawane!” Maratagogi arua apoapoena wavine i opu-tawane.

19 Maranai taunola guguini ana taniwaga i aramane i da ai mane etanaina i vine-boai, tau i Paul ma Sailas i vojijini ma i taina naiei au deba Gabemani awarii. 20 Tau i nei ai taurauetara awarina ma i riwa, “Wei nelarai mai Jew wei dobuna ravai e vivinuaragaḡai. 21 Tau i ata rava kaua ḡelau i viviararamani ma wei ata giu e teretereḡairei.”

22 Ma patara i rui Paul ma Sailas vunuai aubaina. Ma gabemani Paul ma Sailas, ai gara i sikai ma wipiei i kwapui. 23 I vunu-kauē ma i tawana-ruiei au panipani numana. Ma numana badana i egari da ita paina-kauē da eḡa ita ruba. 24 Anina ma Panipani badana tau i tawana-ruiei, panipani numana au orana ma aei, ai vivitaini au orana i raḡita-jijini.

25 Nubautuvai Paul ma Sailas i raraupari ma i welawela God awarina ma panipani ḡelau i rarautaniḡana. 26 Nanare ma lolo ḡaeḡaotana dobuna i gui. Ma maratagogi pani numana metaetana i wana-tawatawanei ma panipani anapui ai sein i dabarara. 27 Pani numana badana i vomairi ma ita inanai da metaeta wanatawanana ma i notai da panipani i ruba ma lamna aubaina ana sod i lavui da ita viraḡena-melei. 28 Wate Paul i garara, “Eḡa ma vunu-melem! Tauai anapui weka!”

29 Pani numana badana ana taunola i ḡorei da lalalaina ita neiai ma i ruba-rui ma ana sisisisina i mae-peu Paul ma Sailas au naoi. 30 Ma i opunei au doa ma i paridadanei, “Babada aiwai ana kauē da ana lawana?”

31 Tau i paribelei, “BADA Iesu Keriso ma vitumaḡanei ma ma lawana, am numa ravai maiteni.” 32 Ma God riwana i raugugulei tauna ma ana numa ravai awari. 33 Nai maranaina avena da waguvarai, pani numana badana Paul ma Sailas i naiei ma keroi i oḡai, Ma maratagogi tauna, ana numa ravai maiteni i babataito. 34 Paul ma Sailas i ḡaiei ana au numa da i viambagibagi. Tauna ana numa ravai maiteni i vinuaiai kaua da marina God i vitumaḡanei.

35 Ma marana i tom ma tauetara ana taunola* i paritawane i pani numana badana awarina ma i egari i pa, “Nelara ma voterei da ina nae.”

* 16:35: vs. 20 ma inana.

³⁶ Pani numana badana Paul i riwei, “Taurauetara i egariu da ana voteremi da ona nae. Marina ana nuaubami ona nae.”

³⁷ Wate Paul, taurauetara i riwei, “Tauai eġa ita rauetarelai ma i vunu-kauelai patara au matai. Ma avena da tauai mai †Rome, wate marina i ġoei da govagovaġane i ina paritawanelai bo? Eġateni kauga! Ona voterei da taurauetara ina nei weka da ina naielai.”

³⁸ Tau i wei babanina i naiana-melei da babada i riwei ma tau i rovo kaukaua maranai riwana i nonori da Paul ma Sailas lamna mai Rome. ³⁹ Ma i nei au pani numana ma i riwa, “Tauai a kauana-boai, ai ġo’apoapoe ona nota-tawanei.” Ma i tere-opunei ma i vibaġa-guratei da dobuna ita oputawanei. ⁴⁰ Ma Paul ma Sailas pani numana i opu-tawanei ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma tau i dobuna i netawanei.

17

Au Thesalonika

¹ Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae. ² Ma i rui au boru numana au Sabate me mara patapatai i kaukauei nanare, kampa Sabate tonuġa rava awari God riwana i viararamani. ³ Ma God riwanei i viararamana da Keriso ina vinuapoapoe ma iraġelei ina vomairi me, “Wei ravana a bababaniei awarimi, tauna Iesu Keriso.” ⁴ Mai Jew ġelau i orai i taini ma tau i votaġotaġoi. Ma nanare Jentail nelara maġamaġagau God taurauduneleina ma waivine wavai nae-naei maġamaġagau.

⁵ Wate mai Jew i unura ma rava ora-potapotai maġamaġagau au etanai i tami ma au taon vikaruwaġawaġa i vikarei. Ma oroto wavana Jason ana numa i ruini Paul ma Sailas i baibaiei da ita opunei patara awari. ⁶ Wate maranai eġa ita nelaġai tau i Jason ma kerisiana ġelau i taina-naiei taon babadai awari, ma i garara, “Wei ravai dobu au anatapuna apoapoe maġamaġagau i kauei, marina i ġetai ata au dobu.” ⁷ Ma Jason, Paul ma Sailas i taravaini ana au numa. Tau i Caesar ana tarawatu e viviaigai ma e ririwa da gulau ġelauna e mamae wavana Iesu.

⁸ Maranai patara ma taon babadai wei babanina i nonori tau i amloi i ġaiġai kauga, ⁹ ma Jason i egari da mane ġaeġaena i vimaiei da eġa mae boaboa ġelauna ina vitupui. Ma tau i Jason i voterei da i nae.

Au Berea

† **16:37:** Mai Rome ai tarawatu lamna, “Eġa rava Romei ma kwapu labalababai bo ma pani da au naona ma rauetarei.” Rome Israel i vibadei Iesu ana au mara.

¹⁰ Ma waguvarai tauvitumaḡana Paul ma Sailas i paritawanei au Berea. Maranai kampa i ḡeta, ma i rui au boru numana. ¹¹ Mai Berea i viaiaii, eḡa me mai Thesalonika. Tau i rautaniḡana ma i votelatela ma marana patapatana God ana buka i 'aiavi da ita aramanei da Paul aiwai i bababaniei lamna riwa kaua. ¹² Ma lamnei mai Jew maḡamaḡau i vitumaḡana, ma nanare mai Greek waivinei wavai naenaei ma nelara.

¹³ Maranai mai Jew au Thesalonika paratana i nonori da Paul God riwana i raraugugulei au Berea, tau maiteni i nae kampa, ma rava i rauegari da ḡavia ita vikarei. ¹⁴ Maratagogi kerisiana Paul i paritawanei au gera wate Sailas ma Timothy au Berea provins i mae. ¹⁵ Ma nelara Paul i tauviganigwaniei da au Athens, ma Paul nelarai i riwei ma i paritawanei au Berea da Sailas ma Timothy ita riwei da laḡilaḡina ita nei awarina.

Paul au Athens i raugugula

¹⁶ Ma Paul au Athens ana rava i paipaini, ma i 'nanai da kampa kokoitau i maḡa kaua ma i vinuabola kaua. ¹⁷ Mai Jew ma mai Greek God tauviborumaina awari i jima guratana au pari numana ma nanare au deba, aiavi da i ḡeta ma i rautaniḡana. ¹⁸ Ma rava ḡelau nuaulaulai i ḡetai ma maiteni i vitarapiri, tau e ḡoreḡorei mai Epicure ma mai Stoic*, tau lawana ai kaua tauviararamanai. Ma ai rava ḡelau i paridadana, “Wei ravana aiwai e voḡavoḡanei?” Ḡelau i riwa, “Mepa da tauna dobu ḡelau ai god e bababaniei.” Tau wananare i babani aubaina Paul Iesu Riwana Aiaina ma ana iraḡe ma ana vomairi me, i raugugulei.

¹⁹ Ma itaravaini ma inaie ai au boru e ḡoreḡorei Areopagus ma i riwei, “Ma nei ma a ḡoei da am viararamanana vouna e bababaniei, ata aramanei. ²⁰ Kaua ḡelau e babaniei tauai a vivinuanaini, ma a ḡoei da ana aramanei anona aiwai?” ²¹ (Taumana ma mai Athens marana patapatatai ai nola eḡa aiwai, da kaua voui ina virarautuei ma ina nononori.)

²² Ma Paul babadai au naoi i mairi ma i riwa:

Dogadogara mai Athens! A inana da taumi vipatupatumi ami god awarii, ²³ A bababara ma ami pulo aniapunana a inainanai, ma tagogi a inanai au tepana i giruma, “Wei God

* **17:18:** Mai Epicure rava wavana Epicurus ana viararamana i votaḡotaḡoi. I viararamana da lawana ana ano lamna nuaiaii. Da tau aiwai da tupuai ma matai ana rauoḡara, e vivinuaiaiei. Ma aiwai da e virovorovoi bo iniviarana e verevereia. Tau wei lamna e ḡeduḡeduai. Tau e ririwa da God rava eḡa ita vinuavainiei Stoic rava wavana Zeno ana viararamana e votaḡotaḡoi. I viararamana da rava ma ai maiteni au ririvata ta mamae (nature) ita vivirei, Tau ai ḡoana ma ai erawa ita teretawanei ma ita vinuanotanota kaua ma avena rava ḡelau ai agu ita raunenelei. Tau e ririwa, “Nuaiaii lamna kaua e vovoterei da mena ina tupua nei nanare ina tupua.”

eġa ata araramaneia aubaina.” Wei Godna o viviborumei wate eġa ota aramanei. Tau ana riwemi nai Godna aiai. ²⁴ ✨Tauna God mara ma dobu ma aiwai anatapuna au orana i kauei. Ma tauna mara ma dobu badana, ma numa rava uranei e voavoai au orana eġa ita mamae. ²⁵ Ma eġa rava ai agu ita paipaini, tauna agu eġa ita ġoeġoei. Aubaina tauna rava lawana ma lavutu ma anatapuna e vereveri. ²⁶ Au karena rava tagogi i kauei ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina iraġe ma animae paratana i aiterei. ²⁷ God wenanare i kauei da rava tauna ina baiei da mepa ina nelaġai. Wate tauna au ġereġereta, eġa au uama. ²⁸ Taugiruma ġelauna Greekei i riwai pa, “Taunei ta mamae ma ta bababara ma anatapuna ta kaukauei.”† Ma wate ami taugiruma ġelauna i girumi i pa, “Tauai nanare tauna natunatuna.”‡

²⁹ Ma tauta God natunatuna, eġa tana notai da God lamna me kokoitau, goldei bo silvei i kauei. Rava uraiei ma ana nuaulaulauei i kauei. ³⁰ Wariaġa rava God eġa ita aramanei wate God tau i ’nana-tawanei, wate marina anataputa egaegarita da tana rupena ma tana mae-tavireta awarina. ³¹ Aubaina mara i vinei maranai rava anatapui aiainei ma jijimaninei ina kovoġi. Rava i vinei da taunei ina kovoġa. God wei ravana iraġelei i vovaimairini lamna ina vimataira rava awari da ravana anina tauna.

³² Maranai Paul iraġelei vomairina i babaniei, rava i nonori ma ġelau tauna i vinamei wate ġelau i riwa, “Tauai a ġoei da muriai wei babanina ma babaniana-melei.” ³³ Ma Paul ai boru i opu-tawanei ma boru i gudu. ³⁴ Wate ġelau i vitumaġana ma Paul i votaġotaġoi. Tagogi lamna Dionisius, Areopagus boruna au orana, ma wavine wavana Damaris, ma rava ġelau.

18

Paul i nae au Corinth da rava awari Iesu ita jimej

¹ Paul Athens i netawanei ma i nae au Corinth. ² Kampa Akwila tauna Jew au Pontus i tupua, marinaota au Italy * da i nei awana Prisila maiteni. Aubaina Rome ai gulau Claudius mai Jew anatapui i viaġaġei da Rome i opu-tawanei. Paul i nae da tau i ita inana. ³ Paul tau i maiteni i mae, tau i tauam-popo, (ġamoġamo opina ma gara i popopoi numa aubaina ma i gimagamarei) me Paul ai nola tagogina. ⁴ Sabate patapatana

✨ **17:24:** 1Ki 8:27; Act 7:48 † **17:28:** Epimenides Ciritei au 6 century BC.

‡ **17:28:** Aratus Silisiei 3 century BC. * **18:2:** Rome taon lamna taon ġaeġaena au Italy ma ai kapital AD. 49 au orana kampa viġaġaiawa ġaeġaena da wavalatona Claudius mai Jew i riwei da dobuna i netawanei.

au pari numana tauna mai Jew ma Jentail awari i jima gu-ratana da orai ita sinavirai.

⁵ Maranai Sailas ma Timothy au Masedonia da i ġetai, Marina Paul BADA riwana ava i raugugulei mai Jew awarii da Iesu tauna anina God ana Vinevine Keriso. ⁶ Wate mai Jew Paul i viġaviei ma riwa apoaponei i ririwei. Ma tauna ana gara i rauabuabui ma awari i riwa, “Mepa da o kwako, lamna ona viwavu-melemi, eġa tau ona viwavui! Marina da e nena, ana nae Jentail awari.”

⁷ Ma tau i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au ġereġerena. ⁸ Crispus, pari numana ai bada, BADA i vitumaġanei ana numa ravai maiteni, ma mai Corinth maġamaġau Paul i rautaniġanei, i vitumaġana ma i babataito.

⁹ Waguvara tagogi BADA Paul ana au inana i babani i pa, “Eġa ma rovo, ma babani ma eġa ma genuana.” ¹⁰ Aubaina Tau tam maiteni. Ma rava eġa ina rau-iviapoapoelem aubaina au tauvotagoġaġo i maġa wei au dobuna. ¹¹ Ma Paul kampa i mae madeġa tagogi ma nawaravi six, ma God riwana i jimei.

¹² Wate maranai Galio i vi-Gavena au Akaia provins, mai Jew kampa i vitagogiei ma Paul i vojijini ma i naei Gavena awarina da ita rauetarei. ¹³ Ma tau i viwavui 'pa, “Wei orotona ana moruei rava orai e taitaini da God e viviborumei ma ata tarawatu e viviaigai.”†

¹⁴ Ma Paul gamona i laġi da ita babani ma Galio i babani mai Jew awari i pa, “Mepa da taumi wei ravana o viviwavui da kaua ġaeġaei bo kaua apoapoe aubaina, lamna tau au nola da ata rau-taniġanemi. ¹⁵ Wate wei taumi ami babani ami wava ma ami tarawatu, ana voterei au urami. Tau eġa wei kauai ana rauetarei.” ¹⁶ Ma etara numanei i viaġaġana-opunei. ¹⁷ Tau i anatapui pari numana ai bada Sothenis i vojijini ma i vunui etara numana au naona wate Galio tau i 'nana-tawanei.

Paul i nae me au Antiok au Syria

¹⁸ Paul i mae mara aburuna tauvitumaġana maiteni au Corinth ma wagei i nae au ġereġere au Cenkirei waga ai au animae. Prisila ma Akwila maiteni. Ma kampa Paul ana parivainuaġana aubaina aparana i ġari, ma anatapui i nae au Syria ¹⁹ Tau i au Ephesus i ġeta ma Paul, Prisila ma Akwila i voterei. Ma i nae au boru numana Mai Jew awari i jima.

† 18:13: Mai Jew e ririwa da Paul eġa tau i vitumaġana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina tau i ġoei da Rome ai bada Paul ina kovogġi. Ma inana Act 16:20-21 ma 17:7.

²⁰ Rava i vibaḡai da ita mae mara aburuna wate tauna eḡa ita vianina. ²¹ Wate maranai i opu da ita nae ma tau i riwei, “Ana nememei mepa da God ana ḡoana, ma Ephesus i netawanei ma wagei i damana.” ²² Maranai i ḡeta au Caesarea ma i nae au Jerusalem da kerisiana i raugenari ma i nae au Antiok. ²³ Au Antiok i mae mara aburuna ma Galatia provins ma Pirijia provins i naeni ma kerisiana i vovai-virewapani.

Apolos mai Ephesus awari i raugugula

²⁴ Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana giruma i aramana-kauei ma rava bababanina. ²⁵ Rava ḡelau, Apolos BADA ana etanai babanina, i viararamani, ma ana tepatorana i jima ma Iesu ana kaua ma ana lawana i viararamana-kauei. Wate tauna John Taubabataito ana babataito babani ava i aramane. ²⁶ Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i ḡorei da maiteni i nae ai au numa ma BADA ana etanai ana babani i viaramana-kauei.

²⁷ Maranai Apolos i nenae au Akaia, kerisiana Apolos i vovai-virewapani. Ma kerisiana au Akaia ai pepa i giruma da ita pariverei da tauna ita nebelei. Maranai au Akaia i ḡeta ma tau God ana aguei i vivitumaḡana, agu ḡaēḡaena i verei. ²⁸ Tauna ana babaniei au deba mai Jew i vovaiubai. Ma God riwana i vaia ma lamnei rava i viararamani da Iesu anina Keriso.

19

Paul au Ephesus

¹ Apolos au Corinth taon Akaia provins i mae, ma Paul ola i taḡoni da au Ephesus i ḡeta. Kerisiana ḡelau kampa ² ma i paridadanei i pa, “Arua vivivireina o vaia bo eḡa maranai o babataito?”

Tau i paribelei i pa, “Eḡa, Tauai eḡa ata aramane da Arua vivivireina e mamae.”

³ Ma Paul i paridadana, “Aiwai babaitona o vaia?”

Tau i paribelana, “John ana babataito a vaia.”

⁴ ✨Paul i riwa, “John ana babataito lamna mataira da tau ai ḡo’apoapoelei i mae-tavirei; ma mai Israel i riwei da Tauna au muriu e nenei ona vitumaḡanei lamna Iesu.” ⁵ Maranai wei i nonori ma i aramane tau i babataito BADA Iesu wavanei. ⁶ Ma Paul urana au kolai i terei ma Arua vivivireina au orai i rui. Ma i vikarei da pona tapunei i bababani ma God riwana i raugugulei. ⁷ Tau nelara iavana twelve.

⁸ Paul i nae au boru-numana ma kampa nawaravi tonuḡa au orana ana tepatorana mai Jew awarii i bababani. Da rava orai ita sinavirai da BADA ana vigulau ita vitumaḡanei. ⁹ Wate ḡelau kampa orai i bagibagi ma eḡa ita ḡoei da ita vitumaḡana, ma patara au matai Iesu ana etanai i vijiboḡi. Ma Paul tau i voterei ma kerisiana i taravaini ma i nae Tairanus ana au numa, ma kampa i viararamana ma i giugiu pompom. ¹⁰ Ma nanare i mae madeḡa ruaḡa i kwa, da mai Jew ma Jentail ravai maḡamaḡau au Eisia provins maemaei BADA riwana i nonori.

Sceva natunatuna

¹¹ Ma God ana rewapanei Paul kua ḡaeḡaei ma aniba i kaukauei, ¹² lamna avena wate rava ai agesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

¹³ Mai Jew ḡelaui dobuna i naeni ma arua apoapoei i viviḡana-opunei ma iraudadana Iesu wavanei da arua apoapoei i viviḡaḡei. Tau arua apoapoei i riwei i pa, “Iesu wavanei, taunei Paul e raraugugula, Tau a egarim da ma opu.”

¹⁴ Skeva, piri ai bada natunatuna nelarai seven wei kauana i kaukauei. ¹⁵ Wate mara tagogi arua apoapoena i paribelei, “Iesu a aramanei ma Paul a aramanei ma taumi aiavo?”

¹⁶ Ma rava au orana arua apoapoena maemaena i aupai ma tau i vunui da eḡa ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

¹⁷ Mai Jew ma Jentail ravai au Ephesus maemaei wei riwana i nonori ma rovo orai i ḡaeni ma Iesu wavana i vivirana-kauei.

¹⁸ Maḡamaḡau i vitumaḡana ma i nae kerisiana awarii ma ai ḡo’apoapoe i rupeni. ¹⁹ Tauvitumaḡana voui maḡamaḡau paraparaumi,* ai buka i vidamni au deba ma i apui. Maranai bukai ai maia i ’avi da silver 50,000†. ²⁰ Kua babai me wei, Iesu riwana i vibabarai nai au dobuna ma rava maḡamaḡau i vitumaḡana.

²¹ Wei anapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriai ana nae da Rome ana inanai.” ²² Ma Paul ana tauagu ruaḡa Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

Vigaiḡaiawa au Ephesus

* **19:19:** Au Deu 18:10-14 God ana rava e viviḡaei da eḡa ina parauma. † **19:19:** Dracma coin tagogi lamna tau-vobagibagi ana maia au pom tagogi aubaina. Marina lamna million biaḡa.

23 Iesu ana babani ma ana kaua vouna aubaina, ma viġaiġaiawa ġaeġaena i tupua au Ephesus. 24 Silver taunoleina wavana Demetrius, mai Greek ai god wavinena ana numa taparoro kokoitau i rarau-ġaroġaroei da i gimagimarei, ma wei nolana mane ġaeġaena e neinei ai silver taunoleina nai au dobuna aubaii. 25 Ma tau i anatapui ai rava nolana tagogina e kaukauei maiteni i rauġoreiai ma i riwa, “Au rava, o aramanei da ata maura wei nolanei ta vaivaia. 26 Ma o inanai ma o nonori menanare wei ravana Paul e kaukauei, Rava ai nota i sinavirai da maġamaġau i god Artemis raudunena i voterei au Ephesus ma dobu Eisia paratana anatapuna. Ma e ririwa da ‘rava god i rauġaroġaroei, lamna eġa god.’ 27 Tauta tana inana kaua da wavata ma ata mane ani kauana eġa ina apoapoe. Ma ata god ġetelarana Artemis ana numa taparoro ma wavana eġa ina vijiboġi, eġa au Eisia provins ava ma dobu au anatapuna.”

28 Maranai patara wei babanina i nonori tau i meji kaua ma i vigaragarei, “Artemis mai Ephesus ai god i ġetelera!” 29 Ma tau i garagarara rava nai au dobuna i nonori ma tau maiteni i garara labalababa. Anina ma patara Gaius ma Aristakas i vojijini tau ruaġai mai Masedonia Paul ana tauvigwanigwaniana, ma i rubana-naiei nai dobuna ana boru gabuna.† 30 Paul i ġoei da patara au naoi ita rui da ita babani wate kerisiana eġa ita vianinei. 31 Wate nanare Paul ana rava ġelau i au gabemani tauna i viġaei da eġa ina nae au boru.

32 Patara i vinuanaina, i logologoi ma i garagarara labalababa ma eġa ita aramanei aiwai aubaina weka i nei. 33 Mai Jew oroto tagoġi i dudu-opunei au naoi wavana Alexander ma patara ġelau i garara awarina da ita babani. Alexander urana i voepai da tau i ita genuana ma tauna ana rava aubai ita babani. 34 Wate maranai i aramanei da tauna Jew. Tau i anatapui pona tagoginei wenanare i garagarara, “Tauta mai Ephesus ata god Artemis i ġetelera!” da *hour* ruaġa i kwa.

35 Ma taon badana patara i riwei da i genuana ma i riwa, “Au rava mai Ephesus, rava anatapui au dobu i aramanei da tauta tauvipaipai mai Ephesus ai god ġeġetelarana Artemis ana numa taparoro ma ana ġaima vivireina marei i peuai aubaina. 36 Eġa aiai wei ina vikaua-moruei. Lamna aubaina orami ina rauei ma eġa aiwai apoapoena ona kauei. 37 Wei ravai o neiai weka wate tau i eġa au numa taparoro aiwai ita danenei bo ata god ita riwana-boei. 38 Mepa da Demetrius ana rava maiteni e viviwavui tau i ina nae ina rauetara ma

† 19:29: Dobuna ana boru gabuna lamna numa ġaeġaena. Eġa poewana, ma inanana me nawaravi gebona. Rava maġamaġau 26,000, nanare ina kiala **meeting place**. Rava e nena kampa da kalo tapuna ma e raraubiġa.

ami viwavu ona naei kampa taurauetara awarina. ³⁹ Ma mepa da ami nuabola ḡelau i mamae lamna taon babadai ai au boru ona babaniei ma ona tere-jijimani. ⁴⁰ Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwaḡawaḡana anona eḡa, ma mepa da Rome ina paridadana ma tauta menanare tana paribelananei. ⁴¹ Anina ma boru i gudui ma rava i vilamonei.”

20

Paul i nae au Masedonia ma Greece

¹ Vikaruwaḡawaḡa au Ephesus taon i kwa ma au murina Paul kerisiana i raukwatueiai da i vinua-terenei, i viegualaei ma i netawanei da i nae au Masedonia provins. ² Ma dobuna ḡaeḡaenana i naeni ma kua maḡamaḡai kerisiana i vinua-terenei. Anina ma au Akaia* i ḡeta. ³ Kampa nawaravi tonuḡa i mae. Tauna i vokaukua da ita nae au Syria ma wate i nelaḡai da mai Jew ḡelau i virāḡenana i viviogatarei lamna aubaina da i nae me au Masedonia. ⁴ Nelara ḡelau i votaḡotaḡo tau lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy. ⁵ Tau i wagei i ainae au Troas ma kampa i painiai. ⁶ Ma palawa bagibagina torelana au murina, wagei Philipai taon au Masedonia provins a netawanei. Ma aupom 5 au murina au Troas a ḡeta ai rava awari, kampa aupom 7 a mae.

Au Troas, Paul Eutikus iraḡelei i vovaimairini

⁷ Wiki au karena - Sunday tauai a vitagogielai voepaepa ma BADA ana amgogona aubaina, ma kampa Paul i jima da nubautuva, aubaina maratoma da ita nae. ⁸ Numa vata-vatara au tepana a vitagogielai, ma kampa rampa maḡamaḡai i ararata. ⁹ Orotu laragana wavana Eutikus au windo i kiakiala ma Paul i raraugugula, ma tauna matana i pota kua da i raunuavuru, ma kampa au tepa dewadewana i peu-ḡaira da au doa i rauei. Maranai tau i ḡaira da ita voepai, tauna irairāḡena. ¹⁰ Paul i ḡaira, i matave-tepani ma i rapai ma rava i riwei i pa, “Eḡa ona vinuabola, tauna lawalawaina!” ¹¹ Anina ma Paul i ḡae me au numa ma kerisiana maiteni BADA ana amgogona amna i ani ma awari i babani maratoma. Ma Paul nai dobuna i netawanei. ¹² Tau i laragana lawalawaina i naiei au numa ma rava orai i rauei.

Paul i amkuka au Miletus

* 20:2: Marina e ḡoreḡorei Greek.

13 Paul aenei i nae au Assos ma tauai i riwelai da wagei ana nae au Assos da tauna kampa ana vigerui. 14 Ma au Assos a vigerui ma a nae au Miletus 15 Maratomna bonabona Kios au ġereġerena a nae. Ma marana i tom au Samos a ġeta, ma maratom ġela au Miletus a ġota. 16 Paul i ġoei da jijimanina ina nae ma avena ita rui au Ephesus, eġa ita ġoei da au Eisia provins ina mae-guratana. Tauna i vipaparana ma mepa da tago-tagogina au Jerusalem ina ġeta muriai da Pentecost torelana.

Paul kerisiana au Ephesus i netawanei

17 Au Miletus Paul riwa i paritawanei au Ephesus taon kerisiana babadai awari da ita nebelei. 18 Maranai au Ephesus taon i ġetai ma tau i riwei i pa:

O aramanei au lawana menanare maranai vovounai weka au Eisia provins a ġetai. 19 Mai Jew i ġoei da ita rau-iviapoapoeleu wate tau a vilamolamona ma ana toutou BADA awarina a vivitaunola. 20 O aramanei da maranai God Riwana Aiaina awarimi a raugugulei, riwa aiaina aniaguimi eġa ata tajjini. Au deba a raraugugula rava maġamaġaui au naoi, ma ami au numa a viararamanimi 21 Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaġanei.

22 Ma marina Arua Vivivireina i riweu da ana nae au Jerusalem. Eġa ata aramanei kampa aiwai awariu ina tupua.

23 Wate taon nununai awari a nena ma Arua Vivivireina e vivieġeu da amapo ina panu ma au deri ina tereu ma ina rau-iviapoapoeleu. 24 Ma mepa da ina viraġeniu, wei lamna eġa kaua ġaeġaena tau awariu. Wate kaua ġaeġaena lamna BADA Iesu nola i verevereu da ana vikwai. Wei nolana lamna, God ana iviaiai maemaena, riwana ana raugugulei.

25 Maġamaġaumi awarimi a nei ma God ana vigulau a raugugulei wate marina a aramanei da amadodo da i nena, naou eġa ona inana-melei. 26-27 God ana vilawana ogatarana rava aubaii eġa ata govaġi awarimi lamna aubaina riwa bagibaginei a ririwemi da mepa da rava au babani eġa ina vitumaġanei ma ana lawana maema-nonoana ina vine-boai, lamna eġa tau au wavu. 28 Taumi babada ma ona paina-melemi, nanare tauvitumaġana tau aiavoi da Arua vivivireina au urami i teretereia. Ona inana-vaitetei me sipu taupainana ana sipu e paipaini. Tau lamna God ana vinevine taranei i gimarai. 29 A aramanei da ana nae ma au muriu tauraugugula morumorui ina nei awarimi ma rava ai tumaġana ina viapoapoeni, me auou moduei sipu au boruna viraġena aubaina. 30 Ma rava ġelau ami au dam oina ina vomairi ma ina viararamana ma moruei rava orai ina taini

da tau i ina votaḡotaḡoi. ³¹ Lamna aubaina matami ina kala ma ona aramanei da madeḡa tonuḡa marai ma waguvarai a notanotaimi ma ana toutou a viviararamanimi.

³² Ma marina God au urana a tereteremi. Ana agu e verevereoimi ona vivitumaḡanei. Wei aguina e vovai virewapanimi, ma ami pulo ina veremi, aubaina taumi God natunatuna viaiainai. ³³ Ma tau eḡa rava ana mane bo ana purapura ata rauoḡarei ³⁴ Taumi o aramana-kauei da tau nimauei a nola da mane a vaia da tau au taubagibagi turau aubaiai. ³⁵ Nanare, a viatataiemi da ona nola guratana da mane ona vaia ma molaka ona voagui. Iesu ana babani eḡa nuanuami ina vuru, Tauna i riwa i pa, “Verena i ai kaua eḡa me vainana.”

³⁶ Paul i babani vorovei ma anapui i mae-ḡaira au doa ma i raupari. ³⁷⁻³⁸ I vinolanola i pa, “Amapo eḡa naou ona inana-melei.” Wei riwana i vinuabolai da i vitouana, Paul i taragwabai ma i viḡia-laḡolaḡonei. Ma i naiei da au waga i vigeruei.

21

Paul ana vaḡai au Jerusalem

¹ Ephesus kerisiana babadai a viegualauei ma wagei jji-manina a nae au Cous bonabonana ma ubaubanai a nae au Roudes bonabonana, kampa da a damana au Patara taon.

² Weka waga ḡelauna i nenae au Phonisia a gerui, ³ da au Saipras bonabonana a rubatawanei, au kelakelauai da a nae au Taia au Syria provins a ḡota, da purapura ita viopuni. ⁴ Kampa tauvitumaḡana a baiei ma aupom 7 maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i viḡaei da eḡa ina nae au Jerusalem. ⁵ Ma mara i ḡetai da ata vomairi, kerisiana awawai maiteni da natunatui taon i voterei ma anapuiyai a ḡaira au gera, a raupari gogona.

⁶ A viegualau da tauai au waga a geru ma tau i nae-me ai au numa.

⁷ Au Taia ma a nae au Tolemis taon a ḡeta. Tauvitumaḡana kampa a nebelei ma aupom tagogi maiteni a mae. ⁸ ✧Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina. ⁹ Tauna natunatuna waivinei 4 eḡa tavitavinei, tau i God ana riwa i vivieḡai rava awari.

¹⁰ ✧Aupom vomaḡai i kwa, kerisiana wavana Agabas, tauna nanare God riwana i vivieḡai, Judeaei i ḡairai au Caesarea. ¹¹ Ma i nei awariai da Paul ana tairoro i vaia ma tauna

urana ma aena i raġina-melei ma i riwa i pa, “Arua Vivivireina e ririwa, da Jew babadai wei tairorona taniwagana wenanare ina raġini, ma Jentail au urai ina terei.”

¹² Maranai wei riwana a nonori, tauai kerisiana ġelau maiteni Paul a vibaġana-guratei, da avena ita nae au Jerusalem. ¹³ Wate i pa, “Aiwai aubaina o vivitouana ma orau o viviapoopeni! Tau a vokaukaua nonoa da ina raġiniu, wate eġa lamna ava ma ina viraġeniu au Jerusalem, BADA Iesu a vovotaġotaġoi aubaina.” ¹⁴ Tauai a viviġaei ma eġa tagotagogina da nuanuana ata sinavirai lamna aubaina riwanana a voterei ma a riwa a pa, “BADA ana ġoanei nanare ina tupua.”

¹⁵ Wei au murina a vokaukaua ma a vomairi au Jerusalem. ¹⁶ Kerisiana ġelau mai Caesarea I naielai Nason ana au numa ma kampa a mae. Tauna oroto Saiprasiei, ma Iesu votaġona i vikareni maranaina rava vovounai i vikarei da Iesu Riwana Aiaina i rarau-gugulei.

Paul, James i raugenari

¹⁷ Maranai au Jerusalem a ġeta kerisiana ana nuaiiai i nebelelai. ¹⁸ Maratom ġela Paul maiteni a nae da* James a raugenari,† dogadogara anatapui kampa. ¹⁹ Paul tau i viegualaei ma ana au vaġai God aiwai i kaukauei Jentail awari anatapuna tau i pariverei.

²⁰ Maranaina wei riwai i nonori, tau God i voepaepai ma Paul i riwa i pa, “Turaiai u aramanei mai Jew ai maġa tausan nanare weka Iesu e vivitumaġanei, ma God ana tarawatu e vovotaġokauei. ²¹ Wate rava Jew kerisiana weka au Jerusalem am kaua i vibenabenaiei, da tam Jew Jentail maiteni e mamae e viararamani da Moses ana tarawatu ina gedugeduai. Ma u riwei da natunatui ini eġa ina bori ma ai kaua ġelau eġa ina votaġotaġoi. ²² Tau i aramanei da tam u ġetai, Marina aiwai tana kauai? ²³ Aiwai a ririwemi ona kauai. Au nelara 4, tau parivainuagana bagibagina God awarina i kauai. ²⁴ Ma taravaini ma ona nae au Tempol ma ona viaiaina-melemi ma ma vimaia da tau ai viaiaina pulona ina kauai. Anina ma tau kolai ina ġari ma rava anatapui ina aramanei da tam Moses ana tarawatu anina e vovotaġotaġoi, ma babani au naona lamna anatapuna moru kaua. ²⁵ *Ma Jentail marina i vivitumaġana aubaii pepa a girumi ma wenanare a riwei, sia e pulopuloei kokoitau awarii eġa ina ani, Tara eġa ina umai,

* **21:18:** Wei lamna Iesu ana tevera. Act 12:17; 15:13 ma Mrk 6:3 † **21:18:** Mane anatapui ai au vaġai i tami bo rava i puloi i verei damanai mane taupainina i verei ☆ **21:25:** Act 15:29

Rava gāmoḡamo uai e kikiki tarai eḡa ita toi-tawanana, eḡa ona ani. Eḡa ona viawawana labalababa.”†

26 Anina ma marana i tom Paul nai nelarai 4 maiteni i viaina-melei God au matana. Muriai Paul i rui Tempol au orana ma i vinolanola pirisi awarii da mara aiwai tau i viaiaina ina voterei. Ma maranaina pulo ita terei tau tagotagogi ava aubai.

Paul i pani.

27-29 ☆ Ma aupom 7 aburuna ava da ita kwa ma Jew ḡelau i Eisia provins maemae tau Paul i 'nanai Tempol au orana. Au naonei tau Paul i 'nanai oroto Ephesusei wavana Trophimus maiteni, au taon i bababara ma i notai da tauna Trophimus i ruiei Tempol au orana. Tau Paul i vojijini ma i garara i pa, “Nelara mai Israel ona nei, ona voaguiai! Wei orotona dobu anatapuna e nenaeni ma rava anatapai e viviararamani da mai Jew ma ata tarawatu ma Tempol i parivirevirei. Tauna Jentail i neiai gabuna au vivivireina ma i tuvaideoedoi God au matana!”

30 Ma rava anatapai i nonori da au Tempol viḡaiḡaiawa i tupua ma anatapai kampa i ruba. Ma Paul i vojijini ma i taina-opunei au doa ma Tempol metaetana i gudui. 31 Maranai tau Paul virāḡenana i kaukauei, Mai Rome sorodia ai bada ḡaeḡaena i nonori da viḡaiḡaiawa ḡaeḡaena i tupua au Tempol. 32 Tauna laḡilaḡina ana sorodia ma ai babada i vaini ma i ruba kampa, maranai rava tau i 'nanai, Tau Paul vunuana i voterei.

33 Sorodia ai bada i nei Paul awarina da i vojijini ma ana sorodia ruaḡa i riwei da seinei Paul urana au urai i pani jijini. Anina ma tauna patara i vitara-virevirei i pa, “Wei aiai orotona? Aiwai i kauei?” 34 Patara au orana rava ḡelau babani tagogi i gararei, ma rava ḡelau babani tapuna i gararei. Rava were da nare i garagarara da sorodia ai bada menanare ita nelaḡai gaiawa karena aiwai, lamna aubaina ana sorodia i egari da Paul ita naiei, ai au bareki. 35 Maranai Paul bareki tetena i tutuḡereḡerei, patara i ḡaiawa guratana aubaina sorodia Paul i voepai da i avarai da ita galaloei. 36 Patara amapo da tau i vovotaḡotaḡoi ma i garagarara i pa, “Ona viraḡeni, ona viraḡeni!”

Paul patara awarii i babani.

† 21:25: Viawawana labalababa wei anatapuna e vaivaipai: Rava ḡela awana oroto bo wavine maiteni e viawawana (Exo 20:14, Deu 5:18); Rava ḡela maiteni e viawawana mane bo purapura aubaina (Lev 19:29, 1 Cor 6:15); Natuoim maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Orotu ma oroto bo wavine ma wavine e viawawana (Lev 18:22, Rom 1:26-27); Rava ma gāmoḡamo e vivivawawana (Lev 18:23); Rava ḡela, eḡa awaoim maiteni e viawawana (Eph 5:3); Rava ḡelau i gaegari da maiteni ma viawawana. (Gen 34:7, Deu 22:25-28). ☆ 21:27-29: Act 20:4

37 Maranai tau i aburuna ava da au bareki ita rui, Paul Greekei sorodia ai bada i riwei i pa, “Anina bo eġa da awarim ata babani?”

Ma tauna i auepai ma i riwa i pa, “Tam Greek u aramanei bo? 38 Tau a notai da tam Egyptei, rorova ai babada u viġaviei, Ma rava 4,000 orai potapotai u opunei au mutulua, Tam nai ravana bo?”

39 Paul i paribelana i pa, “Eġa! Tau Jew ei, au taon Tarsus a tupua, au Silisia provins, a vivibaġaim da rava awari ana babani.”

40 Tauna i vianina ma Paul au tete i mairi. Tauna urana i voepai da patara garara i voterei. Maranai tau i genuana, Paul tau awarii ai ponanei i babani i pa.

22

1 “Amamau ma varevareiu, ona rautaniġaneu ma ana viatataiemi da tau eġa aiwai ata kauana-boai.”

2 Maranai patarana Paul i nonori da tau i ponei i bababani, tau i genuana ma i rautaniġana.

3 *I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma. Amamata ai tarawatu a girumei ma au tauviararamana Gamaliel.* A ġoana-guratei da God ata voepaepa-kauei me taumi anatapumi nanare.

4 *Tau Iesu ana etanai tauvotaġotaġoina a rau-iviapoapelei da ġelau i raġe. Nelara ma waivine a pani ma au numa panipani a tawana-ruiei. 5 Pirisi ġeġetelarana ana boru ġeġetelarana† maiteni i aramanei da tau a ririwa kaua. Tau i vianina pepana i vereu da ai rava au Damaskas ata verei ma a nae au Damaskas da kerisiana ata pani ma a neiai da kovoġa ita vaia weka au Jerusalem.

6 Aubenai Damaskas a tuġereġerei ma maratagogi lalaina gamrina ġaeġaena marei i ġairai da i tunui. 7 A peu au doa ma pona a nonori i pa, “Saul! Saul! Aiwai aubaina e rarau-iviapoapeleu?”

8 Tau a paribelei, “Bada tam aiai?”

Tauna i paribelei, “Iesu Nasaretei e rarau-iviapoapelei.”

9 Rava maiteni a nena lalaina i ’nanai wate babani eġa ita nonori.

10 A paridadana a pa, “Bada Aiwai ana kauei?” Ma Tauna i riwa i pa, “Ma vomairi ma nae au Damaskas. Kampa rava am nola ina pariverem.”

* 22:3: Act 5:34-39 * 22:3: Gamaliel tauna tauviararamana ma rava aiaina Paul ana au mara. Tauna Pharisi ma boru ġetelarana (Sanhedrin) au orana.

* 22:4: Act 8:3; 26:9-11 † 22:5: Sanhedrin

11 Lalalaina gamrina i rata guratana ma matau i kamoi da eġa ata inainana. Ma tauvigwanigwaniana au urai i voa ma i naieu au Damaskas.

12 Orotu wavana Ananias kampa i mae tauna God i voepaepai ma ana tarawatu i vovojijina-nonoei. Mai Jew tauna i vivirana-kauei. 13 I nei da au ririvau i mairi ma i riwa, “Vareiu Saul ma inana me!” Nai marana a inana me.

14 Anina ma i riwa, “Amamata ai God i rautanim, da ana ġoana ma aramanei, ana Taunola Jijimanina[†] - matamei ma inanai, ma riwana taniġamei ma nonori. 15 Aiwai u inainanai ma u nononori ma vimatematei rava anatapui awarii. 16 Marina aiwai e paipaini! Tauai ana babataitoim ma BADA awarina ma raupari da am ġo’apoapoei ina oġa-tawanei.”

17 Anina ma a nae au Jerusalem. Au Tempol a raraupari ma matauei kua a inanai. 18 A inanai BADA awariu i bababani i pa, “Rava weka ma jima tau aubaiu eġa nonorana ita ġoeġoei. Laġilaġina Jerusalem ma opu-tawanei.”

19 Wate tau a paribelei, “BADA wei ravai i aramanei da pari numai a nepai da kerisiana a vunui ma a pani-naiei. 20 ✨Ma maranai am peroveta Stephen tarana i toi, tau kampa a maimairi ma ana iraġe a vianinei ma ġaima tautawanai ai gara a paipaini.”

21 Ma BADA i riweu, “Ma nae a paripari-tawanem aueia Jentail awarii.”

Paul e ririwa da tauna Romei

22 Patarana Paul i rarautaniġanei ma maranai wei babanina i kauei tau i meji guratana ma i vigaragararei i pa, “Ona viraġena-tawanei, eġa ina mael!”

23 Tau i vigaragararei, ai kwama i kwajikwajiei ma pokau i tawatawanei awarina. 24 Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita vieġa aiwai aubaina ana rava amloi i ġaiġai ma awarina i garagarara. 25 Ma urana ruaġa i terepai au aidamo ma i raġiraġini da ita wipi ma Paul sorodia ai bada i riwei i pa, “Tau Rome-ei, Eġa ota etareu ma o vunuvunu-labalababaiu. Lamna menanare?”

26 Maranai sorodia ai bada wei i nonori ma i nae da ai bada ġaeġaena i parivere. Ma tauna i vitara-virevirei i pa, “Aiwai e kaukauei? Wei ravana Rome-ei!”

27 Sorodia ai bada i nae Paul awarina ma i paridadanei, “Ma riweu! Riwa kua da tam Rome-ei bo?”

Ma Paul i paribelei, “Ee, lamna riwa kua!”

[†] 22:14: Rava Jijimanina bo bulobulona, lamna Iesu wavana. Paul eġa Iesu wavana ita latoni mepa da taurautaniġana mai Jew ita viamoġaiġaini. ✨ 22:20:

28 Sorodia ai bada Paul i riwei, “Tau mane gāeḡaena Rome gabemanina a verei da a vimai Rome.”

Paul tauna i riwei, “Tau a tupua da Rome-ei.”

29 Sorodia i ḡoei da Paul ita etarei wate maratagogi ita ḡori-melei. Ai bada ita ḡori ma i rovo-kaukua maranai i aramanei da i kauana-boai da Paul, Rome-ei seinei i pani.

Paul Jew ai boru ḡetelarana\$ au naoi i mairi.

30 Au maratomna sorodia ai bada i ḡoei da ita aramana-kauēi mai Jew ai viwavu aiwai Paul awarina. Ma lamna aubaina Paul ana seinei i votawatawanei ma i opunei boru ḡetelarana au naona i vimairini.

23

1 Paul boru ḡeḡetelarana i 'nana-jijini ma i riwa, “Varevareiu tau au nola God awarina i jijimana ma orau aiaina da wei paratana.” 2 Ma Pirisi ḡeḡetelarana Ananias rava ḡelauna Paul au ririvana i maimairi i egari da Paul i raunavanavai. 3 Ma Paul Ananias i riwei, “God ina raunavanavaim, tam morumorum! Moses ana tarawatuei e rarauetareu wate maranai am rava u riwei da i raunavanavaiu tam tarawatu u viaigai.”

4 Taui Paul au ḡereḡerena i maimairi Paul i riwei, “Aiwai aubaina God ana Pirisi Ḣetelarana e vivijiboḡi?”

5 Paul i paribelei, “Varevareiu eḡa ata aramanei da tauna God ana Pirisi ḡeḡetelarana. Au buka i terei da *Eḡa God ana taunola ma parivai-apoapoeni.*” (Exodus 22:27)

6 *Anina ma Paul i 'nanai da Sadusi ma Pharisi ḡelau kampa ma ponana i rata ma i riwa, “Varevareiu tau Pharisi, amau maiteni Pharisi. A vivitumaḡana da God rava irāḡelei ina vovaimairini wei lamna aubaina taumi o etaetareu!” 7 Maranai wei i latoni Pharisi ma Sadusi vipariparinigai i raukarei ma boru i kai da ruaḡa. 8 *Aubaina Sadusi e ririwa da rava e irairaḡe lamna eḡa ita vovomairi me, ma anela da aruarua eḡa ita vivitumaḡanei, wate Pharisi wei anatapui e vivitumaḡanei.

9 Gaiawa ḡaeḡaena i tupua ma tarawatu babadai ḡelau tau Pharisi, i vomairi ma i babani guratana i pa, “Tauai eḡa aiwai apoapoeni ata inanai wei ravana awarina! Mepa da anela bo Bada Aruana tauna awarina i babani?” 10 Vigaiḡaiawa ḡaeḡaena i tupua ma sorodia ai bada i rovo mepa da rava Paul ina viaisikasikai ma sorodia i egari da i rui ma Paul i taravaina-opunei ma ina naieiau bareki.

11 Ma waguvarai ġelauna, BADA Paul au ririvana i mairi ma i riwei, “Tepam ina tora! Me aubaiu u jima au Jerusalem nanare aubaiu au Rome ma jima.”

Mai Jew i vioga da Paul ina viraġeni

12 Ubaubanai mai Jew ġelau i vitagogiei ma i viogataru ma i parivainuaġana da eġa ina am bo ina uma da Paul ina viraġeni. 13 Nelara 40 nanare i vianina da Paul ina viraġeni. 14 Tau i nae pirisi babadai ma dogadogara awarii ma i riwei, “Tauai parivainuaġana bagibagina a kau i da eġa ana am da Paul ana viraġeni.” 15 Taumi Boru ġeġetelarana maiteni ona moru ma riwa ona pari-tawanei sorodia badana awarina da Paul ina neiai ma ona vitara-virevirei da riwa kaua ona vaia. Tauai ana vipaipai da ana viraġeni muriai da weka ina ġetai.

16 Wate maranai Paul avuna wei ogatarana i nonori ma i nae sorodia ai au bareki ma Paul i pariverei.

17 Ma Paul sorodia badana i ġoreiai ma i riwei, “Wei laragana laġilaġina ma naiei ami bada awarina da ana riwa ina riwei.”

18 Ma i naiei ai bada ġaġeġaena awarina ma i riwei, “Panipani wavana Paul riwa i paritawanei awariu ma i riweu da wei laragana ata neiai awarim aubaina am riwa awarina.”

19 Sorodia ai bada ġaġeġaena laraga i vinimavoai ma i maeria ma i paridadanei, “Am riwa aiwai ma riweu?”

20 I riwa, “Mai Jew i riwa da ita vibaġaim da au maratom Paul uta naiei ai au Boru ġeġetelarana, Wei anatapuna moru. 21 Wate eġa ma rautaniġanei aubaina rava 40 nanare pota e paipaini da ina viraġeni. Tau i vioga da eġa ina am da Paul ina viraġeni. Tau i vokaukua ma am vianina ava e paipaini.”

22 Ma bada laraga i riwei da eġa aiai ina riwei ma i paritawanei.

Tau Paul i paritawanei Gavena Felix awarina.

23 Anina ma sorodia ai bada ġaġeġaena babada ruaġa i ġoreiai ma i riwei, i pa, “Sorodia sod ravai 200, aiera ravai 200 ma hos ravai 70 ma vaia ma ona vokaukua da waguvarai 9 oklok ona vomairi. 24 Hos biaġa ona vaia Paul aubaina da aiaina ona naiei gavena Felix awarina au Caesarea.”

25 Ma sorodia ai bada pepa wenanare i girumi:

26 Tau Claudius Lisias, a girugiruma awarim au bada vinu-laulaunam, Gavena Felix.
Egualau.

27 Mai Jew wei orotona i vojijini ma ita viraġeni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei. 28 A ġoei da ata aramane i ana apoapoe aiwai, da ata naiei ai Boru ġeġetelarana awarina. 29 Ma a nelaġai da viwavuna lamna tauia va ai tumaġana kauai ma Rome ana tarawatuei lamna

tauna eġa aiwai apoapoena ita kauei da ata viragēni bo ata pani. ³⁰ Maranai riwana a vaia da mai Jew i ġoei da gov-agoṡagane i tauna ita vunui. Lamna maratagōgi a paritawane i awarim, ma nanare tauviwavu a riwana-guratei da kampa ina ġetai da ai viwavu ina kauei.

³¹ Ma sorodia ai babada i ririweia nanare i kauei ma wagu-varai Paul i taravaini ma i naiei da au taon Antipatris i ġeta.

³² Au maratamna aiera ma sod sorodiai i naeme au Jerusalem ma hosi sorodia Paul i naei au Caesarea. ³³ Maranai hosi sorodiai au Caesarea i ġeta pepana ma Paul gavena i veredamane i au urana. ³⁴ Gavena pepa i 'avi ma Paul i paridadane i metauna provins-na u tupua ma i riwa, "Silisia." ³⁵ Gavena i riwa i pa, "Am etara ana nonori maranai am tauviwavu ina ġetai." Ma sorodia i naiei Herod numa i voavoaiana da ita inana-vaitetei.

24

Paul Gavena Felix au naona i mairi

¹ Aupom 5 au murina Pirisi ġeġetelarana Ananias ma dogadogara i ġaira au Caesarea ai taurauetara wavana Tertelus maiteni. ² Ma Paul i ġoreiai gabemani au naona. Ma Tertelus i vomairi ma viwavuna i vikarei:

Au bada Felix *vinualaulaunam, Am vibadane i ta mae ubauba ma ata nota eġa aiwai. Ma kaua vouii ma aiaii u kaukauei ata dobu voana aubaina i voagu-kaueta.

³ Anatapui ai mepamepa a mamae a vinuai ai kaua tam awarim. ⁴ Wate eġa ata ġoei da ana visina-viraviraim. Ma lamna aubaina a ġoeġoei da uta rautaniġaneu mara aburuna ava.

⁵ Tauai a nelaġai da wei ravana lamna orana potapotana ma viġaiġaiawa tauvikareina mai Jew awarii dobu au anatapuna. Tauna boru vouna e ġoreġorei mai Nasaret† ai bada.

⁶ Tau i ġoei da Tempol maiteni ita tuvaideoedoei ma lamna aubaina a pani. ⁷†⁸ Ma rautare i ma ma nelaġai da ai viwavu lamna anatapui riwa kaua.

* **24:2:** Felix ana au vibadana lamna eġa ita ai. Tertelus lamna Felix i gwalagwalamerui da Paul ita viwavui ma ita pani. Felix rava vita ġaeġaei i verei da madeġa ruaġa i kwa Sisaei Nero wei ravana i viopuni. Ġavia ġaeġaena i tupua ma Jew Rome i viġaviei ma tau i Jerusalem i rikai da eġa aiwaina ita mae.

† **24:5:** Wava Nazarene lamna Iesu ana tauvotaġotaġoi e babanie i aubaina tauna Nasaretei. Maranai Tertelus tau i ġorei Nazarene Lamna Kerisiana e vivijiboġi. Jew Jerusalem ei ma Judea Provins anatapuna mai Galili provins ravai e inainana ġairei, (John 1:46 ma iavi). Tauna wate e ririwa da menanare Paul e tapataparoro nei lamna mai Rome ai tarawatu e viviaġai. † **24:7:** Verse 7 lamna buka waduwaduboi biaġava au orana e mamae, wate buka Greek ponane i girugirumi maġamaġgai wei ves-na au orana eġa.

⁹ Ma mai Jew Tertelus au murina i mairi ma i riwa, “Wei babani anatapui riwa kaua!”

¹⁰ Anina ma Gavena Felix Paul i raumotemotei da ita babani. Paul babani i vikarei i pa:

Au bada vinualaulaunam, a aramanei da tam madega biaga wei dobuna ai taurauetara lamna aubaina tau ana nuaubau ana babani aubaiu. ¹¹ Am rava ina riwem da tau pom ota aupom ¹² nanare a geta memei au Jerusalem da BADA ata voepaepai. ¹² Au tauviwavu ega ita nelaiaui ata vigaigaiawa au Tempol bo au boru-numana bo mepa nanare au Jerusalem. ¹³ Ma ai viwavu tau awariu menanare tana aramanei da lamna riwa kaua? ¹⁴ Wate riwa kaua da tau amamata ai God a voepaepai ma BADA Iesu ana etanai, a vogaogoi ma tau i ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anatapuna a vitumaгани. ¹⁵ Tau God awarina a vitumaгани guratana me ravai nanare, da tauna muriai rava anatapui iragelei ina vilawana-melei, ravai aiiai ma rava apoapoei. ¹⁶ Lamna aubaina a kaukauana guratei da orau ina ai rava ma BADA awarii.

¹⁷ *Jerusalem a netawanei madega biaga i kwa ma pom ota a nememei da molamolakai ata puloi ma pulo ata kau i God awarina. § ¹⁸ Tau aiiau, maranaina i nelaiaui au Tempol viaina pulona a kaukauei. Ega patara maiteni ma ega visinaviravira. ¹⁹ Wate mai Jew gelau Eisia provinsei i nei kampa. Tau mepa marina! Ita nei au naom da ai viwavu ita terei. ²⁰ Bo babada weka ita riweta au apoapoe aiwai maranai boru getelarana au naona a mairi. ²¹ *Wate mepa da maratagogi awarii a garara a pa, “A vitumaгани da God rava anatapui iragelei ina vovaimairini! Lamna aubaina tau weka a maimairi.”

²² Felix tauna BADA Iesu ana Etanai riwana i aramana-kau i boru i gudui ma i riwa, “Maranai sorodia ai bada Claudius Lisias ina nei, ma ina paribelem.” ²³ Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

Paul Felix i viaramani

²⁴ Aupom biaga au murina Felix awana Drusila maiteni i nei. Drusila lamna wavine Jew ei. Ma riwa i paritawanei da

☆ **24:17:** Act 21:17-28 § **24:17:** Madega 5 i kwa ma Paul i nememei au Jerusalem da ita mae mara aburuna da tauvitumaгани ita vovaiwewapani ma ana babara ma nolana aiaina ita virarautuei. (Act 18.22) ☆ **24:21:** Act 23:6

Paul i nei*ai*, ma rava ai tumaḡana Iesu Keriso awarina i babanie*i* ma Felix i rautaniḡana. *

²⁵ Wate maranai Paul babani i vikarei da God ana ḡoana, da rava lawana aiaina ma jijimanina ina maeni, ma erawa kauai ma ḡo'apoapoe ina geduaie*i*, aubaina mara e nenei maranai rava anata*pui* ina etare*i*. Felix wei babanina i nonori tauna i rovo ma Paul i riwei, “Ma nae! Ma maranai ana ḡoem lamna ana kwatuem.” ²⁶ Ma Felix i ḡoēḡoei da Paul tauna manelei ita gwalai ma lamna aubaina mara i maḡa i raukwatuei ma awarina i babani.

²⁷ Madeḡa ruaḡa au murina Felix i rautom ma ana gabu Posias Festus i vaia. Felix i ḡoei da wavana ita ai mai Jew awarii lamna aubaina Paul au numa panipani i votere-tawane*i*.

25

Paul i vibaḡa da Sisa au naona ita mairi

¹ Festus i ḡeta au Caesarea da ana nola ita vikarei ma aupom vitonuina i ḡae au Jerusalem. ² Weka pirisi ḡeḡetelarana ma dogadogara Festus i nebelei ma ai viwavu Paul awarina tauna i verei. ³ Ma Festus i vibaḡai da ita voagui da Paul ita paritawane*i* au Jerusalem. Taui ava i vioga da Paul au etanai ita virāḡeni. ⁴ Wate Festus i paribelei i pa, “Paul au deri au Caesarea ma tau a ḡaiḡaira me kampa aupom ruaḡa au murina. ⁵ Mepa da Paul aiwai i kauana-boai lamna ami Babada maiteni ana ḡaira da kampa ami viwavu ina terei.”

⁶ Aupom 8 da 10 nanare au murina Festus i ḡaira me au Caesarea ma maratamna au numaetara i kiala ma ana sorodia i eḡara da Paul ita ruieiai au naona. ⁷ Maranai Paul i ruieiai, ma Jew babadai Jerusalem ei i ḡairai i nei awari ma ina viwavui, kaua maḡamaḡau*i* apoapoei aubai*i*. Wate taui ai viwavu anata*pui* anona eḡa.

⁸ Paul wei *viwavui i vinua-nainei ma i pa, “Tau eḡa aiwai apoapoena ata kauei mai Jew ai tarawatu awarina bo ai Tempol awarina bo Caesar awarina.”

⁹ Wate Festus i ḡoei da mai Jew ita vinuaiaini lamna aubaina Paul i paridadane*i* i pa, “E ḡoēḡoei bo eḡa da tana ḡae au Jerusalem ma etara?”

* **24:24:** Mepa da Drusila Jew wavinena awarinei Felix wei ravai e ḡoreḡorei tauvitumaḡana i aramane*i*. Drusila lamna Herod Agrippa natuna guguinina umauna ana madeḡa 20. Tauna wavalatona Sirie*i* i ravaḡi wate i voterei maranai ana madeḡa 16 da Felix i ravaḡi. Wei lamna ana tavine viruiaina ma Felix ana tavine vitonuina. * **25:8:** Paul au Tarsus i tupua wate tauna wavana Rome gabemanina awarina. Lamna aubaina tauna ana rewapana e mamae da ana nuabola ina naie*i* au Rome da Caesar ina rautare*i*.

10 Paul i riwa, “Tau marina Caesar ana au etara gabuna a maimairi, weka ina etareu. Tam u aramana-kauei da tau eġa aiwai apoapoena ata kauei mai Jew awarii. 11 Wate mepa da aiwai apoapoena a kauei lamna ma viraġeniu. Tau eġa irage ata rovoei. Wate mepa da wei lamna viwavu moru lamna eġa aiai ana rewapana ita mamae da ina veredamaneu. Tau a vivibaġa Caesar awarina!”

12 Festus Caesar ana dogadogara ai nota i vaia ma i paribelana i pa, “Tam u vibaġa Caesar awarina, Anina Caesar awarina ma nae.”

Festus Paul ana babani gulau Agrippa i parivere

13 Aupom biaġa au murina gulau Agrippa† novuna Benisi maiteni i nei au Caesarea da gavena vouna Festus i raugenari da ita viegualaei. 14 Ma i mae aupom vomaġauna ma Festus Paul i rarauetara gulau i parivere i pa, “Felix panipani tagogi weka i voterei. 15 Ma maranai a nae au Jerusalem mai Jew ai pirisi babadai ma dogadogara ai viwavu i neiai awariu ma i vibaġaiu da Paul ata viraġeni.

16 —Ma a riwei da tauai mai Rome ai tarawatu e ririwa da eġa rava ana kovoġa labalababai da au naona ana rautarei. Tau i na ġetai da ai viwavu taurauetara au naona ina mairi da ina gagaloana-melei. 17 Maranai tauviwavu maiteni weka a ġetai. Tau eġa ata vipaipai ma maratamna a egara da ravana i neiai da ita etara. 18 Tauviwavu i vomairi ma a notai da aiwai apoapoena aubaina ita viwavui wate eġa. 19 Anina kua biaġa ava ai taparoro kauaii, ma rava tagogi irairage wavana Iesu i vitarapiriei. Wate Paul e ririwa da Iesu lawalawaina. 20 Tau nuanuau i raġaraġa menanare riwa kua ana vainei ma Paul a paridadanei da i vianina da maiteni ata ġae au Jerusalem da kampa ata etarei. 21 Wate Paul i vibaġa da Caesar ana viwavu ina rautaniġanei. Ma sorodia a egari da au numa panipani ina paini da ana paritawanei Caesar awarina.”

22 Ma Agrippa Festus i riwei, “A ġoei da ravana ana babani ana rautaniġanei.”

Ma Festus i paribelei, “Anina, au maratam ma rautaniġanei.”

Gulau Agrippa Paul i rautaniġanei

23 Au maratamna gulau Agrippa ma Benisi gulau garai i oteni ma ana gabemani babadai ġaeġae maiteni, i arana-ruiei au boru numana. Festus ana sorodia i egari da Paul i ruieiai. 24 Festus i riwa, “Gulau Agrippa ma anatapumi o rieiai weka, wei ravana o inainanai! Tauna mai Jew au Jerusalem ma weka au Caesarea e ġoeġoei da ina irage.

† 25:13: Wei lamna Herod Agrippa 11, Herod Agrippa 1 natuna.

25 Wate tau a nelaḡai da tauna eḡa aiwai ita kauana-boai da ina iraḡe. Wate i vibaḡa da Caesar tauna ina rauetarei. Lamna aubaina a pariparitawanei Caesar awarina. 26 Wate Caesar aiwai ana riwei, eḡa ata aramanei aiwai ana girumi? Lamna aubaina a neiai awarimi ma tam gulau Agrippa maiteni da tana babaniei da nota ona vereu da aiwai ana girumi. 27 Aubaina eḡa ita ai da panipani ana paritawanei Caesar awarina ma ana viwavuna eḡa!”

26

Paul ana gudu i tarai

1 Ma Agrippa Paul i riwei, “A vianinem da ma babani.” Ma Paul urana i voepai ma ana gudu tarana i vikarei 2 i pa:

I ai kua gulau Agrippa da amadodo tam au etara e rarautaniḡanei da Jew babadai ai viwavu awariu ana terevaijijimani. 3 Tau aramanei da tam mai Jew ai giu ma ai paripariḡai u aramanana-kauei. Lamna aubaina a vivibaḡaim da au paribelana ma rautaniḡanana-kauei.

4 Mai Jew anatapui au lawana i aramanei, aburu da marina, au dobu oina da au Jerusalem. 5 ✧Tau i rorova ava i aramaneu ma ina riwem da tau ai boru bagibagina ma piripirina, Pharisi au orana a rui ma tarawatu anatapuna a vojijina-kauei. 6 Ma marina a vivitumaḡana da God aiwai noinoita i parivainuḡani ina kauei. Ma lamna aubaina tau weka a maimairi. 7 Wei parivai-nuḡanana ata dam 12 e vipaipaiei da ina nei lamna aubaina ata rava i vipatutu ma marai ma waguvarai God e viviborumei. Au gulau wei vitumaḡanana aubaina mai Jew e viviwavuii. 8 Aiwai aubaina o notanotai da God eḡa tagotagogina da rava iraḡelei ina vovaimairini?

9 ✧Tau au naona a notai da aiwai anatapuna ata kauei da Iesu Nasaretei ata viḡaviei. 10 Ma anina lamna a kauei au Jerusalem. Piriḡi ḡeḡetelerana babadai pepa i verei ma lamna i vovai-virewapaniu ma kerisiana vivivireii maḡamaḡai au numa panipani a terei, ma nanare ai iraḡe a vianinei. 11 Mara maḡamaḡai boru numai a naeni da kerisiana a vununaiei da ai tumaḡana ita boviei. Amlou i ḡaiḡai kua da dobu ḡelau i naeni kerisiana a baibaiei.

12 Mara tagoḡi piriḡi babadai au Jerusalem pepa i vereu da rewapana i vereu ma a nae au Damaskas. 13 Ma aubenai nanare, tau au etanai a nenaie ma a inanai, lalalaina marei i ḡairai ma i lalalai, gamrina madeḡa i ḡetawanei! Au

rava maiteni a bababara i lalaiai. ¹⁴ Anatapuiai a vipeuana au doa ma pona Heburei awariu i bababani. I riwa, “Saul, Saul aiwai aubaina e viviġavieu? Tam e ġoeġoei da Tau ma viapoapoeniu wate eġa da tam e viviapoapoenia-melem!”

¹⁵ Ma a paridadana, “Bada tam aiai?”

Ma BADA i paribelei, “Tau Iesu, ravana tauna e viviġaviei. ¹⁶ Wate ma vomairi. Tau a nei awarim da vaivai ata verem da ma vitaunola Tau aubaiu, ma amadodo aiwai u inanai ma aiwai ana viatataiem, ma vimatamatei rava awarii. ¹⁷ Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii, ¹⁸ da matai ma vikalai, da ai lawana apoapoe ina voterei ma ina nei au lalalaina, ma Satan ana rewapana ina votere-tawanei ma ina nei God awarina. Tauna ai ġo’apoapoe ina nota-tawanei, ma ina taravaini natunatuna rarautanii, ai tumaġana awariu aubaina.”

¹⁹ Lamna aubaina Gulau Agrippa, tau riwa marei au inana a inanai a voteletelei. ²⁰ ✧Au naona a jima mai Jew awarii au Damaskas ma nanare au Jerusalem ma Judea anatapuna ma muriai Jentail maiteni awarii. A jima da ai ġo’apoapoe ina votere-tawanei ma ina mae-tavirei God awarina, ma ai lawana ina vimataira da ai kaua apoapoe i voterei-tawanei.

²¹ Wei babanii aubaina mai Jew au Tempol i vojġiniu ma i ġoei da ita viragġeniu. ²² Wate God i vilawaniu da marina, ma weka a maimairi da a vimatamata rava muomuoi ma nanare rava ġaegaei awarii. Aiwai a bababaniei lamna peroveta nununai ma Moses i ririweta ina tupua. ²³ ✧Tauri i riwa da tauvilawana Keriso ina vinuapoapoe. Ma tauna ina iragġe ma ina vinoa da ina vomairi me ma wei matairana ina vinolanola da tauna God lalalaina mai Jew ma Jentail aubaii.

²⁴ Weka Festus i vionaġi ma i garara Paul awarina, “Tam u bua! Am aramana i vibuaim!”

²⁵ Wate Paul i paribelei, “Au bada Festus tau eġa ata bua. Tau aiwai a bababaniei lamna riwa kaua ma babani anona. ²⁶ Wei kaua eġa govagovagana ma aramanei da Gulau Agrippa anatapuna i aramanei, ma lamna aubaina ana tepatorau wei kauai ana babaniei awarina.” ²⁷ Paul Gulau Agrippa i riwei i pa, “Peroveta e vivitumaġanei bo eġa? A aramanei da nanare!”

²⁸ Ma Agrippa i paribelei, “U notai da tau laġilaġina ma sinaviraiu da ana vikerisiana!”

²⁹ Paul i paribelei, “Laġilaġina bo amapo, a raraupari God awarina da tam ma rava anatapui wei au boruna ina tupua-vira me tau nanare wate eġa sein maiteni.”

³⁰ Anina ma gulau ma gavena ma Benisi i vomairi ma i nae.
³¹ Ma anatapui i nenaē ma i babani vivira ma i vianina i pa,
 “Wei ravana eġa aiwai apoapoena ita kauē da tana viraġeni bo
 tana pani.”

³² Ma Agrippa Festus i riwei, “Mepa da eġa ita vibaġa ġae
Caesar awarina, lamna marina tata rupeni.”

27

Paul wagei i vaġai nae au Rome

¹ Festus mara i tereterei i ġetai da tauai ata nae au Rome.
Paul ma tau ma panipani ġelau i maiteni au waga a geru ma
 a vaġai Rome aubaina. Rome ai sorodia badana wavana Julius
 au urana i terelai. Tauna Caesar ana sorodia vinevinena.
² Waga Adaramitei i nei da a geru ma wagana i ġota-nae au
Eisia provins gerana. Oroto wavana Aristakas ana dobu
Thesalonika au Masedonia provins tauna maiteni i geru.

³ Au maratomna au Sidon taon a ġota, Julius ivina i ai
Paul awarina ma i voterei da i opu au gera da ana rava
 ita raugenari ma ana ġoana aiwai ita vibaġei. ⁴ Muriai wagei
 a opu da a nenaē ma ive i verau-matamataniai ma lamna aubaina
 bonabona au Saipras ma dobu ġaeġaena au pouna au mulaġina
 ambori. ⁵ Ma boga ġaeġaena a bori da Silisia provins da
Pamphilia provins geraii a voterei da au Maira taon a rui au
Lisia provins ⁶ Au Maira taon kampa sorodia badana mai
Egypt ai waga Alexandriei i nenaē au Italy kampa i vigeruaii.
⁷ Ma aupom maġamaġau i nuatauai a ruba ma a voia guratana
 da Cinidus taon a tuġereġerei wate ive i verau-matamataniai
 da kampa waga a virai da Crete bonabonana ma mutu
Samone au poui au mulaġina a nae. ⁸ Ma kampa nuatauai
 bonabona Crete gerana a naeni aubaina mara i apoapoe ma
 a ġeta dobu e ġoreġorei U Aiaina, Lasea taon au ġereġerena.

⁹ Mara ġaeġaena a vine-boai au vaġai* ma Rupena Ujina
 marana boiboġi i kwa,† marina lamna ive ma rabama ai
 mara ma boga babarana i vinirovorovo. ¹⁰ Ma Paul i riwa,
 “Nelara, malana a vaivaia da ata vaġai ina apoapoe kaua ma
 waga ma purapura tana vine-boa-pai. Ata lawana maiteni
 tana vineboai.” ¹¹ Wate sorodia ai bada, kapena ana ba-
 bani i rautaniġanei ma eġa Paul da kampa ata mae ma eġa
 ata nae. ¹² Wei gabuna eġa ita ai wei ivena au marana ma
 rava maġamaġau i goei da waganei ata nae da Phinix una,
Crete au bonabonana da kampa ata mae da bodu ita kwa. Wei

* 27:9: Iri i parei da kojikojira ana mara ma i vaġai. † 27:9: Eng. Atonement
 bo *Yom Kippur* marana wei lamna September bo October rabama ma ive ai mara

u gāeḡaena ma mutuui lavarata ma rauanaḡa e vinao-vereverei, da au mulaḡina e mamae.

Kojikojira Ġaeḡaena

¹³ Maranai rauanaḡa i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona geraei i nae. ¹⁴ Ma eḡa barana ita uama ma kojikojira[†] olei iveiai. ¹⁵ Ive wagana i verau-matamatani ma waga eḡa tagotagogina da ita vobelei ma i voterei da ive waga i avara-opunei. ¹⁶ Bonabona aburuna Kauda gerana au mulaḡina a ruba ma kampa a voia guratana da dingy a terepai au waga da a ragita-jijini. ¹⁷ Wei i kauana vorovei ma ḡuravei waga au gabaurina da waga adana i raḡita-kwaviviroi. Tau i rovo mepa da au maratete ina amḡaena au Syrtis, § Libya au gerana. Lamna aubaina ḡuravei ai da kuka, i raḡita-tagogiei ma au boga i viorereni da waga ita bibi. Ma i voterei da kojikojira waga i avara-naiei. ¹⁸ Maratomna kojikojirana i rarau-guratanelei da purapura ḡelau i au boga a viorereni. ¹⁹ Aupom vitonuina tau i waga purapurai i viorereni au boga. ²⁰ Kojikojira i ruba da aupom biaḡa da madeḡa ma ubona i purui. Ravai ai nota i kwa.

²¹ Wei au marana rava au waga am i kauana-avei, anina ma Paul i vomairi ma tau i riwei, “Nelara ota rautaniḡaneu ma Crete eḡa tata oputawanei, amapo waga eḡa tata viapoapoeni ma ata purapura eḡa tata vineboai. ²² Wate a ririwana-guratemi da eḡa orami ina peu! Aubaina avena da waga ina monu wate eḡa ina iraḡe. ²³ God lamna tau au BADA ma ana taunola tau. Waguvarai God ana anela i paritawaneiai awariu. ²⁴ Ma i riwa, ‘Eḡa ma rovo! Tam anina da Caesar au naona ma etara! Ma ḡelauna lamna God ana nuavaina maemaena rava anatapui maiteni e vaḡavaḡai ina lawana.’ ²⁵ Lamna aubaina tepami ina tora! Aubaina tau God a vivitumaḡanei ma menanare i ririweia nanarena ina tupua. ²⁶ Wate tauta au maratete tana amḡaena.”

²⁷ Kojikojira i avara-naielai au Mediterranean Bogana da aupom 14 i kwa ma nubautuva waga ravai malana i vaia da tau i gera i tuḡereḡerei. ²⁸ Ma barawa au giana ḡaima i raḡini ma au boga i tawanana-ḡairei da topa ana gabinou ita aramanei. Ma i aramanei da 40 meter ma i mae aburuna ma i raudadana-melei lamna marina 30 meter. ²⁹ Ma tau i rovo mepa da rabama waga au kira ina viairikarikai lamna aubaina waga au ipuna anika 4 i tawana ḡairei ma i vipaipai da mara ina tom tawanana. ³⁰ Ma waga ravai ai kaua i kaukauei da ita ruba-govaḡa. Ma i vioḡa da dingiei ita opu waga au naona da anika ita dubaranaiei, ma lamna aubaina dingy i teretere-ḡairei au boga, ³¹ Wate

† 27:14: Kariwabu ḡaeḡaena § 27:17: Wei lamna maratete.

Paul sorodia ai bada maiteni i riwei, “Mepa da waga ravai ina rubatawanemi lamna anatapumi ona iraḡe.” ³² Ma sorodia dingy ḡuravana i borituini ma dingy kwakwavina i peu au boga ma i avara-naiei.

³³ Ma maratomtomi Paul rava anatapui i egari da ita am, i pa, “Taumi marina aupom 14 rovo i kauemi ma eḡa ota am.”

³⁴ “Tau a vivibaḡa-guratemi da ona am da ona viwapana, eḡa aiai tagogi ina iraḡe.” ³⁵ Paul i babani vorovei ma au matai palawa i vaia, BADA i viegualaei ma i vogimai ma i ani. ³⁶ Ma rava anatapui inanai ma orai i bagibagi ma am i vikarei.

³⁷ Tauai anatapui ai 276 au waga. ³⁸ Ma rava anatapui i am da i am-iaua. Ma witi baikei au boga i viorereni da waga ita votelatelai da au gera ita ḡota da avena ita amḡaina.

Waga au maratete i amḡaena

³⁹ Maranai mara i tom tawanana tau i dobu i ’nanai wate gerana eḡa ita aramanei, wate U inanai da gerana aiaina ma i notai da gerana aiaina da waga kampa ita viḡaeni. ⁴⁰ Anina ma anika ḡuravai i viaituituini, ma labilabi i tere-ḡairei, ma waga au naona kuka voaburunei i votawatawanei ma gera aubaina i ruba. ⁴¹ Wate waga au maratete i amḡaena da i tapaiei, ma rabama waga ipuna i viairikarikai.

⁴² Sorodia i ḡoei da panipani ita viraḡeni, da avena ita toa-ḡaira au gera ma ita viruberubei. ⁴³ Wate sorodia ai bada i ḡoei da Paul ita vilawani ma i viḡaei, anina ma ai viogatara eḡa ita kauēi. Ma tau i aiavoi toa i aramanei i egari da i viauepa au boga ma i toa-ḡaira au gera. ⁴⁴ Ma ḡelau aiwai da i tenatenam i vidauei. Ma nanare anatapui lawalawaii au gera i ḡota.

28

Paul au Malta bonabonana

¹ Maranai a ḡota au gera ma a aramanei da tauai au Malta bonabonana. ² Dobuna ravai i nebelelai ma ivii i ai kaua awariai. Garewa atuna i vikarei ma i ubauba, ma tau i au gera ai i viviri. ³ Ma Paul ai ragorago i ḡuna da ai au tepana i tereterei ma mota ḡaiḡaiawana ai bolana malana i vaia da i opui ma Paul nimana i ani. ⁴ Dobuna ravai i ’nanai da motana Paul au nimana i dawedawe ma i pari-ararava, “Wei ravana lamna tauviraḡena ma eḡa ita monu wate ata god* e ririwa da tauna eḡa ina lawana.” ⁵ Wate Paul motana i viaikwajiei da ai au menamenana i rauei ma tauna eḡa ita kero. ⁶ Rava i vipaipai da Paul nimana ita dodo bo ita peu da ita iraḡe. Wate maranai i vipaipai guratana ma i ’nanai da tauna anina, tau i ai nota i virai ma i riwa da tauna god ḡelauna.

* 28:4: God wavinena wavana kaua aiaina bo kaua jijimanina (Justice).

⁷ Au gerana a gōtaḡōta - lana au ḡereḡerena lamna dobuna badana Publius ana wapu ḡaeḡaena. Tauna i taravainia ma i paina-kaulai da aupom tonuḡa ⁸ Publius amana i doria manawa ruba ma iniḡuḡura i vaia da i matamatave, Paul i rui inanana aubaina ma urana au tepana i terei ma i raupariei ma i vilawani. ⁹ Anina ma rava anatapui doridoriai au bonabona i nei ma i vilawani.

Paul au bonabona Malta da i nae au Rome

¹⁰⁻¹¹ Kampa mai Malta maiteni a mae nawaravi tonuḡa. Ma ravai i voagu-kaulai ma maranai ata vomairi, ai ḡoana vaḡai aubaina anatapuna i verelai. Ma waga ḡelauna a gerui lamna mai Alexandria ai waga bodu aubaina kampa i mae. Waga au naona lamna ai god ruaḡa kokoitai i tai†. ¹² Kampa ma a amkuka-nae da au Sairakius a ḡōta ma a mae aupom tonuḡa ¹³ Kampa da ambori damana au Regium ma maratonna rauanaḡa i wanabauni ma amkuka ma geraei a ruba da maratom ḡela au Puteoli a ḡōta. ¹⁴ Kerisiana kampa a nelaḡai ma i riwelai da maiteni a mae wiki tagogi. Anina ma a babara-nae da au Rome taon a ḡeta. ¹⁵ Kerisiana au Rome riwaii i vaia da a nenei ma i ḡei da ita nebelelai, ḡelau i ḡei au taon e ḡoreḡorei Vaḡavaḡai Tonuḡa ai Numa ma ḡelau i ḡae Apius ana au maket. Maranai Paul wei ravai i 'nanai, ma i vinuaii kua ma God i viegualaei. ¹⁶ Maranai au Rome taon a ḡeta tau Paul numa i verei da ainelana i mae ma sorodia i terei da i 'nana-vaitetei.

Paul au Rome i raugugula

¹⁷ Ma aupom tonuḡa au murina Jew babadai kampa mae-maei i rauḡoreiai ma awarii i babani, “Varevareiu tau eḡa aiwai ata kauana-boai ata rava awarii bo amamata ai tarawatu ata viaigai. Wate au Jerusalem i paniu ma i veredamaneu Rome gavena awarina. ¹⁸ Mai Rome i etareiu ma i ḡoei da ita rupeniu aubaina eḡa aiwai apoapoena ata kaui da ina viraḡeniu. ¹⁹ ✧Wate Jew babadai wei eḡa ita ḡoei ma lamna aubaina Rome babadai a riwei da tau eḡa ana mae wate ana ḡae au ḡaeḡaena Caesar awarina da ita rauetareiu. Wate lamna eḡa au rava ata viviḡaviei, eḡa. ²⁰ Lamna aubaina a ḡoremi weka da tata babani gogona, ma ata riwemi da tau a vipanipani aubaina a vitumaḡana da mai Israel ai tauvilawana wariaḡa i ririwei boiboḡi i nei.”

²¹ Tau i paribelei, “Tauai eḡa pepa Judeaei ata vaia bo ai rava riwa ita neiai. ²² Tauai aramanei da ravai anatapui

† **28:10-11:** Wei lamna mai Rome ai god raḡaraḡa wavai Castor ma Pollux ruaḡai e ḡoreḡore Dioscuri bo raḡaraḡa marei, Tau lamna god Zeus ma Leda natunatui.

✧ **28:19:** Act 25:11

kerisiana boruna e paripari-virevirei. Wate tauai a ḡoei da am nota ana vaia.”

²³ Ma tauai mara i terei da Paul maiteni ita viboru, ma patara i ḡetai mepa Paul i mamaelana. Ma ubaubanai Paul God ana vigulau jimana i vikarei da waguvarai i vorovei. Moses ana tarawatu ma peroveta nununai ai au buka i mairi ma i jima. I ḡoei da orai ita taini da Iesu ita vitumaḡanei. ²⁴ Ana babaniei ḡelau orai i taini ma ḡelau eḡa ita vitumaḡana. ²⁵ Ma tauai ava babanina i viparipariniḡaiei ma muriai da ita vilamonei Paul wei riwana tagogi i latoni i pa, “Arua Vivivireina riwa kaua Peroveta Isaiah ponanei amamami i riwei i pa:

²⁶ *Ma nae am rava mai Israel awari da ma riwei,
ona nononora wate eḡa ona araramanei
ona inana wate eḡa anona ona aramanei.*

²⁷ *Aubaina wei ravai orai i bado.*

Taniḡai i gudui,

Tau matai i vopotai.

Mepa da taui mataiei ita inainana,

taniḡaiei ita nononora

oraiei ita araramanei,

ma ita mae-tavirei awariu ma ata vilawani. (Isaiah 6:9-10)

²⁸⁻²⁹ —Lamna aubaina ona aramanei da God Riwana Aiaina vai-melana aubaina i paritawanei Jentail awarii. Tau i rautaniḡana.”

³⁰ Paul kampa numa i vivimaiei ma i mae madeḡa ruaḡa taputapuna. Ma rava maḡamaḡai i nenei da i raraugenari ma wei i vinuaiaiei. ³¹ Ana tepatorana God ana vigulau ma Iesu Keriso riwana Aiaina i jimei. Ma eḡa ai ai ita viḡaei.